

# WANTOK

NIUSPEPA BILONG OL PAPUA NIUGINI STRET

32 pes

Namba 1069

Wik i stat long Fonde, Disemba 22, 1994.

40 toea

## INSAIT

• Gat moa pipel long ol Mosbi setelmen- p3

• 4,000 yut bai rausim ol pasindia long Lae- pes 4

MOA SANDAUN SPOT POTO

Nupela kaset bilong nem Reks ben singa bai kam aut nau



LUKIM STORI LONG - Pes 18

### GEOFFREY APAKALI I raitim

EDUKESAN rifom o ol senis em bai kamap long wok bilong skul long Enga i pundaun nau.

Sampela yia i go pinis Enga provinsal gavman i makim sampela mani bilong karimaut ol dispela senis, we i mas stat long 1994. Wabag Komyuniti skul em provinsal gavman i bin makim we ol senis bai kamap long en.

Tasol mani bilong karimaut ol dispela senis i go long narapela rot. Dispela i no namba wan taim bilong kain pasin i kamap.

Aninit long dispela rifom program, provinsal gavman i mas sanapim wanpela dabol klasrum na haus bilong tisa long dispela yia yet. Dispela em long redi long skul i kisim gred 7 long neks yia.

Tasol toksave i kamap olsem planti bilong dispela K130,000 em gavman i baim i go long Enga Ensinerig Yut em provinsal gavman i rausim gen. 1 go moa long pes 2



• Memba bilong Kompiam Ambum long Nesenel Palamen, John Pundari (raitim) i stori wantaim hetmasta bilong Wabag Hal skul long taim bilong greduesen. Mista Pundari em olupela studen bilong Wabag Hal skul.

Ol senis long wok bilong skul long Enga no go gut

# CRC bil laikim senis long provinsal gavman

### GODFRIED YASSAFAR i raitim

SAPOS Nesenel Eksekutiv Kaunsil (NEC) i tokorait long Bil bilong Provinsal na Lokol Level Gavman, ol risoses kampani bai baim mani ol i kolim 'levi' i go long provinsal na lokol level gavman long wanwan yia.

Na Ilektoret Developmen Atoriti long wanwan ilektoret bai lukautim na spenim dispela levi, wantaim mani em nesenel gavman i givim long ol nesenel memba aninit long Ilektoret Developmen Fan.

Dispela tupela samting wantaim ol arapela samting i stap insait long Bil bilong kamapim sampela senis long stretim provinsal na lokol level gavman sistem insait long kantri.

Konstitusinel Rivyu Komisn (CRC) i putim kamap dispela bil na givim i go long NEC long skelim na glasim.

NEC long dispela wik i paitim tok-tok long dispela bil bilong CRC.

Dispela bil bilong CRC i tok long wanwan yia, ol developa kampani bai baim ol developmen long ol pipel, ikononik developmen, komyuniti na sosel developmen, envairomen na tu ol arapela levi go long provinsal na lokol level gavman.

Bil ya i tok tu olsem wanwan open ilektoret insait long kantri bai gat Ilektoret Developmen Atoriti (EDA).

Na ol memba bilong wanwan EDA em bai ol nesenel memba bilong ilektoret we EDA i stap long en-em bai stap olsem siaman, provinsal asembli memba bilong dispela ilek-

toret na ol hetman/meri na mausman/meri bilong lokol level gavman na ilektoret.

Arapela bikpela senis CRC i laikim em long wanwan provins, ol memba bilong provinsal asembli em bai olgeta memba bilong provinsal long nesenel Palamen, hetman/meri bilong rurel lokol gavman na eben atoriti, ol sief na tupela memba husat bai makim ol meri na ol sios. Aninit long dispela senis, rijonol memba bilong provins bai kamap olsem provinsal gavana na siaman bilong provinsal asembli. Ol memba bilong Provinsal Eksekutiv Kaunsil em bai provinsal gavana, deputi provinsal gavana, siaman na deputi siaman bilong wanpela PEC komiti na tu ol arapela memba provinsal gavana i makim.

Long sait bilong kisim mani, dispela bil bilong CRC i tok provinsal na lokol level gavman long wanwan provins bai kisim mani long takis na laisens fi, levi, gran i kam long nesenel gavman, lon/dinau na mani ol i kisim long ol invesmen wok/projek.

Long kisim mani, wanwan provinsal gavman bai gat pawa long putim kamap sels na sevis takis, laisens fi bilong bia, fi bilong pilai laki na loteri, propeti takis, rejistresen na laisens bilong ol ka, takis bilong yusim rot na tu envairomen levi.

Bil bilong CRC i tok: Wanwan provins bai gat wanpela edministreta. Ol edministreta bai wok aninit long Seketeri bilong Provinsal Afeas na Viles Sevis dipatmen. Wanwan distrik insait long wanpela provins bai gat distrik edministreta.

# Meri Krismas

ikam long Ela Motors Yamaha Hamamas na lukaut gut long wara.



## Ela Motors

OL GETAHAP LONG PNG

EM5011

## Isten Hailans grup oganaisim stail Krismas pati

ISTEN Hailans komyuniti insait long Nesenel Kapi-tel Distrik (NCD) long Mosbi bai amamasim Krismas wantaim sampela nesenel gavman memba long Kila Kila haikul long Sarere, Disemba 24. Dispela bai wanpela kain Krismas pati we ol man-meri insait long Mosbi siti bai holim na singautim ol nesenel memba long go sindaun kaikai na ama-mas wantaim ol.

Mausman bilong Isten Hailans grup long Mosbi, Nixon Berry i tok ol pipel bilong Isten Hailans yet i kamapim dispela tingting long bungim sampela nesenel memba na amamas wantaim ol. "Dispela em wanpela rot bilong pulim ol lida i kam daun na sindaun wantaim ol pipel long kaikai na amamas," Nixon i tok.

Insait long dispela Krismas pati, ol lida olsem Deputi Oposisen lida-Bill Skate, Isten Hailans Rijonol memba-Aita Ivarato, memba bilong Mosbi Saut-Albert Karo na ol kendidet bilong Mosbi Saut husat i bin lus long ileksen.

Isten Hailans komyuniti gat laik tu long singautim memba bilong Mosbi Not Is, David Unagi long bung wantaim ol long dispela Krismas pati.

Mista Berry i tok ol pipel bilong Isten Hailans i putim inani long holim dispela pati na tu memba bilong Sentrel provins, Bill Skate i helpim ol long sampela mani long baim kaikai na ol arapela samting.

Nixon i tok bai gat sampela samting olsem singsing na spot we ol manmeri ken pilai long ama-masim dispela Krismas pati.

Em i tok dispela i wanpela kain bung we i no save kamap bipo we ol pipel i redim kaikai na ol samting. Na singautim ol lida i bung wantaim ol. Olsem na em i askim ol manmeri long ol arapela provins long kamap tu long dispela bung.

## Pitalok na Dagi laik pretim tasol gavman: PM

PRAIM Minista Sir Julius Chan i tokaut olsem toksave bilong ol pipel long Tabubil long pasim olgeta han rot i go long Kiunga na Tabubil i bilong pretim tasol em wantaim gavman bilong em. Dispela toksave i stap insait long wanpela petisen tupela man-Borok Pitalok na Rex Dagi sainim long en. Long dispela petisen tupela man ya i askim Sir Julius long go long Tabubil long lukim bodi bilong 28 manmeri husat dai taim wanpela balus bilong MAF i bin pundaun long las wik Sarere.

Tupela man yia tok sapos Sir Julius i no go long Tabubil, ol bai pasim Ok Tedi main. Sir Julius i tokaut olsem em i no laik go insait tumas wantaim ol

lain husat ol i save yusim bodi bilong ol daiman long stretim ol wari bilong ol long sait bilong wok bisnis na politik.

Em i tok em i sem long dispela kain pasin we Mista Pitalok na Dagi mekim taim tupela ol i yusim bodi bilong daiman long pretim gavman na ol pipel bilong Papua Niugini. "Mi laik tokaut stret olsem mi sori long harim indai bilong dispela 28 manmeri na ol pikinini. Mi salim tok sori bilong mi go long ol pren, famili na wan-pisin bilong ol," Sir Julius i tok.

Em i tok olsem indai bilong ol dispela lain i nogat wanpela samting wantaim Ok Tedi Main-ing long sait bilong baim kompensesen.

# 4,000 yut bai rausim ol pasindia long Lae

### YAKAM KELO I raitim

MOROBÉ Provinsel Gavman bai yusim moa long 4,000 yut na ol asples Morobe long karimaut wok bilong rausim ol manmeri, husat i wokim haus antap long graun we i nogat luksave long en.

Primia Titi Christian i tokim *Wantok* long Tunde nait olsem ol pipel bilong Morobe yet bai go pas long rausim ol trabelman, na ol arapela husat i stap antap long graun bilong gavman.

Mista Christian i tok ol pipel

bilong Morobe i les pinis long kainkain trabel pasin we ol bikhetman i wok long kilim nating ol gutpela manmeri bilong Morobe. Long dispela as, ol Morobe pipel yet bai rausim ol pasindia husat i stap na mekim trabel.

Primia i laik mekim klia olsem ol plisman bai no inap rausim ol pasindia manmeri, na tu rausim ol haus i stap antap long graun bilong gavman. Tasol ol plisman bai sanap was tasol na ol pipel bilong Morobe yet bai go het long mumiv ol samting.

Primia i tingting long mekim dispela wok insait long mun

Jenuari na Februari long neks yia.

Long nau yet ol lain husat i kisim taim long dispela mekimsave i kamapim kot egens Morobe provinsel gavman we kot i holim yet dispela toktok long skelim sapos pasin ya i bihainim lo o no gat.

Tasol primia i tok gavman bilong em bai go het yet long karimaut dispela wok bilong rausim ol setelmen na pasindia long Lae siti. Bikos i gat tupela bikpela mak ol i sut long en em; rausim ol trabelman na rausim ol setelmen long graun bilong Morobe

pipel.

"Nau yet gavman bilong Morobe provins i sindaun long stretim baset bilong Morobe provins. Na sapos dispela baset i kam aut, bai dispela wok bilong rausim ol setelmen na ol trabelman bai i gat sapot wantaim moni long karimaut", primia i tok.

Primia i bekim ol toktok tu olsem gavman bilong em bai i no inap long baim wanpela bagarap long haus o samting we i bin kamap pinis. Bikos gavman i no bin givim tok orait long graun we ol i stap long en.

## Kiunga na Tabubil laikim ren long kris-mas

### IAN KAKARERE I raitim

OL pipel bilong Kiunga na Tabubil insait long Westen provins i laikim olsem ren i mas pundaun long dispela kris-mas.

Bikos dispela bai apim mak bilong wara long Flai Riva, we ol sip i ken go insait na sua long Kiunga bris. Bikos dispela bai helpim ol stua long taun long kism saplai bilong ol, na salim long ol manmeri, husat i laikim presen na bilas bilong krismas.

Long tupela wik i go pinis, tripela bikpela stua long Kiunga i nogat kakaruk na ol mit bilong salim. Bikos ol skul greduesen pati i pinisim ol dispela saplai, wantaim sampela pipel husat i laik holim krismas pati hari-ap.

Bikos long dispela hevi na planti pipel long Kiunga i baim na kaikai tinpis na rais tasol long ol apinun kaikai.

## Ol Korja givim helpim long Rabaul bagarap


### IVAN BAYAGAU I raitim

SPIKA bilong Palamen, Rabbie Namaliu i bin kisim sampela samting bilong helpim ol man-meri i stap insait long ol kea senta long Rabaul long Trinde las wik.

Dispela samting em ol pipel i stap insait long Punchedon siti bilong Korja i bungim ol. Na i gat wanpela liklik grup bilong ol bisnisan i lukluk raun long Papua Niugini i bin givim dispela ol samting i go long spika.

Ol samting ya, bilong kuk, kaikai na ol klos bilong man, meri na pikinini wantaim i kos olsem K400,000.

Mausman na man i stretim rot bilong wok-abaut bilong dispela grup bilong Korea Mista Yun i tok "Bagarap olsem maut-en paia i pairap i save kamap na i nogat wanpela man o samting bai stopim. Tasol i gat wanpela samting yumi olgeta wan wan man-meri i mas wokim long helpim ol manmeri i stap namel long ol dispela kain bagarap. Na dispela, em yumi mas givim helpim long dispela ol lain."



Member bilong Kokopo, Rabbie Namaliu (lephan) i givim tok tenky i go long Korja.

Mista Yun i tok olsem insait long buk baibel i tok olsem sapos wanpela man i sik, o sore long taim nogut na i singaut long helpim yumi tu mas kam na karai wantaim em na yumi mas givim em sampela kain helpim, sapos em i amamas, yumi tu mas amamas.

Olsem na ol pipel bilong Korea i harim kraik bilong ol pipel long Rabaul na ol i bungim na bringim ol dispela samting ol i karim i kam.

Mista Namaliu i bekim toktok bilong Mista Yun na grup bilong em na em i tok olsem olgeta

kantri insait long wol i gat kain kain hevi na bagarap. Korea tu i gat ol dispela kain bagarap wankain olsem Papua Niugini. Dispela kain taim em i taim we ol narapela kantri i save bung wantaim na helpim kantri i kisim bagarap.

Em i tok dispela we bilong helpim i save bringim strongpela wok pren wantaim narapela kantri. PNG i gat strongpela wok pren wantaim Korea pinis long wok tred na invesmen.

Tasol bikpela samting i stap namel long dispela tupela kantri em,

ol pipel. Ol pipel i save givim wok long ol yet na tu i gat bikpela fridom long gavman bilong ol yet.

Na taim ol trabel olsem mauten paia i pairap dispela i save givim planti het pen na yumi save tingting planti long wanem stret yumi bai wokim long stretim o helpim komu-niti na gavman wantaim.

I gat olgeta 500,000 pipel i stap yet long kea senta na Rabaul disasta komiti bai tilim gut dispela ol samting long ol pipel insait long ol kea senta.

## Ol edukesen rifom long Enga no go gut

1 kam long pes 1

Long dispela K130,000, K60,000 em provinsal gavman i givim long 1993, K50,000 long dispela yia, na K20,000 i kam long Wabag Distrik Sevises. Olgeta dispela mani em propvinsal gavman putim go insait long akaun bilong Enga Ensinerig Yunit.

Olpele administreta bilong Enga, Andersen

Aipit i oraitim dispela, na i wok long wetim ol bisnis kampani long kisim kontrak.

Tasol taim gavman bilong Primia Danley Tindiwi i go bek long opis, moa long K90,000 bilong dispela mani em ol i transferim i go insait long opere-sen akaun bilong provinsal gavman.

Tenda bilong wok em provinsal gavman i givim long Moku Pty

Ltd long pinis bilong mun Jun, 1994. Tasol wok i no inap long stat. Bikos mani em gavman i putim i go pinis long narapela rot. Na nau em K40,000 tasol na go daun i stap.

Menesa bilong Moku Pty Ltd i tok em i no inap statim wok long skul. Bikos em i no save sapos provinsal gavman bai baim em o nogat. Na tu wantaim hevi bilong mnai em

kantri i bungim nau, i gat bilip olsem wok bai no inap long stat.

Ol senis o rifom em i mas stat hariap long Wabag Hai skul i stap liklik. Dispela em i namba tri yia bilong ol rifom long skul i kamap. Nau yet ol i senisim o putim bek dispela ol senis long go het tupela taim. Bikos i nogat ol stretpela plen.

Long ol arapela samting, skul fi bilong Wabag Hai skul em ol i

makim long K300 long ol boda studen, na K200 long ol de stude.

Enga provinsal eduke-sen bod i oraitim ol dispela nupela skul fi.

Bod i tok dispela skul fi subsidi em gavman i bin givim aninit long fri edukesen polisi i no inap long ranim wok bilong skul. Olsem na ol dispela nupela skul fi em bod i oraitim long kisim bek inap mani em skul i no bin kisim long dispela yia.

All departments Phone: 25-2500 Fax: 25-2579

**WANTOK** Published Weekly, Thursdays, for Word Publishing Co Pty Ltd

Printed and published by Anna Solomon of Bittern Place, Gordons, at Allot. 4/2, Section 209, Spring Garden Road, Honohu, for Word Publishing Co Pty Ltd

General Manager: Ian Fry  
Company Secretary: Venice Chikler SVD  
Group Editor in Chief: Anna Solomon  
Editor of Wantok: Leo Wahwa  
Advertising Manager: Peter Kalso  
Advertising deadlines  
Display bookings: Monday, midday  
Camera ready copy: Tuesday, midday  
Classified advertising: Wednesday 2 pm

Regional office: Suite 7, Haus Tia, Second Street, Lae PO Box 1726 Lae, Morobe Province Phone/Fax: 42 00 00

District Manager: Zeph Anjai  
Papers distributed by air throughout PNG Available by airmail subscription within Papua New Guinea and overseas Australia & New Zealand Representatives: Tonkin Media Pty Ltd PO Box 101 Avoca Beach NSW 2251 Aust Sydney, James Tonkin, (043) 85 1746 Melbourne, Glen Smith, (03) 807 2311

Word Publishing Co Pty Ltd is owned by the four major churches of Papua New Guinea: Catholic, Wesley, Lutheran, Anglican and United Methodist. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at the office of The Times and are set out in full on the reverse side of its official Display Advertising Booking Form.

# NCD mas gat lokol level gavman: PCMC

**EMILY MATASORORO**  
i raitim

NESENEL Kapital Distrik (NCD) i mas i gat gupela atoriti long makim na lukautim ol pipel long ol komyniti insait long Mosbi siti.

Ol manmeri husat i stap insait long NCD i kam long olgeta hap bilong kantri. Na ol i stap long ol kompaun na setelmen na ol i mas putim kamap eben gavman bilong ol yet. Astingting em long plenim na divelopim siti bihainim ol samting ol manmeri nidim.

Senses (wok bilong kaunim ol manmeri) bilong 1990 i soim olsem 195, 570 manmeri stap insait long Mosbi siti. Senses bilong 1980 i soim olsem Mosbi siti bin i gat 123,624 manmeri olgeta. Namba bilong ol manmeri insait long siti wok long kamap bikpela. Olsem i mas i gat gupela wok bilong plenim

na divelopim taun. Ol setelmen tu i wok long kamap long olgeta hap insait long siti. Olsem na i mas i gat lokol level gavman long givim gavman sevis i go long ol manmeri long setelmen.

Long 1990 Faundesen bilong Lo Oda na Jastis (FLOJ) i karim aut wanpela wok sekap. Dispela wok sekap i painim olsem i gat 39 setelmen olgeta insait long Mosbi. Dispela 39 setelmen-26 i kamap bihainim ol plen na 13-pela i nogat.

Long dispela wok sekap, FLOJ i luksave olsem 106,000 manmeri stap long ol setelmen. Na 89,000 manmeri stap insait long ol kompaun na arapela eria insait long Mosbi siti.

FLOJ i painim aut olsem i gat 300 kalsarel grup, 83 grup bilong ol meri na 139 yut grup insait long ol setelmen. FLOJ i painim aut tu olsem i gat 22 raskol grup.

Polisi Kodinesen Monitoring

Komiti (PCMC) i bin wok long glasim ol samting long kirapim lokol level gavman insait long siti long tupela yia nau. Dispela komiti kamap wantaim tingting bilong kirapim eben lokol gavman kaunsil we i wankain olsem lokol gavman kaunsil long ol rurel eria.

PCMC i luksave olsem sapos ol setelmen insait long siti gat ol lokol level gavman i kamap, dispela bai daunim planti hevi bilong lo na oda insait long siti.

Siaman bilong PCMC, Sir Barry Hallway i tok tingting bilong kirapim lokol level gavman insait long siti moa gupela. Bikos sampela eria insait long siti gat moa long 20,000 manmeri.

"NCD em i wanpela bikpela siti. Na em i mas i gat provinsal gavman-wanpela atoriti long lukluk long stretim hevi olsem lo na oda na maigresen," Sir Barry i tok.

## Man Not Solomons em nupela sief ombudsmen

**PETER KASIA** i raitim

Konstitusen Ombusmen Apoinmen Komiti (COAC) em i makim pinis wanpela man bilong Not Solomons long kamap olsem Sief Ombusmen.

Man ya em Mista Simon Pentanu, husat bipo em i bin wok olsem Kuskus (Clerk) bilong Nesenel Palamen na nau em wok olsem Komisina bilong Pablik Sevis.

Taim em i bin tok aut long dispela apoinmen long Tunde apinun, Praim Minista Sir Julius Chan em i tok Mista Pentanu bai stat wok olsem Sief Ombusmen long stat bilong mun Januari 1995.

"Mi amamas long tokim yupela olsem COAC em i makim Mista Pentanu long holim dispela bikpela wok, husat em i gat planti na gupela wok eksperians pinis long dispela kain wok, olsem em i bin stap 15 pela krismas olgeta taim em i bin sindaun

long dispela namel sia lon Palamen long taim em i bin wok olsem Kuskus bilong Nesenel Palamen," Sir Julius i tok.

I bin gat 16-pela man olgeta husat ol i bin aplai long kisim dispela wok long taim ol CAOC ol i bin sindaun. Dispela CAOC insait long en i gat ol memba olsem Praim Minista, Lida bilong Oposisen, Paia Wingti, Siaman bilong Pemenen Palamen Komiti bilong ol Apoinmen, Sir Michael Somare, Sief Jastis, Sir Arnold Amet, na Siaman bilong Pablik Sevis Komisen, Ila Geno.

Mista Pentanu, husat i gat 45 krismas em bilong Kieta long Not Solomon provins na i marit wantaim tupela pikinini.

"Mipela i makim man i gat planti na gupela eksperians tru long kamap olsem Sief Ombusmen, na mipela bilip olsem em bai karim aut ol wok bilong em gut tru," Sir Julius i tok.

## Lus tingting long tok kros - ToMar

SIAMAN bilong Peter ToRot Komiti long Mosbi, Dominic ToMar, i tok kalsarel na spirituel sait em i bikpela samting we komiti bilong em i lukim long wokabaut bilong Pop i kam long Papua Niugini.

Olsem na em i singaut strong gen long ol komiti we i karamapim tu sios ogenaising komiti husat i redim wokabaut bilong Pop long Mosbi long lusim tingting long ol tok kros. Long wanem em i kolim long

"peti sios politiks" o ol arapela bilas nabaut na wok strong long strongim trupela mining long wokabaut bilong Pop i kam long kantri i go gut.

Mista ToMar i bekim sampela toktok long niuspepa we ol i ripot olsem ol tok kros i kamap bikos komiti i no wanbel long hap long Pop i santuim Peter ToRot.

Peter Torot em i namba wan asples man long kantri long kisim bikpela luksave olsem

wanpela santu. Dispela em i bikpela samting tru na Mista Tomar wantaim komiti bilong em ino amamas long pasin we Katolik Sios ogenaising komiti i mekim long ino givim strongpela tingting long tredisenel na kalsarel velu long santuim Peter ToRot.

Em i tok tu olsem santuim Peter ToRot i makim nupela sapta long histri bilong Katolik Sios long PNG. Na dispela bai i strongim bilip na wok bilong ol

## Yangpela Simon winim top skul awod



• Tisa Billy Aole (lephan) i sekanim yangpela Simon Rex long winim top awod long skul. Het tisa Misis Aprito Anopiso i sanap long namel.

**SAPE METTA** i raitim

PLANTI tausen skul pikinini long Papua Niugini bai i no inap laki long winim ples insait long ol hai skul na koles long neks yia.

Ating sampela bai orait liklik long go kisim moa skul wantaim ol liklik ausait skul olsem CODE. Arapela husat famili bilong ol i save hat long painim moni bai i no gat sans moa long arapela skul samting.

Wanpela o tupela manki bai laki long painim wok wantaim ol kampani o wantaim ol gavman dipatmen. Na ol planti arapela bai go bek long ples o stap nating wantaim mamapapa long haus.

Bikpela askim nau em olsem wanem long planti skul pikinini ya husat i gat save long lainim ol samting tasol spes long hai skul i

sot? Sindaun bilong ol long bihain bai olsem wanem?

Wanpela laki studen husat bai wokim gret 7 bilong em long Goroka Hai Skul long neks yia em Simon Rex bilong Westen Hailans provins.

Long 1990, Simon i bin go skul long Wes Goroka Komyuniti skul taim em i gat 11-pela krismas. Long dispela taim, Simon i save wokhat tru long skoarim gupela mak long skul i kam.

Olsem na long hatwok bilong em, em i kamap top studen long gret 2 na long ol arapela yia i kam, em i wokim long skoarim ol gupela mak long tes bilong em inap gret 6. Simon i bin skoarim gupela mak tru long gret 6 tes bilong em long Inglis, Maths na arapela skul stadi.

## Ol yunien no inap stap wok

SEKETERI bilong Leba na Emploimen, Aph-meledy Joel i gat strongpela bilip olsem pasin bilong ol yunien grup long kirapim ol straik na stop wok bai no inap kamap.

Long taim kantri i bungim bikpela hevi wantaim mani, ol yunien grup i no mekim wanpela stap wok bikos ol i save olsem gavman i no gat mani nau long harim hevi bilong ol.

Mista Joel i tok amamas i go long ol lain bilong tred yunien grup long kamapim gupela

tingting na luksave long dispela hevi bilong gavman na kantri.

"Mi kirap no gut olsem ol tret yunien i no yusim dispela kain taim long pait long ol wari blong ol, na dipatmen bilong mi i luksave long dispela gupela pasin bilong ol", em i tok.

Dispela wok bung wantaim ol tret yunien i kamapim i mas kamap yet long wanem gavman bai i no gat gupela rot long helpim husat long toktok wantaim. Sapos ol i tingting long karim gavman i go long kot o long stapim

wok bai gavman i kisim taim tru.

Olgeta liklik helpim Leiba dipatmen i save givim i stop bihainim tasol dispela hevi bilong moni em gavman i bungim.

Tasol, Mista Joel i tok dispela hevi i no stapim dipatmen olgeta long mekim olgeta wok bilong em. Long wanem ol namba wan wok olsem kamapim gupela wok na pasin wantaim ol tret yunien i mas stap yet na tingting bilong dipatmen long kamapim gen trening.



# WANTOK

NIUSPEPA BILONG OL PAPUA NIUGINI STRET

## Senis mas kamapim' gutpela sindaun

Konstitusene Rivyu Komisin (CRC) i givim pinis ripot bilong em i go long Nesenel Eksekutiv Kaunsil (NEC). Na NEC i warkurai long dispela ripot long dispela wik.

Astingting bilong dispela ripot em long kamapim sampela bikpela senis long provinsal na lokol level gavman insait long kantri. Bikos provinsal gavman sistem bilong nau yet i no kamapim gutpela samting. Na tu gavman i save spenim bikpela mani tru long ranim dispela sistem.

Ol provinsal memba na pablik sevan long wanwan provins i mas kisim dispela senis wantaim pasin bilong belisi na amamas. Bikos dispela senis bai kamapim hevi long ol. Tasol ol i mas luksave olsem gavman i tingting long ol pipel na i laik kamapim senis.

Long sait bilong gavman, em i mas karim aut wok long lukim olsem trupela senis i kamap. Na ol pipel i ken lukim olsem gavman i gat trupela tingting long helpim ol. Senis i kamap long helpim na stretim sindaun bilong ol pipel long ples, taun na rurel eria. Bikpela tru ol pipel long rurel eria na ples. Aninit long senis, ol i mas kisim gutpela sevis bilong gavman. Na sindaun bilong ol long ples i mas kamap gutpela.

Arapela samting i olsem olgeta memba long nesenel Palamen i mas toktok. Olgeta i mas putim han, tingting na sapot wantaim. Na givim helpim i go long gavman na CRC long kamapim senis.

# Wok bilong stretim Bogenvil go het isi

PETER KASIA i raitim

WOK bilong stretim ples na sindaun bilong ol pipel long Bogenvil i go het isi nau. Bikos long hevi nesenel gavman i gat long nogat o sot long mani.

Dispela em tok bilong Edministreta bilong Not Solomons Sam Tulo taim em i bekim ol tok tok we wanpela bisnisman long Wakunai eria, Sam Akoitai mekim las wik.

Mista Akoitai sutim tok long Mista Tulo long westim nating bikpela hap mani long liklik ailan Buka. Olsem na em (Akoitai) i bin putim askim i go long gavman long rausim Mista Tulo long wok bilong em. Na larim John Siau i kiism ples bilong em. Mista Siau i bin holim wok olsem provinsal seketeri bipo long ol i rausim em long mun Disemba

long 1993.

Tasol Mista Tulo i tok edministresen bilong em i gat polisi long helpim ol wok na pipel long bikples Bogenvil. Dispela em long lukim olsem ol lain long ol kea senta i kisim inap kaikai, marasin na ol arapela samting ol i nidim long stretim sindaun bilong ol.

"Dispela i karamapim tu ol sevis olsem helt na edukesen. Na i min olsem edministresen i givim bikpela tingting pastaim long laip na sindaun bilong ol pipel long bikples Bogenvil," Mista Tulo i tok.

Em i tok tu olsem em i sori man olsem Mista Akoitai mekim ol kain toktok i no stret na i gutpela long em i painim trupela as pastaim long em i autim ol dipela kain toktok.

# Ol meri mas kisim kos long kukim kaikai na salim long maket

ALOYSIUS SAMI i raitim

OL meri husat i save salim ol kaikai tan pinis long Buka maket bai gat ID kat bilong ol. Dispela bai soim olsem ol i kisim kos na skul long kukim gut ol kaikai olsem skon, ban, bret na donat. Na ol i gat rait long salim dispela ol samting long maket.

Long nau yet, opis bilong provinsal helt eduketa na Buka Taun Atoriti kisim nem bilong 30 meri husat bai kisim kos bilong skruim save long kukim ol gutpela kaikai na salim long maket.

Helt eduketa, Reuben Tokome i tok bihain long ol meri kisim kos na ol i gat ID kat, ol helt opisa na taun atoriti bai was gut na sekap long ol meri husat salim kuk kaikai long maket. Sapos ol i nogat ID kat na tu ol i no karamapim gut ol kuk kaikai, ol sekyuriti bai rausim kaikai bilong ol. Na tu ol inap sasim ol aninit long lo we i tambu long salim kaikai nogut.

Helt inspekta long Buka taun, Billy Ketsian i wok long kisim nem nau bilong ol meri husat i gat laik long kisim kos bilong kukim gutpela kaikai.



Isi liklik ya...Sampela yangpela meri Buka i mekimsave long samsam long stall bilong Solomon danis. Dispela em long greduesen seremoni bilong Hutjena haiskul. Foto: Aloysius Sami.

## Hutjena haiskul bai kamap nesenel haiskul

GAVMAN i gat plen nau long wokim Hutjena provinsal haiskul long Buka i go kamap olsem wanpela Nesenel haiskul.

Minista bilong Haia Edukesen, Saiens na Teknoloji, Moi Avei tokim moa long wan tausen pipel na ol sumatin long Hutjena haiskul long tripela wik i go pinis. Dispela em long greduesen seremoni bilong 159 gred 10 sumatin i greduet na kisim setifiket bilong ol.

Long wokim tok bilong em i karim kaikai, Mista Avei tok ol papamama long ol yia i kam i gat bikpela wok tru long mekim long helpim skul bilong ol long kamap bikpela. Na i gutpela long ol pikinini bilong ol i sindaun na kisim gut save.

Minista Avei tokim ol papamama olsem i nogat wanpela skul i fri long dispela kantri. Dispela i bihainim ol polisi we edukesen sistem long dispela kantri bihainim. Ol papamama bai i mas baim sampela hap mani go long ol skul bilong ol pikinini.

# Komiti sekap long hombru bia long Buka

WANPELA grup long Buka i pinisim wanpela wok sekap pinis long pasin bilong dringim hombru bia. Long wankain taim, dispela grup i putim kamap wanpela ripot bihainim dispela wok sekap.

Ol risos opisa bilong Buka Interim Atoriti na Bogenvil Pis Komiti bin karim aut dispela wok sekap long Buka Ailan na ol arapela liklik ailan klostu. Dispela wok sekap i kamap bihainim ol ripot olsem bikpela bagarap tru i kamap nau long komyuniti long pasin bilong dringim hombru o bia ol man i wokim long stail na we bilong ples.

I gat luksave i stap olsem i no ol yangpela long ples tasol i dringim hombru. Sampela memba bilong sekyuriti fos na ol gavman opisa tu i wok long dringim dispela bia bilong ples.

Ful ripot i no kamap yet. Tasol Wantok Niuspepa i kisim toktok long dispela samting i karn long wanpela risos man bilong komiti Robert Taputa.

Komiti bin kisim tingting bilong planti pipel na i painim aut olsem sampela bikpela as long ol pipel i dringim hombru long Buka em long :  
• autim wari long politikel wok. Bikos gavman i mekim planti giaman promis i go long ol pipel long ol wok kamap. Planti pipel husat i autim tingting bilong ol long wok sekap i

laikim gavman long luksave olsem sik bilong hombru i no bilong ol pipel long ples. As bilong sik i stap long gavman long wok politik.

• Narapela hevi em long sait bilong mani. Bikos i nogat mani long baim dring bilong stua na ol yangpela i wokim strongpela dring bilong ol yet. Tasol i gat tambu yet long kisim bia na ol strongpela dring i go long provins. Asua bilong haitim ol strongpela dring i kam long ol narapela senta i kamap bikpela nau.

• Planti manmeri laikim tambu bilong kisim bia na ol arapela strongpela dring i go insait long Bogenvil i pinis. Na ol man i ken dringim bia ol i wokim long faktori.

Long wankain taim tu, Kodineta bilong Buka Katolik ol Meri, Helen Hakena i no amamas komiti nogat wanpela meri long makim maus bilong ol meri.

Misis Hakena i tok ol meri gat rot we ol i ken winim tingting bilong ol man long go isi. Na tu luksave long ol man olsem ol i no ol samting nating na ol i wok long dringim hombru we i ken bagarapim laip bilong ol.

Em i tok tu olsem asosiesen bilong em i egensim tingting bilong kisim bia na ol arapela strongpela dring i go long ailan. Olsem na ol bai holim wanpela bung long kisim tingting bilong ol meri, glasim na skelim ol hevi.

# WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO  
telepon Namba: 25 2500  
Feks Namba: 25 2579

PE BILONG  
WANPELA YIA  
52 NIUSPEPA

PLES	AIR
Mosbi	K30.00
Arapela PNG eria	K60.00
Australia na NuSilan	K92.00
Esia pasifik na Japan	K123.00
Amerika na Yurop	K180.00



# Ol Simbu laikim K754,000 kompensesen mani

MICHAEL KOMA i raitim

OL pipel bilong Kamare wan-pisin long Juave distrik bilong Simbu provins i givim nesanel gavman inap tumora long givim ol K754,000 long graun i bruk long eria bilong ol.

Mausman bilong ol pipel, Andrew Kaupa i tok ol pipel i redi long pasim Okuk haiwe namel long Juave na Kundiawa, sapos gavman i no bekim askim

Sapos nogat bai ol i pasim Okuk haiwe long dispela wik Fraide

bilong ol.

"Mipela laikim kompensesen mani bikos hap bilong Okuk haiwe namel long ples You'll na Membimangi em graun i bruk na

bagarapim pinis. Na ol ka i yusim nau wanpela liklik rot bilong mipela olsem haiwe bilong ol," Kaupa i tok.

Em i tok mak bilong mani em ol papagraun yet i no makim. Tasol ol bikman bilong gavman long Juave i makim.

Mista Kaupa i tok graun i bruk long mun Ogas, 1994, na bagarapim ol gaden kaikai, na sampela haus kapa bilong ol pipel long Kamare.

# Primia Anisi rausim Edukesen potpolio long namba tu bilong em, Apiningi

GODFRIED YASSAFAR i raitim

INSAIT long Is Sepik provinsal asembli, memba bilong Ambunti konstituensi em Martin Apiningi.

Mista Apiningi holim posisen olsem namba tu primia (Primia-Alex Anisi) na tu Provinsal Minista Bilong Edukesen.

Tasol long dispela wik Mande, Disemba 19, bikbos bilong Mista Apiningi, Primia Alex Anisi rausim taitel bilong provinsal Edukesen minista long Mista Apiningi.

Wantok i no inap long kisim toktok bilong Primia Anisi long watpo na em i rausim dispela taitel long memba bilong Ambunti. Tasol ripot Wantok Niuspepa i kisim long Wewak i olsem Primia Anisi rausim taitel ya long

namba tu bilong em long ploa bilong provinsal asembli long dispela wik Mande.

Dispela ripot i tokaut olsem long Mande, provinsal asembli bin bung long holim kibung long warkurai long provinsal baset bilong arapela yia. Long dispela taim, memba bilong Numbo konstituensi na tu namba tu Oposisen Lida Peter Sarea i tokaut olsem Oposisen bai putim kamap mosen bilong vot i nogat bilip long Primia Anisi wantaim gavman bilong em long mun Mas logng arapela yia (1995).

Bihainim dispela toksave bilong Oposisen, Mista Sarea i tokim provinsal asembli olsem taim Oposisen i

putim kamap dispela vot i nogat bilip, ol bai makim namba tu primia Mista Apiningi olsem primia.

Bikos long dispela toksave bilong Oposisen we memba bilong Numbo Mista Sarea i givim, Primia Anisi skelim tingting i go nogat na rausim taitel bilong Edukesen minista long namba tu bilong em.

Bihain long provinsal asembli pasim baset bilong arapela yia, Spika Greg Kibai surukim taim bilong provinsal asembli bung gen i go long mun Mas long 1995. Long sait bilong mosen bilong vot i nogat bilip long Primia Anisi, i gat luksave i stap olsem sapos Oposisen i laik winim dispela mosen, em i mas wok moa hat. Bikos long nau yet, Oposisen

i nogat inap namba long win sapos ol i go het na putim kamap dispela vot i nogat bilip long Anisi.

Primia Anisi no wari o tingting tumas long dispela toksave bilong Oposisen. Bikos em i luksave olsem em i gat namba long rabisim dispela toksave sapos Oposisen i go het na putim kamap vot i nogat bilip long em.

Arapela bikpela samting i olsem aninit long Mama Lo bilong provins na lo bilong provinsal asembli, Oposisen i mas putim kamap dispela vot i nogat bilip bihain long 14-pela de bihain long em i toksave. Dispela i min olsem Spika Greg Kibai mas putim kamap wanpela spesel bung bilong provinsal asembli long amamasim dispela mosen bilong Oposisen.



## Lina kisim konfemasio long Ambu

• Yangpela Mis Lina Kawa (namba tu long lephan) i kisim konfemasio na kandre Matulu Calebe i sekan na amamasim em. Tupela anti, Yanam Baimo and Tawasiwe Gai i kamap tu long Ambo Lutheran Sios lotu long lukim Lina na ol arapela yangpela i kisim konfemasio. Dispela em long tupela wik i go pinis.

Poto: Zeph Aigal.

## 1995 skul fi long Not Solomons bai wankain olsem ol arapela provins

LONG 1995, ol skul insait long Not Solomons provins bai i peim ol skul na prosek fi, olsem ol arapela skul long kantri.

Long ripot we provinsal Edukesen Plena, Aaron Pita, i givim long taim bilong greduesen long Hutjena Provinsal Hai skul sumatin, ol sumatin husat bai kamap boda long hai skul insait long ol Bogenvil bai peim K300 skul fi na K65 prosek fi wanwan. Ol de hai skul sumatin i peim K170 skul fi na wankain prosek fi olsem ol boda studen.

Ripot i tok insait long tupela kain fi hia, tu tets (2/3) sistem bai kamap. Dispela i min olsem sapos wanpela

papa i gat moa long wanpela pikinini i stap long hai skul, nambatu na nambatri bai i peim 2/3 long K300 sapos ol i boda. Na 2/3 long K170 sapos ol i de sumatin.

Long ripot bilong ol komyuniti skul na ol arapela, Mista Pita i tok ol komyuniti skul sumatin bai i peim K12 skul fi na K20 olsem prosek fi long wan wan sumatin, Viles Tok Ples Skuls (VTPS) K10 skul fi na K3 prosek fi, ol boda long Speselais Trening Senta, K100 skul fi na K30 prosek fi na ol de sumatin long wankain skul, K4 skul fi na K30 prosek fi.

# Ol pipel long ples Pachen gat wara saplai nau

ADDY LAVAKS i raitim

LONG Fraide Desemba 17, 1994 wanpela bikpela opening seremoni i bin kamap long ples Pachen long Is Yangoru distrik bilong Is Sepik provins.

Dispela bikpela opening seremoni i bilong amamas long nupela wara saplai skim projek provinsal gavman, ol pipel bilong ples Pachen yet na Yuropien Ekonomik Komyuniti (EEC) i bin givim bikpela helpim na sapot long wokim kamap.

Planti bikpela manmeri na ol hetman bilong EEC, provinsal gavman na yut opis long Is Sepik i bin kamap long bung wantaim ol lida bilong 6-pela ples na distrik na lukim dispela dispela opening seremoni bilong nupela wara saplai.

Dokta MacRae, hetman bilong EEC long Mosbi i kamap long opim dispela wara saplai. Ol grup na ogenasisen husat i givim helpim na putim moni long wokim dispela wara saplai i kamap na pinis em, ol pipel bilong ples Pachen yet wan-

taim provinsal gavman na EEC.

EEC i putim K6,642,00, provinsal gavman i baim ol samting bilong ol wokman, na tu baim ol wokman wantaim K3,200, na ol pipel bilong ples Pachen yet i bungim moni long helpim tu dispela wok wantim K3,200.

Dispela seremoni i pulim planti pipel bilong Is Yangoru klostu na longwe wantaim long kam na lukim.

Siaman bilong Husena Yut grup, Mista Husiembe i tok em i amamas tru long lukim olsem Husena yut grup, wanpela las yut grup insait long Is Sepik provins i wokhat tru long wokim kamap kain bikpela wokwantaim tingting na helpim i kam long EEC.

Provinsal minista bilong Viles Sevises na Lokol gavman, Eric Wangihau, Seketeri bilong Is Sepik dipatmen, Bella Sell'oni, provinsal plena Francis Sumanop i bin autim planti bikpela toktok liklik long tok tenkyu na tok amamas i go long ol pipel long gupela wok bung bilong ol wantaim Husena yut Grup.

Ol i tok tu olsem i no ol tasol i kisim kain helpim olsem i

kam long nau bilong EEC. EEC i bin givim bikpela helpim pinis long planti hap insait long Papua Niugini.

Ol provins we EEC i putim kamap ol kain wok olsem em Millen Be, Madang, Is Nu Briten, Manus na Is Sepik. I no longtaim bai EEC sanapim ol wankain helpim wok long hailans rijon.

Ol hetman bilong provinsal gavman i tok EEC em i wanpela ogenasisen husat i save painim hat taim long ol sevis bilong gavman.

Wanpela strongpela tok tu ol hetman bilong provinsal gavman i givim i go long ol pipel bilong ples Pachen na ol arapela ples em olsem samting ol i laikim na ol i wokim kamap pinis. Na ol pipel yet i no ken traim long bagarapim.

Dokta MacRae i tok ol pipel i bin bung wantaim long wokim dispela wok i kamap wantu stret. Na ol i brukim rekot long wokim hariap dispela wara saplai long long tripela mun na wanpela de.

Na long ol arapela senta na ples insait long Is Sepik na ol arapela provins ol i save kisim longpel ataim long pinisim ol kain wok projek olsem.

Dispela ol wok projek EEC i wok long ranim nau i no wanpela samting bilong pilai tasol i bilong halivim na wokim sampela hatwok long laip bilong pipel long ples i isi liklik.

Moa long 360 ples insait long Is Sepik provins yet i stap aninit long program bilong EEC long karimaut ol dispela wok projek bilong en.

Dokta MacRae i tok tu olsem EEC i no inap wokim ol dispela projek nating, em i mas kisim helpim i kam long provinsal gavman na ol pipel yet long karimaut wok bilong ol. Na Pachen Ples i soim gupela wok bung namel long ol pipel, ol lida manmeri, yut grup na provinsal gavman long kamapim tru ol dispela kain wok projek.

Em i tok tu olsem dispela em i wanpela gupela wok tru EEC i wok long wokim nau insait long ol ples na komuniti bilong Papua Niugini.

Mipela i wokim ol dispela wok projek tasol mipela i no haitim tingting na save bilong wokim ol dispela saming.

## Ol BRA long saut Bogenvil haitim yet ol gan

WANPELA bikpela samting we i no kamap long ol pis seremoni long Saut Bogenvil em long ol lain Bogenvil Revoluseneri Ami i no karim i kamaut long ples klia, tromoi o kukim ol gan na ol arapela samting bilong pait.

Man husat i lukautim wok bilong kisim kaikai long ol kea senta long Buin distrik, na tu wanpela memba bilong Telei Interim Atoriti, John Napi i tok tupela kain tingting i stap nau long stretim dispela samting.

Em long : • wanpela pis seremoni long stretim dispela i mas kamap yet. Tasol ol sekyuriti fos memba, ol sief long ples na komyuniti na ol BRA i mas sindaun paitim toktok long dispela samting.

• Ol lain BRA i pret long lusim ol samting bilong pait na ol i holim yet ol samting bilong pait long lukautim skin bilong ol.

Dispela i kamap bikos ol i pret yet long ol pipel na ol sekyuriti fos. Nogut pasin bilong bekim i kamap long sampela samting we i kamap long taim bilong bikpela hevi long Bogenvil.

Mista Napi i tok ol lida long Buin wantaim ol BRA i wok long bung na toktok long ol dispela samting nau.

Long ol arapela nius, Mista Napi i wari long ol pipel bilong em husat i stap long ol kea senta long Solomon Ailans, na long ol ailan klostu long boda mak.

Samting olsem 500 pipel bilong ol ples klostu long nambis long Buin i stap long ol Sotlan Ailan insait long Solomon Ailans. Na 300 moa i stap long Taurato Ailan.

## TU MINIT TINGTING

### PASIN TRU BILONG KRISMAS

LONG taim bilong ol tumbuna i no gat krismas, long wanem, i no gat ol Kristen i stap yet. Pas-taim Krismas em i min wanpela taim bilong pilai, singsing na amamas. Long Krismas De ol wokboi bilong gavman na ol misin i save wokim ol kain resis na pilai na winim ol prais na kisim bikpela kaikai. Long tok pisin bipo, krismas em i min pati. Bihain long planti waitman i bin kamap long PNG, yumi kisim pasin bilong ol long givim presen long Krismas. Nau yumi tu i gat dispela pasin. Tasol tude namel long ol waitman na namel long yumi tu, dispela pasin bilong givim presen long Kris-mas em i wanpela trik tasol. Tude yumi no save givim presen tru. Nogat. Yumi save senisim presen.

Pasin bilong senisim kain kain samting em i wanpela kain bis-nis tasol. Yu givim wanpela samting long mi, na mi givim wanpela samting long yu. Orait, nau yu save skelim gut presen bilong mi. Sapos yu ting presen bilong yu, bai yu kros. Long wanem, tupela presen i no ske-

Yu lukim: em i pasin bisnis tasol. Presen tru em i min, mi givim liklik hap bilong mi i go long yu. Mi yet mi mas stap insait long presen. Sapos mi givim wanpela presen, mi yet mi mas pilim liklik pen. Presen tru i min: mi tekewe samting mi laikim na mi givim nating long yu. Em i presen tru. Mi no wari liklik long yu i mas bekim. Nogat. Mi no laik yu bekim. Mi laik yu mas kisim tasol, osem wanpela liklik hap bilong mi yet.

Dispela kain presen tasol i makim Krismas, we Jisas i bin lusim heven na kamdaun osem wanpela liklik bebi nating. Na em i kam bilong givim laip bilong em olgeta long helpim yumi. Em i presen tru.

Pasin bilong giv nating, em i no stap long kastam na pasin tumbuna bilong PNG. Yumi tu i save senisim presen tasol. Maski yu givim wanem samting long mi, yu save pinis bai mi mas bekim long wanpela de. Bekim presen em i no pasin tru



FRANK MIHALIC i raitim

bilong Krismas; em i bisnis tasol.

Nau mi laik wokim wanpela stori bilong soim osem wanem na pasin bilong giv nating, em i save helpim yumi; na pasin selpis em i mekim laip bilong yumi i sting. Mi laik kisim stori bilong mi long Baibel. Yu opim Buk Baibel bilong yu na yu painim wanpela mep bilong

graun i stap long ol las pes bilong buk.

Bai yu painimaut olsem: long mep bilong kantri bilong Jisas i gat tupela raunwara i stap. Wanpela em i Raunwara Galili na narapela em i Ded Si.

Orait, nau yu lukim gut. Wara Jodan i kirap longwe long Raunwara Galili na em i ron i kam na i go insait long ranwara long hap antap bilong em; na bihain em i kamaut bek long hap daun-bilo bilong en. Nau Wara Jodan i ron moa na i go daun long Ded Si. Tasol nau em i no kamaut moa. Nogat. Em i kalabus i stap olgeta.

Sapos tude yet yu go visitim asples bilong Jisas, bai yu lukim olsem: Raunwara Galili em i gat wara i kol, na i kliia, na i swit, na i pulap long pis, na planti pipel i laik swim long en. Tasol Ded Si em i dai pinis, na i sting, na i pulap long sol, na i no gat wan-pela pis i swim insait long en. Em i pulap long pipia wara tasol.

Orait, nau yumi askim: watpo

dispela sem Wara Jodan i go insait long tupela raunwara ya, na wanpela i gat switpela wara, tasol narapela i gat wara i sting olgeta? Em i bikos Wara Jodan i go insait long Raunwara Galili na raunwara ya i yusim dispela wara, na bihain em i salim em i go moa, bai ol arapela i ken yusim tu.

Em i no selpis. Tasol Ded Si i holim pasim Wara Jodan, na em i no inap go moa; em i kalabus i stap. Ded Si em i selpis. Na bilong dispela na em i sting.

Yumi tu i wankain. Sapos yumi gat gutpela samting na yumi no pasim, tasol yumi larim ol arapela pipel tu i yusim, dispela i mekim yumi i kamap switpela na gutpela. Tasol sapos yumi selpis na yumi pulim ol samting i kam, na yumi holimpasim bilong yumi tasol, orait, yumi selpis. Na laip bilong yumi bai sting.

Em i skul bilong Krismas sapos yu giv tru long God na long ol arapela pipel, bai yu kamap gut na swit. Sapos yu holimpasim olgeta samting bilong yu tasol, yu selpis, na bai laip bilong yu i sting.

## Ol Siasi meri holim namba wan kibung long Giam peris

ZEPH AIGAL i raitim

LONG las Ista, klostu 500 meri bilong Siasi, Morobe provins i bin kam bung long namba wan kibung bilong ol long Giam Komyuniti skul. Ol meri insait long kibung i makim wan-wan peris. ELC-Siasi

Distrik i bin gat 16 peris long dispela kibung. Nau tasol Umgon peris i kam na i go mekim 17 olgeta.

Long dispela taim, Misis Galiki Mesa, siameri bilong Morobe Provinsal Wimens

Kaunsil, wantaim tupela kaunsil memba bilong Wau na Menyamy, na Mis Tapen Seseta, eksekutiv opisa, Morobe Provinsal Wimens Kaunsil i stap.

Ol dispela bikmeri i kamap long givim sampela toksave bai ol Siasi meri i ken kamap

memba bilong Provin-sal Wimens Kaunsil. Komprens bilong ol meri i bin kamapim sampela nem pinis.

Kibung bilong ol meri i bin ran gut. Misis Martha Aisi wantaim ol wanwok bilong em i bin go pas long givim Baibel, na ol lotu long moning na nait. Wan-

pela sista long Semo Helt Senta, Misis Helen Aigal i kam givim stadi long famili plening.

Ol manmeri bilong Aramot i bin lukautim komprens bilong ol meri. Komprens i pinis wantaim lotu bilong Holi Komunio. Ol arapela husat i bin helpim long mekim dispela kibung i kamap gut em: 1. Giam Komyuniti skul hetmasta long larim ol meri i yusim

skul; 2. Ol yangpela man-meri o yut bilong Aramot (Giam peris) long ol singsing na pilai drama; 3. Ol Bamler yut bilong Yangla;

4. Ol yut bilong Lablab peris long ol singsing; 5. Ol yut bilong Barim i kam wantaim ol deliget; 6. Misis Galiki Mesa long givim K100 done-sen; na

7. Siasi Distrik Welfea Opis long wanpela dram zoom.

ELC-Siasi Distrik Meri Komprens i kamap bihain long olgeta tupela yia.

Kibung i bin makim Misis Everlyne Geseng i kamap siameri na Misis Cathleen G. Timothy i kamap seketeri. Na kibung i bin pinis wantaim amamas na olgeta i lukluk long bung gen long neks yia, 1996.

## Wol Visen wokbung wantaim gavman na ol NGO

FRIEDA KANA i raitim

WOL Visen bai i wok bung wantaim gavman na ol Non Gavman Ogenaisesen (NGO) insait long Papua Niugini long sevim ol pipel husat i stap longwe long taun.

Long lukim olsem ministri bilong em i mekim gutpela wok long komyuniti, Wol Visen i mas gat gutpela wokbung wantaim ol gavman dipatmen.

Olsem na long tupela wik i go pinis, tupela wokman bilong Wol

Visen i bin sindaun long wanpela trening woksop wantaim ol arapela gavman opisa long Madang. Nesenel Stetistiks Opis (NSO) long Mosbi i bin ranim kos ya. Namel long 20-30 pipel long dipatmen bilong Madang i bin sindaun long dispela kos. Dispela em long skruim save bilong ol long yusim 1990 ripot long Nesenel Populesen, Hausing na Sensus. Na ol i ken yusim save

long plenim ol wok prosek long provins.

Tupela wok manmeri long NSO i bin kodine-tim kos. Em long Rita Pala na Keith Ronga. Ol i skulim ol kos patisipen long rot bilong kisim infomesen long dispela buk na tu raitim ol prosek ripot.

Tupela opisa bilong Wol Visen long kos, Mathew Hapoto na Clement Kauwi i tok buk ya i gutpela tru bikos ol infomesen i stap long em bai i helpim tru ol long wokim ol komyuniti developmen prosek.

Em i nambawan taim

long kain kos i kamap long provins. Morobe na Sauten Hailans provins i sindaun pinis long wankain kos long dispela yia.

Bikos long sampela opisa bilong ol i sindaun wantaim ol gavman opisa bilong Madang long dispela kos, Wol Visen i pilim olsem gutpela wok bung bai i go het nau namel long ol na gavman. "Yumi wok long komyuniti long sevim ol pipel long Madang. Olsem tasol na i gutpela long yumi i wok-bung wantaim," tupela opisa i tok.

## POS greduet stadi i mas kamap long Martin Luta Seminari;

GAVANING Kaunsil bilong Martin Luta Seminari i laikim kolis long kirapim pos gre-duet stadi long sem-ineri. Dispela em long ol sumatin i ken wokim Mas'as na doktr'et bilong ol long Tioloji long hap tasol.

Siaman bilong Sem-ineri, Wilson Waesa i mekim dispela singaut long namba 24 greduesen bilong seminari, long Sande Disemba 11.

Mista Walesa i tok em i sori long lukim olsem

long nau yet, ol sumatin i mas go ausait long kantri long wokim ol pos greduet stadi bilong ol. Na dispela ino luk gut bihain long Papua Niugini i kisim independen, klostu 20-pela krismas i go pinis.

Em i sutim tok long Evanjelikal Lutheran Sios Kaunsil long pasin ol i wokim long no givim bikpela sapot i go long ol lain husat i laik go hetim ol stadi bilong ol.

Em i tok tu olsem sios

i laikim ol manmeri wantaim diploma long kristen edukesen, pas-toral stadis na humen developmen long go hetim gut wok long sios.

Sapos inogat ol pipel wantaim bikpela save long seminari, bai i hat tru long sios long kamapim ol gutpela wokman long sait bilong tioloji na menesmen.

Mista Waesa i tokim ol sumatin olsem em i laik lukim ol dispela bikpela kos i kamap

long skul bipo long yia 2000.

Em i bilip tu olsem Lutheran Sios i mas kamapim moa pasto husat i pinisim bikpela skul na ol i gat gutpela save long Tioloji.

Olsem na em i askim seminari long wokim wanpela kos long dispela samting na ol pasto wantaim ol gre-duet i ken bihainim. Bikos ol wok manmeri long sios i ken yusim save na ekspiries bilong ol long go hetim strong wok bilong sios.



• (antap) - Ol yangpela o yut bilong Aramot Insait long Giam peris i bung long singsing.  
• (daunbilo) - Na bihain ol i putim kamap wanpela pilai drama i makim Indai bilong Jisas Krais long kruse.



## Krismas toktok bilong Katolik Asbisop long Mosbi

KRISMAS toktok i kam long Asbisop bilong Mosbi Katolik Asdaosis, Sir Peter Kurongku.

Hettok: "Tok bilong God i kamap Man na em i kam stap namel long yumi" (GENESIS 1: 14 - Dispela tok em Jisas.)

Dispela i min wanem samting?

Dispela em samting we i narakain long ol Kristen lotu na ol arapela lotu. Em long God yet i kamap wanpela long yumi taim em i salim pikinini bilong em Jisas long kam daun long graun na kamap wanpela long yumi.

"Em i kamap man olsem yumi.... na em i kisim Gutnius i go long olgeta kantri. Na ol pipel i bilip long em." (1 Timoti 3:16)

"Pikinini bilong God i kamap wanpela man olsem yumi. Em i bungim ol samting we yumi ol man long graun i save bungim. Em gutpela taim na taim nogut. Na bihain em i dai long bekim ol sin

bilong yumi. Tasol planti i no laik bilipim dispela samting. Na ol i stap olsem ol i no bilip long samting ya i kamap tru."

"Long kain wok bilong ol, yupela bai i save long ol."

Wanem ol taim nogut kantri i bungim tude?

• pait long winim politikel pawa

• i no lukautim gut pablik mani

• pe bilong ol kaikai na ol arapela samting i go antap

• paul pasin long olgeta level bilong gavman na

• ol hevi bilong lo na oda long kantri i go antap moa yet.

Dispela i min olsem sindaun bilong ol pipel igo nogut. Long sait bilong helt, edukesen na ol arapela samting we i rait long ol pipel yet long i gat i wok long go nogut tru.

Long wankain taim tu, yumi no lukim wanpela sakrifais i kam long ol lida bilong yumi. Planti long ol lida ya i gat planti samting pinis na

ol i sindaun amamas i stap. Olsem wanem, yupela ol lida inap go pas long soim gutpela pasin? Rausim dispela sias fan we yupela ol Palamen memba i save kisim long olgeta yia. Dispela em gutpela as long ol lida i statim sakrifais bilong ol.

Wanpela long ol bikipela as we kantri na ol pipel i bungim hevi long dispela taim em paul pasin na tu, wantok sistem. Mani i lus nating, gavman i peim bikipela mani long ol wok kontrak na tu, long ol kontrak opisa bilong ausait. Ol aset bilong kantri tu i wok long pundaun long han bilong ol poroman bilong ol bikman. Na dispela em long amamasim ol, i no long ol i baim trupela mak long mani we inap long pe bilong ol samting.

• Watpo na yumi i kisim ol dinau mani long ol bikipela ausait kampani?

• Watpo yumi larim ol leba wokman i kam



• Sir Peter Kurongku

ausait long kantri taim yumi gat ol pipel bilong yumi yet long PNG inap wokim ol wok?

• Watpo yumi lusim mani taim yumi givim takis diskaun long sampela ausait kampani long ol wok we yumi ino inap tromoi bikipela mani long en?

Dispela em ol samting i stap long tingting bilong planti pipel long kantri. Na ol dispela samting tasol i kamapim hevi na bel kaskas long laip na sindaun bilong planti pipel. Moa hevi yet bai i kamap long ol famili na ol wan wan man tu taim ol i nogat wok long kisim mani long em.

"No ken stil" (Eksodus 20:15)

Long dispela Krismas, yumi askim Jisas Kraus, em Tok long kam insait long laip bilong yumi, moa yet long ol lida. Na yumi ken kamap ol wokmanmeri bilong ol pipel na i no ol pipel i sevim yumi.

Tingim, wanem bikipela senis inap kamap long PNG sapos yumi olgeta i tok: "Hia nau Lod, mi kam long mekim wok yu laikim mi long mekim."

Peter Kurongku DD KBE  
Asbisop bilong Pot Mosbi.

## Skotlan Baibel skul sumatin greduet

OL KAIN sik we i kamap long sosaiti nau i laikim ol pipel olsem yupela long wok hat, glasim na stretim. Em ol sik we i kamap bikipela nau olsem brukim marit, stil pasin, marit ausait long loa bilong sios na ol arapela samting ino stret we hevi long Bogenvil i kamapim.

Dispela em hap long ol toktok we Asisten Edministretiv Seketeri na wanpela sios lida long Buka, Aaron Rigamu i mekim long ol sumatin taim ol i greduet long Allan Crop Baibel skul long Skotan, long not wes Buka.

Eiti faiv sumatin husat i bin sindaun long Baibel kos long tupela yia i pinisim skul bilong ol tupela wik i go pinis.

Ol bin kirapim Baibel skul ya long 1991. Bikos Allan Crop em i fes misineri bilong lotu Yunaited Sios long karim Tok bilong God i go long ol pipel insait long wes Buka, Baibel skul ya i kisim nem bilong em.

Mista Rigamu i tok ples i pulap long ol kain kain hevi na em i wok bilong yupela olsem ol profet bilong nau long stretim ol rong na hevi long komyuniti, ples na provins bilong yumi.

"Komyuniti i wetim yupela ol sumatin husat i pinisim kos, long givim ol save long Tok bilong God. Olsem na yupela i mas soim ol pipel long ples long gutpela pasin. Na tu, trupela lidasip pasin," Mista Rigamu i tokim ol sumatin.

Tasol em i tok pasitaim long ol sumatin i kam sindaun long Baibel Skul, i gutpela long ol i givim stret taim bilong ol long lainim ol Tok bilong God we i stap long Baibel.

Dispela skul em i narakain long skul insait long edukesen sistem long kantri. Bikos dispela em skul we imas sanap long tupela tupela leg em yet. Na progrem bilong em i bilong strongim pasin long kirapim gutpela pasin long laip bilong wan wan man.

# WEWAK SPESEL

TOYOTA LITEACE BAS

SPESEL PRAIS

**K16,500**

DRAIVIM IGO TASOL

HARIAP! NOGUT OL DISPELA STOK I PINIS!



**FRI! EF600 GENSET**

BAI IGO WANTAIN LITEACE BAS!



**TOYOTA**

Oh Em Moa Yet!

**Ela Motors**

RINIM : 862072 KETH RIECK BRANS MANEJA RINIM : 862255 JACK MATHEWS SELS MANEJA  
RINIM : 862255 JAMES MANDAWO SELS MAN FAX : 862252 P O BOX 778 WEWAK



• Gavman bilong Spanis i holim bot bilong tripela man ya long sekim ol lainsens na tok orait bilong painim pis long biksolwara. Planti ol bot bilong painim pis tu i kisim taim.



• Ol ami bilong Amerika i sanap was long refuji kem long Kuba we moa long 1,000 manmeri na pikinini i stap. Planti i bin ronawe tasol ol soldia i wok long kisim ol bek.

## OL WANSOLWARA NIUS

### Solomon Ailan laik rausim BRA opis long Honiara

**SOLOMON AILANS:** Long nau, Solomon Ailans i toktok wantaim ol opisa bilong Yunaited Nesens long surukim opis bilong ol Bogenvil Revolusenseri Ami long Honiara i go long narapela kantri. Nesenel Brotkasting Komisen long PNG i ripotim dispela samting.

Ripot i tok Foren Afeas minista bilong Solomon Ailans, Danny Philips i tok dispela mov i wanpela long ol rot long bringim gutpela sindaun i go bek long Bogenvil.

Mista Philip i tok gavman bilong em bai i mekim wanem samting em iken aninit long pawa bilong em long lukim olsem ol wok long bringim gutpela sindaun i go bek long Bogenvil i karim kaikai. Gavman bilong em i kirapim nau wanpela maigresen na kastom polisi. Na tu, em i putim ol refuji pipel bilong Bogenvil husat i stap long Solomon Ailans i go long han bilong Yunaited Nesens Hai Komisen bilong ol Refuji.

Em i tok dispela mov bai i givim kliapela piksa long wanem sanap tru gavman bilong em i gat long ol hevi long Bogenvil. Dispela em antap long bailetrel wokbung tupela kantri i gat.

### Namba wan Fiji meri kamap Dikon long Engliken Sios

**FIJI:** Wanpela meri Fiji i kamap olsem fes meri Dikon long Oda bilong Polinesen Daikonet. Seremoni long makim dispela samting i bin kamap long Holi Triniti Engliken Sios long Suva las wik Sande.

Nem bilong meri ya em Sereima Lomaloma, na em i gat 41 krismas. Em i holim wok olsem dairekta long Dipatmen bilong ol Meri na Kalsa long Fiji.

Odinesen bilong em i mekim em fes Pasifik Ailan meri na tu wanpela meri Fiji long joinim Oda bilong Daosis long Polinesia.

Ol papamama bilong Mis Lomaloma em wanpela long ol namba wan lain Engliken famili long Fiji. Taim em i laik kamap Dikon long dispela yia, em i toksave long Angliken Sios long tingting na laik bilong em long dispela samting. Bisop bilong Polinesia i bin tokorait long askim bilong Mis Lomaloma, tasol em bin i wetim tasol tingting na tokorait i kam long ol arapela bikman bilong sios long givim fomol apruval bilong ol long dispela samting.

Bihainim ol lo bilong sios, Ms Lomaloma inap kamap pater tu.

### Praim minista (PM) bilong Fiji i sik na stap long haus sik

**FIJI:** Praim Minista bilong Fiji, Sitiveni Rabuka i stap nau long haus sik long Suva, bihain long em i sik. Redio Australia i ripotim dispela samting long dispela wik.

Bos long Koloniel Woa Memoriel Haus sik, Dokta Josaia Taka, i tok Mista Rabuka i gat fiva o skin hot na olsem em i mas malolo long sampela de pastaim.

Em i tok, ol i kisim Rabuka wantaim 46 krismas, i go long haus sik long las Sande nait bihain long sik skin hat i kisim em. Long nau, em bai malolo i stap long bet bilong em long haus sik inap long tri na foapela de.

### Ol nes long Ameriken Samoa bai kisim moa pe

**AMERIKEN SAMOA:** Ol nes husat i wok long gavman bilong Ameriken Samoa bai i kisim pe rais.

Aninit long nupela klasifikesen bilong ol, ol nupela nes husat i stat wok tasol bai i kisim pe rais namel long 8 na 11 tausen dola mak bilong Amerika.

Long sampela yia nau, ol atoriti i toktok long apim pe bilong ol nes, tasol samting tru ino save kamap inap ol tisa i stretim bilong ol na kisim nupela pe bilong ol. Bihain long ol i stretim pinis ol dispela lain, ol bai lukluk long klasifaim ol pe bilong ol plis opisa.

### India i laik poroman gen wantaim Fiji

**FIJI:** India i laik kirapim bek gen diplometik wok bung wantaim Fiji. *Fiji Times* i ripotim dispela samting long dispela wik.

Tasol ol bikman long gavman i tok wok politiks namel long tupela kantri tasol i as long tok oraitim dispela samting.

Ripot long Yunaitet Nesens i tok long nau, gutpela wok pren i wok long go het isi isi namel long tupela kantri.

Embasi bilong India long Fiji i bin pas long Me 1990, bihain long ami i tekova long Fiji gavman. Na wokbung namel long tupela kantri i go bagarap.

Narapela samting tu we bai i tupela kantri i wetim em long 1990 mamalo bilong Fiji we wanpela komiti i lukluk long em nau.

Ol ripot i kam long PACNEWS

• (lephan) Em wanpela man i tralm kamera bilong em long kisim piksa bilong dispela pisin. • Wanpela musik grup i winim musik palp long wanpela bikpela patl long Ingran we moa long 1,000 manmeri i bin kamap long em.



### THE ONLY ANSWER FOR PNG 2 CHRONICLES 7:14

If my people, who are called by my name will humble themselves and pray and seek my face and turn from their old ways, then will I hear from heaven and will forgive their sin and

### WILL HEAL THEIR LAND

We call all Christians who believe in the spiritual effect of this scripture and who wish to support a proclamation for a National Day for Prayer and Fasting.

Please Write to:

**KAIKAI BILONG TINGTING  
P.O. BOX 7574  
BOROKO  
NCD**

Sponsored by  
Harvest Ministries International







• (antap) Piksa ya i soim wanpela hap kona bilong bik-taun Samoa we planti kampani husat i gat fektori i save go tromol olpipa na samting ol i save wokim long masin. Dis-pela hap ples i smel no gut nau na i kamapim birua long ol manmeri i stap klostu.

• (anilit) Piksa ya i soim wanpela meri Muslim husat i haltm pes bilong em long laplap na karim blakpela flak na wokabaut wantaimol lain husat i straik long gavman i bin opim Isrel Embesi.



## OL LIKLIK NIUS

### Amerika helikopta bungim birua

**NOT KORIA:** Wanpela helikopta bilong Amerika i bin bungim birua na pundaun long boda bilong Not Koria we ripot i tok pailot bilong helikopta ya i stap laip tasol i no save long rot bilong go na bungim helpim.

Ripot i kamap long KBS redio i tok helikopta ya i mekim las toktok olsem ol i laik kam bek tasol long namel em i bungim birua.

I gat bilip olsem ol paitman namel long Not Korea boda i sutim dispela helikopta bilong Amerika i go daun.

Nem bilong pailot ya em; Bobby Hall we Amerika opis long Not Korea i tokaut long en. Narapela man husat i dai em Sif Waren Opsa bilong Amerika, Davie Hilemon.

### Helikopta pundaun long Is Kalimantan

**INDONESIA:** Ripot i kam long biktaun Jayapura olsem wanpela helikopta bilong Indonesia i bin pundaun long Is Kalimantan na olgeta pasindia i bin dai. Wanpela liklik meri husat i gat tupela krismas tasol i stap laip tasol i gat bikpela bagarap long skin bilong em.

Ripot i tok helikopta ya em BO-105 we i save wok raun long glasim ol graun na boda eria bilong kantri.

Pailot na 5-pela arapela lain antap long helikopta ya i dai long dispela birua.

### Man hangamapim em yet

**JAPAN:** Wanpela yangpela man Japan husat i gat 10-pela krismas i bin hangamapim em yet insait long rum bilong em wantaim rot na i dai long las wik.

Mama bilong yangpela manki ya i tok pikinini bilong em i bin raitim wanpela hap toktok long pepa olsem em i les long laip em i stap long en na i laik painim narapela kain laip.

Yangpela manki ya i yusim rop bilong pawa na pasim nek bilong em na hangamapim em yet insait long rum bilong em na dai.

Dispela em narapela bikpela nius we tupela wik i go pinis 5-pela yangpela pikinini long Japan husat i gat 13 na 17 krismas i bin kilim ol yet na i dai. Ol 5-pela lain ya i bin dai insait long wanpela wik tasol.

Ripot i tok ol dispela manki i dai bikos ol i les long arapela manki i save hatim bel bilong ol.

### Kampani wokim ol liklik trausis

**NU SILAN:** Wanpela kampani long Nu Silan i wokim pinis liklik trausis bilong ol man o anda pens we i gat bikpela tingting long kamapim sampela gutpela helpim long ol man.

Kampani ya i samapim pinis ol dispela anda pens na i wok long putim toksave long niuspepa na televisen long ol man i ken baim na werim. I gat 8-pela pens olgeta insait long wanpela karamap.

Dispela pens bai i no inap hot tumas na inap mekim ol man i kamapim moa wara bilong mekim em i ken amamas long slip wantaim meri. Wara bilong ol man i ken go antap moa olsem long 60,000,000 spem long wanpela kubik mita.

Pens ya bai i moa gutpela long ol arapela pens we i save kamapim kaikai ol sait sait skin bilong ol man na tu mekim skin bilong i go ret o sua.

Ripot i tok dispela em nupela kain pens tru we inap kamapim planti gutpela helpim long skin bilong ol man na tu insait long bodi bilong ol man.

Tasol i gat ripot i kam olsem dispela samting i no gat inap sapot bilong strongim we i ken mekim ol man i bilipim na baim.

Ripot i tok i mas gat moa wok painimaut yet long dispela kain toksave o ripot bilong em long niuspepa na televisen i mas stop.

## Krismas em taim bilong glasim laip

**Krismas gritings i kam long Nesenel Presiden bilong Nesenel Kaunsi bilong ov Wimen, Dame Josephine Abaljah**

Mi na ol wokman na wokmeri long Mosbi opis we i makim maus bilong olgeta meri long kantri i salim Krismas gritings na tok amamas bilong nupela yia i go long yupela olgeta meri na ol famili long kantri. Mi laikim nupela yia, 1995 i go gut tasol.

Kain taim olsem Krismas i save bungim ol famili, pren na hauslain long kam wantaim long serim ol eksperiens, ol nupela samting we i kamap long laip bilong yumi, ol salens na tu wanem samting yumi no bin inap long mekim. Bikos long sampela samting i no stret.

Dispela em i taim tu bilong yumi long lukluk na glasim laip bilong yumi na lukim wanem gutpela samting i kamap insait long wanwan famili. Sapos

yumi mekim sampela rong, i gutpela long yumi long glasim ol nau. Na traim stretim insait long nupela yia.

Long dispela yia 1994, yumi lukim sampela bikpela samting i kamap long kantri na tu long ausait. Wanpela long ol em Intanesenel Yia bilong Famili we Yunaited Nesens yet i makim 1994 long sut long famili. Narapela samting em Nesenel Wimens Wol De bilong Prea, Intanesenel Wimens De bilong Eksen long Helt bilong ol Meri, na Intanesenel De long Pait pasin egens long ol Meri.

Ol dispela samting i bin kamautim long ples klia ol hevi na toktok we i karamapim ol mazi long wol. Ol i singautim ol gavman na komyuniti lida wantaim tu ol arapela lain moa long luksave na soim rispek i go long ol meri. Bikos ol meri i as bilong famili i kamap gut long stap wantaim.

Long dispela, em i bikpela



• Dame Josephine Abaljah

samting tru long ol meri i gat bikpela toktok long lukautim famili. Planti nupela senis i kamap long kantri tude we i mekim na ol meri i mas sanap redi long bungim ol dispela nupela salens. Na mekim ol bikpela disisen o tokorait long laip, wok na famili.

Nesenel Kaunsi ov Wimen i bin bungim planti salens na eksperiens long dispela yia.

Ol grup bilong ol meri long ol provins i bin gat gutpela wok-bung wantaim ol Provinsal Wimens Kaunsi, ol Non Gavman Ogenaisesen na sios grup long holim ol bikpela kibung olsem Nesenel Wimens na Sios Konprens.

Tasol yumi i gat longpela rot yet long bihainim bipo long ol man i kisim yumi olsem ol wankain patna long developim kantri. Olsem na yumi ol meri i bung wantaim long pait strong long ol toktok we i karamapim sindaun bilong ol meri na famili.

Mi givim bikpela tok amamas long ol ogenaisesen bilong ol meri long kantri long sapotim NCW long go hetim ol wok bilong em long dispela yia. Dispela em ol grup olsem Dipatmen bilong Yut na Hom Afeas, ol NGO grup, ol Yunaited Nesens Ejensi long kantri, ol ovasis misin, ol sios, nesenel na provinsal gavman, na ol arapela lain husat i sapotim NCW long mekim ol wok plen bilong em i

karim kaikai.

Long dispela taim tu, mi no lus tingting long tingim ol brata, susa na ol famili husat i bungim taim nogut long pairap bilong tupela maunten paia long Rabaul. Na taim graun i bruk insait long Sauten Hailans.

Mi salim toksori i go tu long ol meri, famili na hauslain bilong ol soldia na plisman husat indai long ol hevi long Bogenvil. Na tu, insait long ol arapela birua long kantri.

Las long em, mi makim maus bilong ol meri long singautim gavman long sapotim ol meri insait long kantri. Dispela em long sapotim ol meri long ol wok na projek ol i mekim. Mipela i krai long gavman long luksave long mipela olsem ol meri husat i mas stap insait long ol wok bilong developim kantri.

Mi laikim ol amamas bilong Krismas na Nu Yia wantaim gutpela sindaun, pis na laikim wanpela narapela i stap wantaim olgeta meri long kantri



• Poto I soim Sirinumu dem long Sogeri, we i save holimpasim ol wara na kamapim. Wa saplai bilong Mosbi siti. Bikpela bris i ran antap long dem. *Poto: Kennedy Edene.*



• Yangpela Nase Paul i gat tripela krismas tasol. Planti taim bai yu lukim em i ron long dispela hos long Goroka taun. Tasol em i no wanpela trupela hos. Em i wanpela glaman hos bilong City Pharmacy stua long Goroka. Wokman bilong stua i was na Nase i amamasim em yet. *Poto: Sape Metta.*



• Oi niusman na sampela pasindia i flai long Air Niugini F28 balus long Buka i kam bek long Mosbi long mun Novemba, 1994. Dispela em long taim F28 balus i mekim namba tu bisnis ron i go long Buka. Tupela niusman long ran em Michael Asagoni (Iepnan) na Blaise Nangoi (raithan). *Poto: Yakam Kelo.*



• Oi pri skul tisa bilong Mosbi i greduet long wanpela 4 wik kos, em i bin kamap long Gondens Sekenderi skul long las wik. Oi tisa bilong Dela Salle Brothers, Katolik, Lutheran na Bahai Faith pri skul i kamap long dispela skul. Oi Dela Salle skul long Australia i glivim mani bilong ronim dispela kos. *Poto: Daniel Mona.*



• Dokta MacRae, mausman bilong Yuropien Yunien long Papua Niugini i katim rop long opim nupela klasrum bilong larowari Hai skul long tripela wik i go pinis. Dispela em long taim greduesen bilong skul tu i kamap. *Poto: Kennedy Edene.*



• Kas bilong tupela yangpela skulmeri bilong larowari Hai skul long Sogeri, Sentrel provins. Tupela i danis long namba 30 greduesen bilong skul.

## Ol fama ken baim nau marasin na kaikai bilong kakaruk long Ilimo

**JOE KANEKANE**  
I raitim

OL fama na kampani bilong lukautim na salim kakaruk bai sevim mani nau.

Bikos ol i no inap baim moa kaikai o marasin bilong ol kakaruk long ol ovasis kantri olsem Australia. Ol i ken baim tasol long nuoeka fid mil bilong Ilimo Poultry Products, ausait tasol long Mosbi siti.

Dispela nupela fid mil em Praim Minista Sir Julius Chan i bin opim long wik i go pinis.

Mil ya bai helpim tu kantri long wok i go klostu long rot bilong kamap wanpela indastrel kantri.

Nau yet gavman i lukluk strong long dispela eria we ol kantri i mas muv long ol liklik bisnis i go long ol bikipela bisnis.

Olsem na taim Ilimo i opim nupela fid mil bilong en, tingting bilong gavman i go wantaim long dispela rot we gavman i soim na laikim ol kampani, na ol bikipela bisnis long bihainim.


Ol tripela bikipela poltri kampani sevim samting olsem 20 pesen taim ol i lusim na baim ol fid mil ol mekim long kantri yet. Na dispela bai helpim kantri i groa long bisnis bilong lukautim na salim kakaruk.

Ol fama long kantri i painim bikipela hevi long prais bilong ol fid bihain tasol long kantri i painim bikipela hevi long mani, we i mekim prais bilong planti samting i go antap.

Jenerel menesa bilong Ilimo Poultry Products, Ammon Recanati i tok ol bikipela fama long kantri no inap baim marasin long Australia. Long wanem nupela fid mil masin i gat strong bilong saplaim olgeta



• Foto long antap i soim tupela wokman i soim bag we ol marasin o kaikai bilong kakaruk i stap insait long en, na long daubilo i soim nupela fid mil haus na eria. Ol foto: Ivan Bayagau.



fama insait long kantri.

Em i tok tu olsem i gat gutpela sans bilong ol fama long skruim moa bisnis bilong lukautim pik na salm, na long lukautim ol bulmakau

we ol i ken yusim ol marasin we nupela fid mil bai wokim.

Ilimo bai baim sampela saveman bilong wokim ol kainkain

samting insait long fid mil. Na tu ol manmeri bilong Papua Niugini yet bai kampani i kisim tu, bai ol i lainim sampela wok na bihain tekova.

## Hailans Diwai wetim K10,000 helpim man

**MICHAEL KOMA** I raitim

GRUP bilong planim ol diwai long Kundiawa, Hailans Diwai i wet tasol nau long kisim K10,000 i kam long Nu Silan Hai Komisen.

Grup bai kisim mani olsem helpim mani long neks yia, 1995.

Deputi Hai Komisina bilong Nu Silan long Papua Niugini, David Strachan i tok gavman bilong em bai sapatim wok bilong dispela grup. Dispela em bihain long em i lukluk raun long Wara Simbu,

we Hailans Diwai i save planim ol pikinini diwai long hap long las wik Fonde.

Wara Simbu i stap ausait tasol long Kundiawa taun, Simbu provins.

Mista Strachan i tok hevi bilong ren i pundaun na rausim ol gutpela graun long antap em wanpela bikipela hevi long Simbu provins. Bikos i gat planti bikipela maunten.

"Dispela bai kamapim bikipela hevi long sin-

daun bilong ol pipel long longpela taim bihain, sapos nogat samting i kamap nau long traime stretim," em i tok.

Em i tok Hailans Diwai i wokhat nau long stapim dispela hevi long kamap bikipela bihain taim. Olsem na i wok long planim nau ol diwai long ol liklik na bikipela maunten insait long provins we i nogat diwai. Na dispela em i wanpela gutpela wok tru.

Mista Strachan i tok opis bilong em bai wok

bung moa wantaim ol grup olsem Hailans Diwai husat i laik mekim gutpela wok insait long kantri.

Hailans Diwai em i wanpela grup husat i no wok aninit long nem bilong gavman o Non Gavman Ogenaisesen. Na i save wok long planim diwai long ol hap i nogat diwai.

Menesa bilong Hailans Diwai, Gabriel Brawa i tok em i planim pinis planti tausen pikinini diwai long hap Pogera Main i stap long en. NA tu long ol arapela bikipela senta insait long hailans rijon.

# Yu mas baim long 10t tasol!



# 10t tasol!



# 5t tasol!

Sapos ol i askim moa... go long narapela stoa!

# BISNIS LONG PAPUA NIUGINI

Hagen Building Supplies opim nupela opis long Wabag



• Provinsal minista bilong Komes, Aroma Ponde (lephan) i sekanim Menesing Dairekta bilong HBS, John Mori.

## GEOFFREY APAKALI i raitim

WANPELA kampani bilong salim ol samting bilong wokim haus, na tu save sanapim ol haus, i opim pinis wanpela nupela opis long Wabag long las wik.

Nem bilong dispela kampani em Hagen Building Supplies. Mama opis bilong kampani ya i stap long Hagen. Na em i wanpela bilong ol top bilding kampani insait long hailans rijon.

Hagen Building Supplies opim nupela wea haus na hatwea bilong em long Keas long las wik Tunde.

Provinsal Minista bilong Komes, Aroma Ponde i opim opis, we moa long 100 gavman opisa wantaim ol bisnis na arapela bikman na meri em ol i invaitim.

Mista Ponde i tok planti bisnis save pret long go wok long Enga. Bikos long ol ripot nogut we i bagarapim nem bilong provins. Tasol em i amamas long lukim wanpela gutpela kampani olsem i go opim opis bilong em long Enga

Mausman bilong kampani, John Mori i tok kampani i bihainim tasol bisnis polisi bilong Enga provinsal gavman, ol i kolim long tok inglis olsem 'Buy-in-Enga'. Dispela i min olsem ol bisnis insait long Enga i mas baim ol samting bilong Enga provins yet, long mekim wok bisnis bilong ol.

Mista Mori i tok kampani em ol Enga saveman yet bai ranim.

## MV Sealark baim fi na ron gen long Finsafen

### FRANCO NEBAS i raitim

OL pipel bilong ples Gingala long Finsafen, Morobe provins i bin stapim wanpela sip ol i kolim MV Sealark long sua long Buki bris, em ol i papa long en.

Bihain long dispela, kampani bilong sip, Sealand Transport i no bin baim fi bilong yusim bris long sua na rausim ol pasindia na kago, i go long ol papa bilong Buki bris.

Ol pipel i gat wanpela bisnis grup ol i kolim, Matuala Bisnis Grup. Dispela grup i go pas long

ranim wok bilong kisim mani long bris. Siaman bilong dispela grup em Timon Taikika.

Mista Taikika i tok kampani i no bin baim fi bilong ol inap olsem long K2590 nau.

Mista Taikika i tok ol i sasim K70 long wanwan ran bilong sip taim i kam sua long bris. "Mipela i no salim ol long aua we i bikpela mani tumas," em i tok.

Em i tok sip i save kisim 94 o moa pasindia long wanpela ran long Lae i go long Finsafen, na long Finsafen i go bek long Lae. Na save kisim K50 long bikman meri na K13 long ol studen, na

ol pikinini em K7.50.

MV Sealark i no bin mekim ron bilong em i go long Finsafen inap long tripela de olgetal. Dispela em bihain long kampani i baim K2,100 i go long ol pipel bilong ples Gingala na Bugaim. Tasol kampani i gat narapela K490 yet long baim.

Nesenel gavman i bin givim K50,000 i go long ol pipel long stretim bris. Na Morobe provinsal gavman i bin givim K30,000. Putim wantaim, dispela i kamap long K80,000 olgeta we ol i yusim long stretim bris, na opim long Septemba 16, 1994.

## OTML sanapim plis bareks long Tabubil

### NEVILLE CHOI i raitim

BIKPELA maining kampani long Westen provins, Ok Tedi Maining Ltd, i givim bikpela helpim i go long ol singel plis long Tabubil bai ol i gat gutpela hap bilong stap na wok.

Kampani i mekim wanpela 19 rum singel bareks o haus we i kos samting olsem K120,000.

Bipo ol plisma i save stap long olpela Kem Tri. Dispela kem i bin stap na ol man i bin yusim long taim ol i statim main. Nau yet ol dispela haus i lapun tru.

Superintenden bilong taun na kem, Bob Pink, i tok dispela aidia bilong sanapim dispela bareks i bin kamap bihain long kampani i toktok wantaim stesin komanda long las yia.

Menesing dairekta bilong Ok Tedi Maining, John Grubb i bin opim ol dispela haus slip bilong ol plisman long Desemba 8.

Mista Grubb i makim maus bilong

kampani na tok ol dispela haus slip em i wanpela bikpela samting long plis fos.

Em i tok olsem planti man i laik lukim gavman i wokim planti samting bilong ol olsem givim ol helpim na lukautim gut ol. Na em i tok olsem dispela bareks i makim sapot blong Ok Tedi igo long plis fos.

Mista Grubb i tromoi wanpela askim i go long ol manmeri long pablik long wok ol plis long lukautim komyuniti.

Wanpela bikma long opis bilong komanda bilong boda rijon, Alfred Reu, i tok olsem plis dipatmen i amamas tru, na i tok tenkyu long Ok Tedi Maining Limited long ol helpim ol i givim long Not Flai Koman.

Mista Reu i tok "long dispela taim we moni i sot, mipela i amamas long helpim bilong yupela."

Em i tok olsem dispela ol haus sip bai i apim tingting bilong ol plisman na ol bai mekim gut wok. Em i askim ol plisman long lukautim gut ol haus slip ya.

## Marasin stua skruim sevis go long Buka

### NEVILLE CHOI i raitim

CITY PHARMACY, stua bilong salim ol kain kain marasin i opim pinis wanpela nupela stua bilong ol long Buka. Dispela stua bilong ol emi namba wan stua bilong ol insait long provins bihain long Bouganville kraisis i bin kamap.

Dispela helt stua nau i lukluk long provaidim ol gutpela sevis long ol man na meri long Buka. Opim bilong dispela stua long Buka i soim bikpela laikim blong ol lain long City Pharmacy long lukautim gut helt bilong olgeta manmeri long Papua Niugini.

Long dispela yia tasol planti long ol bisnisman i wok long go bek long Buka long statim bek ol bisnis. Opim bilong dispela stua long Buka tu bai i helpim long pulim ol bisnisman long go na statim bek ol bisnis bilong ol.

Dispela stua bilong City Pharmacy bai givim bikpela helpim tu i go long ol helt sevis

long Buka, na bai em i helpim long kamapim bek Buka.

Nupela stua bilong City Pharmacy is stap insait long wanpela stua ol kolim long Keno Company Foundation Mini-Mart, na i gat planti kain kain samting ol i salim.

Sampela long ol dispela samting em ol samting blong lukautim gut bodi, ol kain kain presen, ol kolos na tois blong ol liklik mangi, na ol samting blong ol mama i gat pikinini.


City Pharmacy i bin gat dispela tingting long opim wanpela stua long Buka taim tupela bikman blong Keno Company Foun-

dation Mini-Mart, Raymond na Stanley Hakena i bin askim ol. Dispela helt stua i gat wanpela save man long marasin i lukautim, na i givim wok long tenpela man long ailan.

Planti man i bin igo long opening blong dispela stua na dispela i soim olsem ol lain long Buka Island i nidim planti gutpela sevis na marasin.



• Ol manmeri i lukluk raun long nupela marasin stua.



Skulim long wok fama • Allan Mark, DPI opisa long Bewani, Sandaun provins i soim na tokim ol pipel stretpela we bilong wok fama. Dispela em long Agrikalsa na Kalsa So em i bin kamap wantaim ol amamasim Sandaun provinsal De. Foto: Winis Map.

# PNG LAIPSTAIL

## Papa Waliawi tingting yet long Wewak taun na Is Sepik provins

IS Sepik em i wanpela provins insait long kantri we i nogat gutpela developmen i kamap long ol yia i go pinis. Bikos provinsal gavman i save bungim kainkain bikpela hevi. Mekim na ol pipel i no kisim gutpela sevis bilong gavman. Wewak taun tu i no develop. Kainkain pasin nogut i pulap long provinsal gavman na Dipatmen bilong Is Sepik.

Wanpela man husat i save laikim tru provins bilong em Is Sepik em Peter Waliawi. Mista Waliawi em i wanpela man na we husat i laik lukim olsem Is Sepik provins i mas develop. Developmen i mas kamap long givim gutpela sindaun i go long ol pipel long ples na taun. Em i laikim olsem Wewak taun i mas develop na kamapim wok long ol manmeri.

Long ol yia i go pinis, taim em i stap long Wewak, em i wokhat tru long developim taun na provins. Bikos em i laikim provins na ol pipel. Tasol hatwok bilong em i no karim gutpela kaikal. Bikos hatwok bilong em i no kisim gutpela helpim na wokbung i kam long olgeta lida manmeri insait long provins. Arapela samting i olsem provinsal gavman na ol sinia pablik sevan insait long provins i no luksave olsem em i wok long traim long kamapim sampela gutpela samting insait long provins. Astingting long helpim ol pipel na provins wantaim.

Long sampela yia i go pinis, Mista Waliawi kisim wanpela wok wantaim Kalsarel Komisin long Mosbl. Na em i lusim provins bilong em na go long Mosbl. Tasol em i no lusim tingting yet long provins bilong em. Provins bilong em i save stap olgeta taim long tingting bilong em.

Long dispela wik, Wantok Niuspepa i askim Mista Waliawi long tokaut long sampela tingting bilong em long Is Sepik provins. Hia em toktok bilong Mista Waliawi go long ol pipel bilong Is Sepik provins.

Ol wantok bilong mi, kantri bilong mipela i wok long bungim planti bikpela hevi tudeksampel-bikpela hevi long Bogenvil, gavman i sot long mani, Niugini Ailan rijon i laik bruk na lusim Papua Niugini, planti gred 6 sumatin i no kisim ples long haikul na wok bilong stretim provinsal gavman sistem. Olsem na ol wantok (Sepik), mipela i no ken kamapim o kirapim arapela hevi gen long brukim provins i go long ilektoret, Lokol gavman Kaunsil na konstituensi. Mipela i mas sanap wantaim na wokbung wantaim long helpim Papua Niugini. Mipela i mas lusim tingting long kain ol samting na hevi olsem. Bikos kain ol samting olsem i ken bagarapim strong bilong mipela olsem ol Pikinini Sepik na tu Papua Niugini long nesanel level.

Ol gutpela wantok na wanples, provins bilong mipela i gat olgeta gutpela samting we i ken kirapim na ranim wanpela bikpela projek o industri. Dispela industri em i wanpela bikpela rot we i ken kamapim gutpela ekonomik developmen. Dispela industri em TURISIM.

Sapos mipela i laik kirapim na ranim dispela industri insait long provins, mipela olgeta Sepik i mas wokbung wantaim-ol politisen, bisnisman na meri, pablik sevan, yangpela manmeri, sios grup na tu ol grasrut manmeri. Mipela olgeta i mas wokbung wantaim long daunim, rausim na pinisim pasin bilong



• Papa Waliawi..... Is Sepik i gat olgeta samting long kirapim na ranim turisim industri long provins.

### GODFRIED YASSAFAR i raitim

wokim kainkain pasin nogut, wantok sistem, givim wok long brata-susa, wantok, na wanpelin. Na tu pasin bilong givim wok o kontrak bikos long sampela pasin bilong kisim samting long ol lain mipela i givim wok o

provins. Mi save olsem dispela em i wanpela hatpela samting long mekim. Mipela i mas tingting na rispektim wanpela na arapela. Bikos mipela olgeta i wankain. Mipela i mas sanap olsem wanpela pipel tasol. Mipela i no

"Sapos mipela i laik kirapim na ranim dispela industri insait long provins, mipela olgeta Sepik i mas wokbung wantaim-ol politisen, bisnisman na meri, pablik sevan, yangpela manmeri, sios grup na tu ol grasrut manmeri."

kontrak. Mipela i mas wokim disisen wantaim wanpela tingting tasol. Na tu wantaim pasin bilong honesti, rispek na hamoni long helpim olgeta pipel long

ken brukim mipela yet i go long ol liklik grup olsem Sepik Wara, Haiwe, Kubalia, Yangs, Is Kos, Wes Kos, Ailan na Bik Ples. Sapos mipela i brukim mipela

mipela. Na ol pipel i ken kisim gutpela sevis aninit long ol wok kamap bilong dispela industri.

Long tingting na luksave bilong mi, wanpela ovasis man o meri bihain long em i go na stap o lukluk raun long Wewak, em i ken tokaut olsem em i lukim Papua Niugini. Mi mekim dispela hap tok bikos em i ken kalap long balus na go lukluk raun long ol ples we em i gat long laik long en, em i ken kisim bot na bihainim solwara i go long ol ailan o wara i go antap long Sepik wara o kisim ka na go long ol ples em i laikim. Ol wanples Sepik, ol turis i save kam long Papua Niugini long lukim ol gutpela ples, at na kraf na enviromen, long lukim ris na kainkain kalsa bilong mipela. Na mipela ol Sepik i mas i gat bikpela amamas bikos mipela i gat dispela olgeta samting i stap long provins bilong mipela.

Biktaun bilong provins, Wewak i stap long wanpela gutpela hap ples insait long Pasifik. Ol manmeri husat i save go long Wewak i save laikim na rispektim dispela ples. Mipela ol Sepik yet i ting wanem long dispela samting? Mipela i save tingting long dispela samting tu o nogat? Ol Sepik, sapos yupela i bin tingting o i no bin tingting long Wewak o Is Sepik provins, mi askim yupela nau long

yet i go long ol liklik liklik grup olsem, developmen bai no inap kamap long provins bilong mipela.

Mi bai no inap go insait tumas na glasim na skelim turisim industri long provins. Mi bai toktok antap tasol. Na tu mi no wanpela atoriti insait long Turisim. Tasol long luksave bilong mi, mi ken tokaut stret olsem Wewak na Is Sepik provins i gat inap samting i stap long developim turisim industri. Mipela i nogat gutpela tingting long developim dispela industri long serim wantaim ol manmeri bilong ol arapela kantri. Dispela em bikos long gridi pasin bilong mipela yet. Mipela i no tingting long wokbung wantaim. Sapos mipela i wokbung na developim dispela industri, planti ovasis manmeri bai kam long lukluk raun long ples bilong

tingting na givim yupela yet long developim provins. Em i taim nau mipela i mas stat long nupela yia 1995 na wokbung wantaim long developim turisim industri long Is Sepik provins na kapi-

pela Sepik, bikpela tru ol lida, i gat wankain tingting olsem em i gat. Na ol i laik lukim olsem provinsal gavman na Is Sepik Turis Bod (ESTB) i

"Mipela i mas tingting na rispektim wanpela na arapela. Bikos mipela olgeta i wankain. Mipela i mas sanap olsem wanpela pipel tasol. Mipela i no ken brukim mipela yet i go long ol liklik grup olsem Sepik Wara, Haiwe, Kubalia, Yangs, Is Kos, Wes Kos, Ailan na Bik Ples. Sapos mipela i brukim mipela yet i go long ol liklik grup olsem, developmen bai no inap kamap long provins bilong mipela."

tel bilong em Wewak. Mipela i mas wokbung na developim na stretim Wewak long pulim moa turis long yia 2000. Tasol bikpela samting em long kamapim gutpela sindaun long mipela yet.

Gutpela toktok bilong Papa Peter Waliawi. Mi bilip planti gutpela manmeri long Is Sepik bai amamas long toktok na tingting bilong Papa Waliawi. Mi gat bilip tu olsem planti ara-

mas wokhat na developim dispela bikpela industri we i ken kamapim bikpela ekonomik developmen insait long provins.

Tru tumas, turisim industri long provins Papa Waliawi toktok long en i no wanpela halt samting. Dispela samting (industri) i stap ples klia. Tasol planti Sepik i no luksave long dispela samting.



• Kainkain pasin tumbuna i pulap tru long Is Sepik provins we ol turis i ken mangallim.

# Manui bas sevis groa wantaim sapot bilong Bikpela

"PLANTI manmeri i no save long mi. Ol i save kam long mi na tok, 'mipela laik lukim Joe'. Mi save sem liklik long ol na tok, "em mi tasol."

Ol i save ting Joe em wanpela bikbela mausgras man o wanpela traipela man. Long wanem ol i save tasol olsem Joe Yaul em papa bilong Manui bas lain long Madang.

Tasol nogat, Joe em wanpela isipela man tasol na gutpela man bilong stori wantaim.

Joe Yaul i bin autim dispela stori bilong em long mi long wik i go pinis taim em i kam sindaun na stori liklik long wok bisnis bilong em.

Dispela em stori bilong Joe na Manui bas sevis.

## ALFONS BARIASI i raitim

Mama i karim Joe long ples Saikisi long Maprik, Is Sepik provins. Taim em i liklik yet, papa bilong em i kisim em i go stap long Nuigo stelemen long Wewak taun, na em i bikpela long hap.

Long 1968, em i lusim Wewak na i kam long Madang. Em i bin skul inap tasol long Gred 6. Tasol taim em i kam kamap long Madang, em i bin painim wok wantaim Rabtrad kompani olsem wanpela kuskus.

Em i wok wantaim Rabtrad tasol i go na i marit. Tasol, kain bilong planti yangpela; i no save isi long dring spak na paitim meri.

"Mi bin wanpela man nogut tru bilong spak na paitim meri. Wanpela taim klostu mi kilim misis olgeta na ol

lain bilong em i kotim mi, na mi go slip long rum gat. Tasol taim mi kam ausait long rum gat mi paitim meri gen. Olsem na kot i no isi long mi. Mi go 6 mun stret long Beon."

Insait long kalabus, long yia 1986, wanpela bikpela tenis i kamap. Joe i lusim olgeta tingting na pasin nogut na i kamap narakain man olgeta.

Taim em i kam aut long kalabus, em i sut stret long wok bilong Bikpela. Em i bin wok olsem wanpela supavaisa long Rabtrad bipo long em i kalabus. Na taim em i lusim kalabus, em i go wok gen wantaim kampani.

Em i lusim moni bilong em long ol kain samting olsem lam, gita, tamborin na ol

narapela samting bilong lotu long nait o felosip long Sisak 2 na ol eria klostu.

Em i mekim olsem i go na i no longtaim em i baim wanpela 'old bomb' ka. Na dispela ka em i save kisim i go long wok long moning. Na taim em i lusim, ol pasto i save kisim na autim tok na mekim wok i go kam. (Em long 1987 taim Asembli of God lotu i kam nupela long Madang.)

I no long taim nau na Joe i baim wanpela gutpela liklik ka (teks) long wanpela waitmeri husat i pinis taim. Dispela ka em i gutpela tru. Joe i tok dispela olgeta samting i kamap long strongpela bilip bilong em olsem God Papa i stap wantaim em, na olgeta samting em i driman long mekim bai kamap tru.

I no longtaim Joe i tingting long baim wanpela bas na mekim wok PMV liklik. Em i go lukim wanpela nupela 15 sita bas we i kos K18,000. Em i go salim dispela teks bilong em long K7,000, na benk i givim em dinau long K11,000. Olgeta samting i stret nau. Yumi ken tok dispela taim nau 'mama i karim Manui bas lain' o stat tru bilong bisnis bilong Joe.

Manui em i nem bilong ol lain wan pisin bilong em. Long tokples bilong Saikisi long Marpik eria bilong Is Sepik 'manui' em kumul ol kumul man.

Na 'kaprai manui' em kumul meri. Dispela tupela nem i save stap long olgeta bas bilong Joe long soim olsem em i kamap long lain bilong em yet o papa (manui) na tu ol lain bilong kandre bilong em (kaprai).

Long 1987, Manui bas lain i namba wan long ronim wanpela 15 sita bas long Madang na Lae rot. Bipo i bin gat ol bikpela bas tasol.

Dispela wanpela bas i no save malolo. Joe i tok long wanpela de, em i ken lusim Madang, go kamap long Lae, kam bek long Madang na long apin-un tru, go na slip long Lae. Tulait bai em i wokim wankain wok gen.

Long dispela hatwok na dinau bilong em i pinis long 9-pela mun tasol, na i no 12-pela mun we benk i makim. Olsem na benk i givim (long lis) wanpela liklik bas gen. Wok bilong dispela nupela bas tu i kamap gut. Olsem na Joe i pinisim olgeta pe bilong em na i papa long en tu.

Joe i tok em i lusim olgeta samting long han bilong God na bilip strong long em. Olsem na long 1992, wok i ron gut tru na Joe i baim 6-pela bas olgeta na putim long Madang na Lae haiwe.

Na tu em i bin wokim tripela gutpela haus; wanpela long Lae, wanpela long Kesawai long Ramu haiwe, na

narapela long Sisiak 2 yet hia long Madang.

Maski bisnis i go bikpela, Joe i no givim baksait long wok bilong lotu. Em i wok long helpim yet sios bilong em.

Dispela taim nau ol narapela PMV bisnismen i luksave olsem ol pablik i save laik ron long liklik bas moa long ol bikpela bas. Olsem na ol i stat lusim ol bikpela na baim ol liklik bas.

Long wankain taim tu, planti asua i kamap long provinsel len trenspot bod we i nogat gutpela lo i banisim ol wok PMV. Olsem planti kainkain pipel i baim bas na ronim, na i no bihainim stret lo bilong ronim PMV.

Olsem na bisnis i wok long go daun isi isi. Joe i lukim olsem na salim 4-pela bas bilong em. Manui bas lain na i gat tupela bas tasol na wanpela trak we i save givim sevis long ol lain long Kesawai.

Joe em i vais president bilong Madang PMV Asosiesen nau. Bikpela tingting bilong Joe em long stretim olgeta wok bilong PMV, na bai ol bisnismen na meri i mas bihainim stretpela rot bilong wok bilong helpim ol yet, na ol pablik husat i save ron long ol PMV.

"Taun bilong mipela em i wanpela turis taun. Na mipela i mas gat gutpela na klipela bas sevis bai ol manmeri i kam long narapela ples bai laik tu long raun long ol PMV."

## Meri Sepik strong long kambang na lukautim famili



• Mama Rosa i holim stik na rausim ol sel kina long pala.

## ADDY LAVAKS i raitim

WANPELA lapun meri bilong ples Koboibus long Wes Yangoru, Is Sepik nem bilong en Rosa Kimiu em i wanpela hap meri tru long pasin bilong kukim ol sel kina long wokim kamap olsem kambang long salim long maket na lukautim 4-pela pikinini bilong en.

Rosa Kimiu i tok em i bin lainim dispela pasin i go moa long pes 15

## SKRUIIM TOK

### Lep i go long rait

2. MP bilong Nuku
7. Meri Buka o Baka-di
9. Bos bilong stesin
10. Somare, Narakobi, na Yauwiga, em tripela
12. .... Taiwan
14. I no inapharim
17. Wanpela kain pis
18. Poroman
19. Stap ... !
20. Klap bilong ol eks sevisman
22. Wests, Royaks, na Tikima, Tarangau, em tripela bilong ragbi
23. Wanpela lotu
25. Bikpela kus, em i .... bilong ol man i save smok tumas
27. .... Tedi
28. Bel bilong mi ...., olsem na mi laik traat

30. Bikman bilong ol Simbu
31. NBC bilong Australia
33. OIC
35. Man i kamapim yu
37. Singsing em bun bilong ol NSP
41. John Paul 2
43. Kisim samting i no bilong yu
44. Givim moni long wok


### Antap i go daun

1. Julius Chan, em ... PM bilong PNG
2. I no gat planti kaikai, olsem na yu mas ... gut
3. Wanpela kain diwai
4. Wanpela politikal pati
5. Burns Philp
6. Wanpela pis, bodi

- bilong em i olsem plet, na i gat longpela tel
8. MP bilong Kairuku-Hiri
11. Wara bilong kaikai i kuk pinis
13. "Harim gutpela ... bilong Kalibobo"
14. Ol Tolai i save stailim gras bilong ol
15. Ol lain i bung las wik long Rabaul
16. Longpela man
19. Jisas ....., "I no gat wanpela man inap holim wok bilong tupela bosman wantaim."
21. Binatang nogut i gat planti lek
24. Long taim bilong singsing, ol Madang i save putim dispela bilas long maus
26. Wanpela kain diwai

28. Sapos yu no ...., mi no inap save long tingting bilong yu
29. "Kekeni .... mase"
32. Wanpela kain diwai bilong sapim kundu long em
34. Tenkyu
35. Box bilong opis i lukautim ol telepon na pos opis
36. "Wanpela meri, raitim ... long mi"
38. Bilas bilong ht bilong ol NSP man bipo
40. .... i save bruk long nambis
42. Paias Wingti

Ansa bilong skruim tok long pes 19



# Nem misinari lusim kantri

VERONICA HATUTASI I raitim

WANPELA pes misinari long Maprik eria insait long Is Sepik provins i lusim kantri las wiken, Sarere Desemba 17.

Dispela em bihain long em i lusim 33 yias long kantri, mekim misinari wok wantaim Saut Si Evanjelikal Sios long helpim ol pipel i kisim Tok bilong God. Na tu long kisim ol arapela sevis olsem helt na edukesen i go long ol pipel.

Misinari ya em wanpela meri Nu Silan. Nem bilong en em Kathleen Wilson na em i gat 63 krismas. Em bin kam long PNG long 1961, taim em i gat 30 krismas tasol.

Stat long dispela taim, em wantaim narapela misinari meri bilong Jemeni na wanwok bilong em, i beis na wok long Ilahita eria insait long Maprik distrik, Is Sepik provins.

Mis Wilson i bilong Oklen, Nu Silan. Em i tokim *Wantok Niuspepa* olsem em i bilip long PNG na pipel inap long lukautim ol afeas long kantri bilong ol ol yet. "Papua Niugini em i wanpela gutpela kantri wantaim planti gutpela samting moa we bai i kamap long em long bihain taim. Dispela bai i kamap sapos ol pipel na ol lida long gavman i putim God pastaim long laip bilong ol," Mis Wilson i tok.

"Planti gutpela samting i kamap nau long kantri, tasol mi sori long lukim korap na

griti pasin i stap long bel bilong ol planti lida. Tasol i gat ol narapela gutpela lida wantaim gutpela tingting na pasin husat bai i lidim kantri long gutpela rot long bihain taim," Mis Wilson itok.

Taim em i kam long kantri long 1961, koloniel gavman bilong Australia i lukautim PNG. Stat long dispela taim, Mis Wilson i lukim planti senis i kamap long sait bilong ol sios, politiks na long sindaun na laip bilong ol pipel.

"Long sait bilong lotu, mi lukim ol sios i gro na nau, planti ol asples pipel yet i holim ol bikpela wok. Na wankain tu long gavman.

Long helt bilong ol pipel, mi lukim olsem bikpela impruvmen i kamap. Stap bilong ol mama na pikinini i go gutpela na planti pikinini i stap laip taim mama i karim ol, winim ol taim bipo we planti mama na pikinini i save dai. Mi lukim impruvmen long Is Sepik yet na tu long olgeta hap bilong kantri. Bikos long hatwok bilong gavman, ol sios na komyuniti, stap na sindaun bilong ol mama, pikinini na kantri i go gut," Mis Wilson i tok.

Ples we Mis Wilson i sindaun pastaim long em taim en em Brugam Misin stesen long Ilahita eria, Maprik, Is Sepik provins. Olsem wanpela misinari nes, em na narapela wanwok bilong em long Jemeni i kirapim wan-



□ Kathleen Wilson i sanap long fran bilong Kristen Lidasip Trening Kolis, Morata.

pela etpos bilong lukautim ol mama na pikinini. Na ol arapela kain sik tu. Nogat skul long hap na ol i kirapim tu ol literesi klas bilong ol bikpela manmeri na tu long ol pikinini. Maski populesen long Ilahita eria i bikpela moa, tupela misinari i wok hat na lukautim ol pipel long wanem kain wari ol i gat.

"Long dispela taim tu, wok bilong ol sanga, tambaran na posinman ino isi. Ol pipel i pret tru long ol. Yu ken

pilim tu ol wok bilong pasin tudak i strong taim yu wokabout long hap. Tasol ol lain ino bagarapim wok bilong ol misinari. Ol i larim mipela i go het wantaim ol progrem bilong mipela, "Mis Wilson i tok.

Long 1973, Mis Wilson i trense i go long Dreikikir eria na kamap tisa long Baibel skul bilong ol meri long Yagrumbok. Em i skulim Baibel na ol praktikel sabsek long ol meri. Em long somap

na kuk. Long tenpela yia olgeta, em i wok long dispela hap inap long em i trense gen i go long Banz, Westen Hailans.

Long eitpela yia inap long em i lusim kantri las wiken, em i tisa long Kristen Lidasip trening Kolis. Em i speselais long wimens ministri we em i skulim ol mama na ol yangpela meri long ol teks bilong Baibel. Dispela em long Tok Pisin ns Inglis.

Bikpela hap em i wokim na lusim kantri em long tanim sampela hap long buk Baibel i go long Tok Pisin. Dispela wok, em i tok, bai em i go hetim long Nu Silan.

"Long planti we, mi sori long lusim kantri we mi stap long pela taim long em, stat yet long taim mi yangpela. Mi sori long lusim ol pipel we mi laikim tumas. Bai mi misim ol gutpela poroman na kantri we mi laikim tumas.

Bai i hat long mi long sindaun bek long ples stret bilong mi. Bikos mi lusim bipo tru na planti senis i kamap. Tasol famili bilong mi i stap na ol bai i helpim mi gut long dispela," Mis Wilson i tok.

Wanpela samting Mis Wilson i amamas long lukim bipo long em i lusim kantri em long save olsem em i help long planim Tok bilong God long dispela kantri. Na dispela samting i karim kaikai nau.

## Meri Sepik strong long mani bilong kampung

1 kam long pes 14

bilong kukim kambang long ol sel kina long 1984, taim em i bin lusim ples na kam stap long Kaindi wantaim susa bilong en.

Taim em i bin stap long Wewak, em i bin bungim wanpela wantok man long ples arere tasol long ples bilong en long Koboibus, na tupela i bin marit.

Man ya nem bilong em Mathew Valahul. Na em i bilong ples Aigulim, klostu tasol long Koboibus.

Long marit laip bilong tupela, tupela i bin marit long 1952 na man bilong en i save wok wantaim PTC long dispela taim olsem wanpela linesman.

Em i bing stap gut tru wantaim man bilong en i kam inap long 1990 taim man bilong i lusim em na go. Bikos long sampela ausa long marit laip bilong tupela.

Man ya i bin lusim 4-pela pikinini wantaim bihain long em i lusim Rosa Kiniu.

Long dispela taim em i painim hat taim olsem em bai lukautim ol pikinini bilong em olsem wanem.

Tasol em i laki olsem em i bin save pinis long pasin bilong kukim sel kina long kamapim puna yumi kolim kambang, em i kirap na stat long wokim diwpela wok long painim liklik moni long baim kaikai. Na lukautim ol pikinini bilong en long stap bilong ol insait long Wewak taun.

Long wokhat bilong en long kukim kambang na em save baim skul fi bilong wanpela pikinini man bilong em husat i wokim gret 3 nau long Manguil Komyuniti skul long Wewak taun.

Rosa i save spenim K10 long baim 25 kilogrem bag kina sel long ol Murik Lake manmeri husat i sindaun long Namba 2 basis setelment, arere tasol long nambis bilong Wewak taun.

Na tu em i spenim arapela K2 gen long baim pangal long kukim sel kina bilong em.

Narapela samting tu em, niuspepa em i save baim niuspepa gen long pasim kambang bilong en.

Em i save spenim olsem K1 long baim mekpas niuspepa, na taim em i salim olgeta kambang bilong en pinis, em i save wokim moni inap long mak bilong K30.

Dispela i olsem K15 win moni bilong olgeta hatwok em i wokim long baim ol sel kina pangal, na niuspepa long wokim na pasim kambang bilong en long salim long maket.

Em i tok tu olsem i no em tasol i save wokim dispela wok. I gat planti meri bilong ol arapela ples insait long Is Sepik yet i save long pasin bilong wokim na salim kambang.

Kambang em i tok i abus tru bilong buai na daka long wokim buai i kamap ret.

Dispela pasin bilong kukim kambang i bilong bipo bipo tru long taim bilong ol tumbuna, na dispela pasin i no lus yet.

Em i tok i tru olsem em i wokim dispela wok bilong kambang bikos em i les long lukim ol pikinini bilong en i wokabout raun wantaim hangre.

"Man bilong em i lusim mi nau long 4-pela yia olgeta, na long strong bilong. Bikpela i givim strongpela tingting long mi, olsem, mi inap long lukautim na lukim olsem ol pikinini bilong mi i ken kamap bikpela na kisim wankain save olsem ol arapela pikinini.

"Strong na wokhat bilong mi bai karim kaikai wanpela de," lapun Rosa i tokim Wantok niuspepa.



■ Wanpela Sande Kanage i go lukim kik resis bilong Pablik Sevis soka long Bisini soka graun long Mosbi. Em i go sindaun i stap na wok long lukim ol meri long Dipatmen Bilong Praim Minista i wok long mekimsave wantaim ol meri long DCA. Ol i pilai go na wanpela paul pasin i kamap namel long tupela meri-wanpela bilong DCA na arapela bilong DPM. Paul pasin ya i olsem tupela meri pas wantaim na bal i stap namel long tupela long bros. Na tupela i wok long tromoi lek nating daunbilo long graun long kikim bal. Samting ya (bal) i pas namel long bros bilong tupela na stap. Kanage lukim tupela susa ya i wok long tromoi lek nating daunbilo long graun na em i kirap singautim i go long refiri olsem: Wisilman, plis sekim tupela susa ya.

Lek bilong tupela i wok olsem masin bilong katim timba long kikim bal o i wok long kros pait long samting ya...em ya samting ya...ol i kolim raba i stap we, em ya raba i stap ya. Ol arapela manmeri harim Kanage tok olsem na olgeta i painim hat stret long lap.

Soccer Watcher  
MOSBI

□ Kanage i go painim buai long maket i stap na lukim wanpela yangpela meri Hula long Sentral provins. Em nau boi nogut kirap na saltim ai long dispela yangpela meri Hula. Kanage saltim ai long meri ya i go nogat na wokabout i go na tokim em: Plis, mi laik waswas long raun wara bilong Hula ya. Meri ya kisim mining bilong tok pisin bilong Kanage. Olsem na em i kirap na tokim Kanage: Yu yet skelim. Sapos yu pilim na ting olsem win bilong yu i longpela, orait yu ken traim. Bikos raun wara bilong Hula i bikpela moa na sapos yu suvim i go daun, yu bai sotwin long hap rot. Kanage tu ya, man i gat namba long tok pisin ya. Olsem na em i kirap na tokim dispela meri Hula: Yu save long pukpuk bilong wara Sepik tu o nogat. Em i no save sotwin. Bikos raun wara em asples bilong em. Tasol mi gat bikpela wari olsem sapos pukpuk nogat i go daun long raun wara bilong Hula, plis no ken ting olsem em bai kam antap bek hariap. Em bai stap i go inap em i pilim olsem wara i laik drai nau em bai kam antap. Wanpela poroman bilong Kanage harim Kanage tok olsem na em i tok: Kanage yu no man ya. Ating yu mas wanpela hapkas automatik na warametik pukpuk.

PS Origin  
MOSBI

□ Kanage spak nogut tru na wokabout i go long haus. Long hap rot na em i bungim tupela yangpela meri Tari. Em nau Kanage kirap na askim tupela: Yes tupela, yutupela i laik go long wanem hap? Tupela meri Tari ya kirap na tokim Kanage: Yu askim mitupela long wanem samting. Yu no inap pasim maus bilong yu na go long haus bilong yu. Kanage i no wari, em i kirap na tokim tupela meri Tari ya olsem: Mi no askim yutupela long kros, mi askim tasol. Nogut yutupela i gat laik long dring sampela bia na bihain mipela i ken pasim tingting long bai mipela mekim wanem samting. Tupela meri ya skelim toktok bilong Kanage i go na i no stret. Na wanpela i kirap na tokim arapela: Wi yagra wantok o, em i giaman long sifakim mitufera na bihain em bai hensafim bodi firong mitufera. Kanage harim meri ya i tok olsem na em i lap i go na aiwara i pulap long ai bilong em na em i go long haus.

Confuse Yagra  
KIMBE

**Moa tok pilai long pes 19**



# Big Bro REBO



# Spak MAIK





## Ol manki i stori long Krismas

FRANK MIHALIC i raitim

**KRISMAS** na ol manki pas gut wantaim. I gat kalf kain stori blong tupela wantaim. Nau mi autim sampela stori i stap long wanpela buk mi bin raitim. Ols stori i go olsem.

Wanpela rellisen tisa i laik bai ol liklik skulbol na skulmeri i mas bringim wanpela liklik presen bilong givim long Bebi Jisas long Krismas De. Tisa is putim wanpela katon long kona bilong klasrum na ol manki ya i mas putim presen bilong ol wan wan i go long katon.

Orait, bihain long sampela de, tisa i lukstil long katon ya na em i lukim ol dispela samting i stap insait: wanpela tin susu, wanpela liklik belo, wanpela nepl, na wanpela kala poto bilong Jisas Kris i King. Tisa i askim nabaut na em i painiaut husat i bin putim dispela poto long katon. Na em i askim, "Anton, bilong wanem na yu laik givim dispela poto bilong Krai i King i go long bebi Jisas?"

Anton i bekim tok olsem: "Mi laik soim em, em bai luk olsem wanem long taim em i groap pinis."

Wanpela liklik meri i poromanim lapun smolmama bilong em. Tupela is go long wanpela so, we ol wan wan lain pipel i resis long wokim haus bilong Betlehem long laik na stail bilong ol. Long olgeta haus ya i gat ol liklik kav-ing i makim Maria na Josep na Jisas. Liklik meri i lukim ol haus ya na em i askim smolmama olsem: "Bilong wanem na Jisas i no save groap? Long olgeta yia em i stap liklik bebi tasol, em i wanpela sais tasol."

Wanpela mama na wanpela liklik meri i lukim ol piksa long niuspepa, we ol i tok gris long o kain naispela presen bilong Krismas. Meri i tok. "Mi laikim dispela bikpela retpela wilwil."

Mama is tok, "Nogat; i no yet. Yu mas groap pastaim."

Bihain em i lukim planti arapela naispela presen, tasol olgeta taim mama i gat wankain tok, "I no yet. Yu mas groap pastaim."

Orait, tupela i lukim ol piksa long niuspepa pinis, nau tupela i putim pepa i stap. Nau mama i tanim long liklik meri na i askim, "Yu tok nau. Yu laikim wanem presen bilong Krismas?"

Liklik meri i tok, "Mi laik groap hariap."

I gat wanpela boi em i stap long wanpela famili i ris tru. Boi ya i gat olgeta kain samting bilong pilai. Rum slip bilong em i pulap tru long kamera na televisen na video na radio na wilwil samting. Maski em i yangpela yet, em i bin flai na lukim planti arapela kantri pinis.

Long wanpela de long apinun, em i sindaun wantaim papa na mama na tripela i lukluk long televisen. Tripela wantaim i sindaun na i sarap i stap. Long olgeta taim we boi laik askim papamama long kain kain samting, ol i sarapim em na i tok, "Maski nau. Toktok bilong yu i paulim program. Bihain bai yumi ken toktok."

Orait, program i pinis, nau papamama i askim boi ya, "Yu laikim wanem kain presen bilong Krismas?"

Na boi i tok, "Mi no save; mi inap pinis long olkain samting."

Olsem na papamama kisim em i go long supamakem bai em inap lukim planti samting moa, na bai bel bilong em i ken kirap long wanpela present. Tripela i wokabut i go i go, na ai bilong ol i pen long lukluk. Tasol boi i les pinis. Nau papamama i askim em, "Yu laikim wanem presen TRU bilong Krismas?"

Tasol boi ya i no bekim tok stret, em i bekim long wanpela stori. Em i stori olsem long tupela, "Yutupela i save pinis, long taim yutupela i no stap, mi save go visitim wanpela lapun i save sapim diwai. Man ya i larim mi helpim em long wok; mi save brumim woksap bilong em; mi save rausim skin bilong diwai. Na bihain mitupela i save kisim win na sindaun dringim kopi na stori na skrapim tok i go. Long tumora bai mitupela i wokim wanpela liklik krip bilong Krismas...."


Lapun ya i save smokim wanpela paip na oltaim em i dri-man long kisim wanpela spesel kain paip. Bai mi hepi long baim dispela kain paip na givim long em long Krismas. Long wanem, mi amamas long dispela lapun: oltaim em i gat taim bilong sindaun toktok wantaim mi."

Papa na mama i harim dispela hap tok bilong boi bilong ol, na tupela i tingting planti....

Tasol em i skruim tok i go olsem: "Long taim lapun ya i mekim wok kaving bilong ent, oltaim em i save stori na toktok long mi. Mi laikim tumas sapos yu na papa i ken mekim wankain, na yutupela i ken givim taim na spes na toktok wantaim mi. Em bai gutpela Krismas presen tru."

Nau papa na mama i kisim save pinis: boi ya i laikim wanpela present em tupela i no inap baim long stua. Em i laik bai tupela i ken presen long sampela taim bilong laip bilong tupela. Em i wanpela samting tupela i no inap long baim; tupela inap givim tasol. Em i wanpela presen tru; i no gat narapela inap long en.

## Olpela biknem raskol autim bilip bilong rispektim wanpela na narapela



• Biwa long lephan i sindaun stori wantaim wanpela poroman bilong em.

EDDIE SAUNDERS i raitim

BIWA GETA em wanpela man i gat bikpela nem bipo long raskol pasin. Tasol em i senisim pasin pinis na i safen, Morobe provins. Em i bin kam long Mosbi klostu wanpela mun olgeta long traime streim rot bilong gut-

Dispela pikinini man em Biwa i no bin lukim na i kamap bikpela boi nau. Bikos planti krismas, Biwa i slip long haus kalabus.

Biwa i tok em i laikim meri bilong em tumas.

bilong tupela.

Biwa i lusim Mosbi na go bek long Lae long Fraide Desemba 9.

Wantok i bin bungim Biwa na stori liklik wantaim em, bipo em i go bek long Lae.

Biwa i tok hevi i kamap long ol ples na kantri tu. Bikos ol manmeri yet i mekim hevi i kamap. Na bikpela samting em rispek na belisi. Na tu harim na luksave long wari na hevi bilong wanpela narapela na brata susa.

"Dispela gutpela Kristen pasin mi tok long en em pasin bilong mipela Papua Niugini. Tasol gridi pasin i bin bagarapim gutpela

pasin bilong mipela ol pipel bilong Papua Niugini, na tu long Melanesian," Biwa i tok.

Biwa yet i luksave long dispela. Na nau em i wok long go raun na autim gutpela toktok long ol pipel, na tu long ol arapela husat i mekim raskol pasin yet.

"Wanpela i mas soim long narapela. Sapos grasrut soim rispek long bikman na meri, orait ol bikman na meri i mas soim rispek tu long ol grasrut pipel. Dispela bai bringim gutpela sindaun long Famili na ples na kantri bilong mipela".

Biwa i lukim nau olsem planti pipel i soim gutpela rispek long em. Biwa i tok ol pipel i mekim olsem bikos em yet i soim rispek long ol.

"Wanpela i mas soim long narapela. Sapos grasrut soim rispek long bikman na meri, orait ol bikman na meri i mas soim rispek tu long ol grasrut pipel. Dispela bai bringim gutpela sindaun long famili na ples na kantri bilong mipela," Biwa i tok.

## "Dispela gutpela Kristen pasin mi tok long en em pasin bilong mipela Papua Niugini. Tasol gridi pasin i bin bagarapim gutpela pasin bilong mipela ol pipel bilong Papua Niugini, na tu long Melanesian."

tok em i taim nau bilong rispektim wanpela na narapela.

Biwa i bilong liklik ples Grunko long Fin-

pela sindaun wantaim famili. Em i gat meri na wanpela pikinini man, husat bai go long hai skul neks yia.

Bikos long 10-pela yia taim em i stap long haus kalabus, meri i tingim Biwa yet, na lukautim gut pikinini

## Is Sepik pipel mas sutim tok long ol yet

ADDY LAVAKS i raitim

OL pipel bilong Is Sepik i mas sutim tok long ol yet na provins i no develop. Dispela em toktok bilong Provinsal Minista bilong Lokol Gavman, Eric Wangihau i tok olsem.

Dispela em long Fraide Desemba 17, taim ol pipel bilong ples Pachen long Is Yangoru i kisim nupela wara saplai bilong ol. Wara saplai em Yuropan Ekonomik Komyuniti wantaim sapot bilong provinsal gavman na ol pipel yet i putim kamap.

Mista Wangihau i tok planti bikpela bung toktok, ol bikpela semina, ol yut reli o bung, bung bilong ol sios, na planti kain kain bung, kibung

na semina i bin kamap pinis, na planti i wok long kamap yet na planti bai kamap long bihain taim.

Ol dispela kain bung i kamap planti tru namel long gavman, sios na praivet bisnis kampani nau yet insait long Is Sepik provins long yia 1994.

Wanem tru i astingting bilong ol dispela kain bikpela bung na semina i wok long kamap insait long Is Sepik provins, na tu ol arapela provins insait long Papua Niugini tude.

Namba wan samting bai yumi toktok long en tude em ol samting provinsal gavman bilong Is Sepik i bin kamapim pinis na ol nupela rot, save, na wok we em i traime long kamapim. Tasol i nogat gut-

pela luksave na helpim i vave kam long ol praivet bisnis kampani, sios, ol grup husat i no wok aninit long nem bilong gavman o Non Gavman Ogenaisesen, na ol bisnisman meri bilong provins.

Ol dispela semina gavman wantaim praivet bisnis kampani i save putim kamap i no bilong grisim ol manmeri o bisnis insait long provins long stilim moni bilong ol. Nogat. Em i bilong paitim toktok na kisim klia luksave long pasin na we bilong wokim moni i kam insait long provins long kamapim developmen.

Planti pipel nau na long bipo long Is Sepik provins i tok Is Sepik provins i no develop liklik. Em i stap wankain tasol na nogat wanpela bikpela samting i kamap long senisim

provins liklik.

Ol pipel bilong Is Sepik yet i save askim olsem. Na ol i laik gavman bai bekim dispela askim bilong ol.

Moabeta yupela ol pipel i mas stap long askim ol dispela kain kwesten. Bikos yupela yet i asua bilong nogat developmen long provins.

Taim gavman i save paitim toktok insait long ol kain bikpela semina long luksave long wanem kain wok developmen bai gutpela long ol pipel bilong em, na bihain i laik karimaut wok, ol pipel yet i save bagarapim na sefim tru mani we gavman i makim stret long mekim dispela wok i kamap.

# MUSIK NA TELEWISEN

PAPUA NIUGINI



## Nupela kaset bilong biknem Reks ben singa redi long kam aut

BONGAS Ngango husat i save singsing long Reks ben bilong Finsafen i redi long salim aut nupela kaset bilong em long Januari neks yia. Nem bilong nupela kaset bilong Bongas em; 'I love Wopa Country'.

Insait long nupela kaset ya, Bongas i singim planti gutpela song long tokples Finsafen na tu long ol tok pisin. Sampela bilong ol song ya em; Gomangna, Riong me na Soldia boi we i gat bilip olsem bai kirapim bel bilong planti manmeri husat i save bihainim nek bilong em wantaim Reks ben kaset.

Bongas i bin katim dispela kaset long mun Mas long dispela yia pastaim tasol long em wantaim ol ben memba bilong em i katim nupela kaset bilong Reks ben aninit long nem; Kantri bilong yumi. Taol long ol stua bai yu lukim kaset bilong Reks i stap pinis na bilong Bongas yet i no kam aut yet.

Bongas i tokim Wantok olsem em i gat as long katim dispela kaset bilong em yet. Em i sot long moni long stretim sampela hevi bilong em long ples Finsafen olsem na em i kamapim dispela rot long pulim liklik moni

long helpim em long stretim ol hevi bilong em.

Krai bilong ol musik i bihainim Reggae, Rock na sentimentol we i ken givim ol manmeri bilong laikim musik ol kain kain krai bilong musik long harim na laikim.

Nau Bongas i stap long Mosbi long stretim wanpela muvi piksa (vedio cliff) we bai i go wantaim musik bilong em. Song em bai singim wantaim dispela muvi we EMTV i wok long stretim em; 'I Love Wopa Country'.

Bongas i tok olgeta piksa bilong dispela muvi em long Lae siti. Ol i kisim ol piksa long ol samting we singsing i tokaut long en na piksa i soim tu taun bilong Lae siti na ol samting i stap long en.

Bongas i tok olgeta long EMTV Fizz program bilong musik, ol manmeri i save lukim ol kain kain provins na ol taun bilong em. Olsem na em i laik soim tu Lae siti long dispela piksa klip bilong em bikos Lae i no save wanpela taim long ol musik piksa long EMTV.

Taim Bongas i liklik boi yet na i stap long ples, em i save pilai kulele. Em wantaim Caspar husat tu em i go moa long pes 20



• Bongas Ngango

## I KAM LONG Ela Motors

OL WIL BILONG NESEN

### AMERICAN TOP FORTY

AS AT 05/11/94

CUR.	TITLE	ACT NAME
1.	I Swear	All-4-One
2.	Don't Turn Around	Ace Of Base
3.	I'll Remember	Madonna
4.	You Mean The World To Me	Braxton
5.	Stay (I Missed You)	Lisa Loeb
6.	Mr Jones	Counting Crowe
7.	If You Go	Jon Secada
8.	Baby I Love Your Way	Big Mountain
9.	Any Time, Any Place	Janet Jackson
10.	Anytime You Need A Friend	Mariah Carey
11.	Return To Innocence	Enigma
12.	The Most Beautiful Girl	Prince
13.	I'll Take You There	General Public
14.	The Sign	Ace Of Base
15.	Moving On Up	M People
16.	Misled	Celine Dion
17.	Shine	Collective Soul
18.	Wild Night	Mellencamp
19.	Crazy	Aerosmith
20.	Found Out About You	Gin Blossoms
21.	I'm Ready	Campbell
22.	Until I Fall Away	Gin Blossoms
23.	Can You Feel The Love Tonight	Elton John
24.	Always	Erasure
25.	Back And Forth	Aslyah
26.	Come To My Window	Melissa Etheridge
27.	Prayer For The Dying	Seal
28.	Beautiful In My Eyes	Joshua Kadison
29.	Whatta Man	Salt-N-Pepa
30.	Meat	B.C. 52s
31.	Objects In The Rear View	Meat Loaf
32.	Regular Thang	Ovis
33.	Mmm Mmm Mmm Mmm	Crash Test Dummies
34.	Losser	Back
35.	I Wich	Gabrielle
36.	Without You	Mariah Carey
37.	Centsloop	Us3
38.	Now And Forever	Richard Marx
39.	Ain't Got Nothing If You	Richard Marx
40.	Fall Down	Toad The Wet

## EMTV TELEWISEN

THURSDAY 22ND DECEMBER	
2.57	STATION OPEN
3.00	KIDS KONA (G)
4.00	WACKY RACES
4.30	HOT SCIENCE
5.00	CHRISTMAS SPECIAL
5.27	EMTV TOK SAVE
5.29	EMTV NEWS BREAK
5.30	HOME AND AWAY (G)
6.00	NATIONAL EMTV NEWS
6.30	A CURRENT AFFAIR (G)
7.00	LOTTO DRAW
7.02	POT OF GOLD
8.00	FIZZ (G)
9.00	SMALL BUSINESS SHOW
9.30	OUR HOUSE/LOOKING GOOD
10.30	A COUNTRY PRACTICE
11.30	NATIONAL EMTV NEWS REPLAY
11.57	MEDITATION WITH PASTOR WALO ARNI
12.00	STATION CLOSE
FRIDAY 23RD DECEMBER, 1994	
2.44	STATION OPEN
2.47	EMTV TOKSAVE
2.50	VIDEO CLIP
2.53	EMTV CHRISTMAS

SHOPPING GUIDE	
3.00	KIDS KONA
4.00	WACKY RACES
4.30	HOT SCIENCE
5.00	CHRISTMAS SPECIAL
5.27	EMTV TOK SAVE
5.29	DAY BREAK NEWS
5.29	EMTV NEWS BREAK
5.30	HOME AND AWAY
6.00	NATIONAL EMTV NEWS
6.30	A CURRENT AFFAIRS
7.00	POT OF GOLD
7.28	LOTTO DRAW
7.30	NEIGHBOURS
7.58	SINGER DRAW
8.00	MAZDA JACK
8.57	EMTV TOK SAVE
9.00	FRIDAY NIGHT MOVIE "Iron Eagle"
10.45	CHRISTMAS SPECIAL
11.15	NATIONAL EMTV NEWS REPLAY
11.45	CHRISTMAS OTORIO
12.12	MEDITATION WITH PASTOR WALO ARNI
12.15	STATION CLOSE
SATURDAY 24TH DECEMBER,	
2.57	STATION OPEN
3.00	KIDS KONA

4.00	WACKY RACES
4.30	HOT SCIENCE
5.00	CHRISTMAS SPECIAL
5.27	EMTV TOK SAVE
6.00	NATIONAL EMTV NEWS
6.30	A CURRENT AFFAIRS
7.00	LOTTO DRAW
7.02	POT OF GOLD
8.00	FIZZ
9.00	THE SMALL BUSINESS SHOW
9.30	OUR HOUSE/LOOKING GOOD
10.30	A COUNTRY PRACTICE
11.30	NATIONAL EMTV NEWS REPLAY
11.57	MEDIATION WITH PASTOR WALO ARNI
12.00	STATION CLOSE
SUNDAY 25TH DECEMBER, 1994	
2.57	STATION OPEN
3.00	KIDS KONA
4.00	WACKY RACES
4.30	HOT SCIENCE
5.00	CHRISTMAS SPECIAL
5.27	EMTV TOK SAVE
5.29	EMTV NEWS BREAK
6.00	NATIONAL EMTV NEWS
6.30	A CURRENT AFFAIRS



7.00	LOTTO DRAW
7.02	POT OF GOLD
8.00	FIZZ
9.00	THE SMALL BUSINESS SHOW
9.30	OUR HOUSE/LOOKING GOOD
10.30	A COUNTRY PRACTICE
11.30	NATIONAL EMTV NEWS REPLAY
11.57	MEDIATION WITH PASTOR WALO ARNI
12.00	STATION CLOSE

G - General Exhibition  
PGR - Parental Guidance Required  
M - Mature Audience

## PNG TOP TWENTY

AS AT 17/12/94

NO.	SONG	ARTIST
1 (1)	Rabaul Town	Barike
7 (3)	Ebony & Ivory	Wong/Bowman
2 (2)	My Bougainville	Dapsy Yapuc
3 (4)	My Love	L Kania
5 (5)	Sepik Meri	B Greg
0 (17)	Tariga lau	Painim Wok
3 (3)	Manus Island	K Lucas
6 (8)	Tapalan I Mosbi	K Lucas
8 (9)	Everything I Own	K Lucas
9 (10)	Kolwin	L Kania
14 (11)	Island Bougainville	Crew 5
10 (12)	Santu Teresia	P Pomahun
17 (13)	Lus Lain	Greg/Telek
19 (14)	Kantri Blong Yumi	Reks
12 (15)	Solwara Wasim	P Pomahun
15 (16)	Kure Maina Akoe	Greg/Telek
18 (17)	Spirit Of Peace	Cotton 22
16 (18)	Sare Sare	Jerediah
0 (19)	Missing You	Crew 5
20 (20)	Lukluk Raon	Leonard Kania

• Ratings based on requests on Radio Kalang and not cassette sales.

ELA MOTORS - OL WIL BILONG NESEN



# Nupela buk stori long taim bipo long hailans

"Andrew (Strathan) askim mi long laip stori bilong mi. Na mi stat stori stat long Wol Woa II taim mi liklik boi. Em i askim mi long laip i olsem wanem taim mi liklik boi, taim mi groa na kamap bikman, famili bilong mi, ol meri na ol tumbuna bung olsem Moka, na em (Andrew) i wok long putim i go daun long pepa. I kam inap nau, ol dispela stori i kamapim wanpela buk."

## ALPHONSE PU i raitim

OL komyuniti skul pikinini insait long Dei Kaunsil Eria bilong Westen Hailans bai nau i ken rit na painimaut moa long tumbuna kastom na bilip bilong ol, taim ol i stat skul long neks yia.

Wanpela buk aninit long het tok "Ru" i bin kam aut long Hagen long las wik Fonde. Buk ya em Ru Kundil bilong ples KUK insait long Dei Kaunsil Eria i raitim. Man ya i kisim 10-pela yia olgeta long raitim dispela buk, na Nesanel Risets Institut i pablisim.

Dei Lokol Gavman Kaunsil bai givim dis-

pela buk i go long ol skul. Presiden bilong Dei Kaunsil, Tai Kume i tokim olsem moa long 200 pipel husat i kamap long lukim buk i kam aut.

Bung bilong lukim buk i kam aut i bin kamap long Plumes and Arrows Hotel long Hagen.

Ru i gat 4-pela meri olgeta na 9-pela pikinini meri. Na Susan Snow em wanpela bilong ol dispela pikinini meri. Susan i kamap tu long bung na apim nem stret bilong papa bilong em.

"Planti bikpela samting i save kamap long

ples we i mekim papa bilong mi olsem wanpela bikman olsem man i maritim planti meri na i gat planti pik, papa long bikpela hap graun, save go pas long kilim ol pik na mekim Moka, dispela em wanpela bikpela samting em i bin

**"Mi no lukim wanpela gutpela as bilong dispela samting long namba wan ples. Tasol nau mi lukim olsem em i wanpela gutpela samting, na wanem helpim dispela buk i ken givim long ol pikinini bilong tude na bihain taim."**

kamap long famili bilong mipela. I gat planti samting long dispela buk we papa i nogat taim long tokim mipela olsem *Amb Kor* na ol trik bilong em long paulim planti meri.


Em i gutpela long lukim ol dispela samting i stap insait long buk. Na mi bilip ol dispela stori bai stap yet long ol pikinini bilong bihain taim long ritim na save." Snow i toktok isi olsem na givim susu long pikinini man bilong en, husat i gat tupela krismas nau. Pikinini man ya em wanpela bilong tupela tumbuna man bilong Ru.

"Gavman i no givim gutpela sapot long lukautim ol kastom na tumbuna pasin bilong Papua Niugini," Malcolm Culligan husat i putim aut dispela buk i tok olsem. Em i sutim tok long ol olupela na tude gavman long lus tingting long dispela bikpela eria tru. Na em i tenkim Nesanel Risets Institut husat i mekim bikpela wok long buk ya i kam aut. Dispela buk i stori long planti kastom na tumbuna pasin em i lus

hariap nau, bikos long kam insait bilong ol nupela samting na pasin bilong ovasis.

"Em long dispela buk na ol pikinini bilong nau na bihain taim bai ritim ol stori bilong bipo na tude, na lukim we ol olupela pipel i lukluk long tude na bihain taim long ol tumbuna pasin na bilip," Mista Culligan i tok.

Ru Kundil i abrusim pinis 60 krismas. Na em i no-go long wanpela skul. Tasol em i raitim i stori na Profesa Andrew Strathan i tanim i go long inglis. Ru i rait long buk bilong em long ol sios na gavman na pawa bilong ol long tude, ol bisnis wok em i bin kamap long eria, ol bikpela bung bilong tumbuna olsem Moka, Amb Kor, marit, indai, na ol hevi long ples



• Long lephan i go long rait em Michael Mel, Ru Kundil, provin-sal seketeri bilong Westen Hailans, Malcolm Culligan na Dokta Wari lamo, dairekta bilong Nesanel Risets Institut. Ol foto: Don Niles.

Ru i tok.

"Mi no go long wanpela skul long raitim dispela buk. Na mi pilim ol arapela bikman long eria husat i gat

bilong bihain taim long hailans we i gat planti kainkain kastom na tumbuna pasin, we i wok long lus klostu nau. Olsem na ol pipel husat i save gut long ol dispela stori i mas putim hariap long buk olsem mi, em i tok.

"Dispela i no laip stori bilong Ru tasol. Nogat. Tasol em i wanpela samting ol pikinini bilong mipela i ken ritim na save long laip i stap olsem wanem long taim bipo," Dairekta bilong Nesanel Risets Institut, Dokta Wari lamo i tok.

Dokta lamo i tok moa olsem ol saveman husat i save stadi long laip bilong bipo long tumbuna taim i no inap stori gut long wanem

samting i kamap bipo. Bikos long kain kain senis em i wok long kamap klostu, wantaim kam insait bilong ol waitman. "Mipela i bilong dispela eria. Tasol mipela i no inap stori gut olsem Ru i stori long ol laipstail na environmen bilong bipo," Dokta lamo i tok.

I gat wanwan pipel tasol olsem Ru em husat i stap laip yet long tude. Olsem na em i gutpela longlukim stori na laip bilong ol i stap insait long kain buk olsem. Long dispela we, mipela ol yangpela i ken ritim na save ong sampela kastom na tumbuna pasin bilong bipo, na i ken karim i go het.

## Nupela kaset bilong biknem Reks ben

i kam long pes 18

ben memba bilong Reks i save pilai kulele wantaim na singim ol string ben song bilong ples. Taim em i lukim ol pawa ben olsem Memos na Guria ben i go pilai long Finsafen, bel bilong em i save kirap tru long pilai.

I gat wanpela ben long Fins we ol i kolim FIKAS. Dispela ben em ol manki long Finsafen, Kabwum na Siassi i save bung wantaim na pilai long en.

Wanpela taim Bongas i askim Lesley Tinga husat em wanpela ben memba bilong Fikas sapos em i ken lainim long pilai gita. Lesley i tokim Bongas long go long haus bilong em na lainim gita. Olsem na dispela taim Bongas i lainim gita aninit long helpim bilong Lesley

na Lesley i kisim em i go insait long Fikas ben. Caspar tu i joinim em long Fikas ben we ol i save pilai raun long planti hap bilong Morobe provins, Goroka, Madang na long Lae taun yet.

Bongas i tok em i ken tingim bek long wanpela taim we planti ben memba bilong Fikas i stat long marit na lusim ben. No gat man moa tasol Bongas, Caspar, Lesley na Don i stap olsem na ol i go het na holim Fikas ben i stap laip.

Bongas i tok ol i bin tingting long sensim nem Fikas bikos olgeta olupela memba bilong Fikas i no moa stap long ben. Olsem na ol i kolim Reks ben. Nem Reks em long tok pisin tasol as tingting bilong dispela nem em olsem

planti samting olsem gita, spika na dram i bruk bruk nabaut we ol i putim plastik na stikitep long en. Olsem na ol i putim nem ya long tok Inglis we ol i kolim Wreckers. Tasol ol i ting bai planti man-meri i no inap kolim gut nem ya o ritim gut olsem na ol i mekim sotpela tasol long putim nem Reks.

Reks ben i katim nambawan kaset bilong em long 1989 wantaim Pasifik Gol Studio long Rabaul.

Bongas Ngango i pinisim gret 6 bilong em long Gagidu Komyuniti skul long Finsafen na go long Fins Vokeseneni Trening skul. Tasol musik i pasim bikpela hap spes long het bilong em olsem na em i no pinisim trening bilong em vokeseneni skul ya.



• Ru Kundil i holim buk we piksa bilong em i stap long fran.

# Malala Sekenderi skul skoarim top mak long kantri



• Minista bilong Helt na Rijonal Memba bilong Madang, Peter Barter (lephan) wantaim Seketeri bilong Dipatmen bilong Edukesen, Jerry Tetage, long taim bilong greduesen.

MINISTA bilong Helt na Rijonal Memba bilong Madang, Peter Barter, i salim bikipela tok amamas long Malala Sekenderi Hai skul long Madang. Bikos ol studen bilong skul ya i kisim gutpela mak tru, winim ol arapela skul long Madang provins,

na tu long Papua Niugini wantaim.

Minista i bin mekim dispela toktok taim ol namba wan gred 12 studen i greduet.

Sisti wan (61) studen olgeta i greduet. Long dispela namba, 25 i winim pinis spes long Yunivesiti ov Papua

Niugini long Mosbi. Na narapela 27 i winim spes long Yunivesiti ov Teknoloji long Lae. Narapela 9-pela studen bai go insait long ol arapela bikpeal skul o koles insait long kantri.

Minista Barter salim bikipela tok amamas bilong em i go long ol

studen long skul gut, na kisim gutpela mak.

Bikipela tok amamas bilong Minista Barter i go tu long olgeta studen bilong 7-pela hai skul long Madang provins long skoarim gutpela mak tu long bikipela las tes bilong ol. Em i tok dispela i

soim olsem olgeta hai skul long Madang i skoarim hai mak long las skul tes bilong yia 1994. Maski ol skul i painim hevi bilong mani na i no wok gut.

Minista Barter salim bikipela tok tenkyu i go long ol tisa. Dispela em long gutpela hatwok bilong ol long skulim o lainim gut ol lida bilong kantri long bihain taim.

Minista Barter i tenkim tu ol studen yet long skul hat na skoarim gutpela mak.

## Fri skul

Minista Barter i tokaut long greduesen tu

olsem long bihain taim, ol pipel i noken yusim dispela hap tok "fri edukesen o fri skul" long ol helpim em gavman i givim long ol skul.

Em i tok i nogat wanpela samting long dispela graun em yu ken kisim fri. Tasol gavan bai givim subsidi i go long ol skul. Dispela em long helpim tasol ol papamama long baim skul fi. Tasol em i askim olgeta papama longf redi long baim skul fi.

## Tenkyu long ol Sios

Minista Barter i salim bikipela tok tenkyu i go

tu long ol Sios long bikipela wok ol i mekim long Madang provins, na tu long kantri wantaim. Em i tok Sista Jane Francis Millane husat i stap moa long 30 yia long Madang provins, na moa long 27 yia long Malala Hai skul i tisim planti manmeri bilong Papua Niugini. Planti bilong ol dispela manmeri i holim nau ol bikipela wok long kantri tude, dispela em long gavman na ol praivet kampani wantaim.

Nau yet Sista Jane i tisim pikinini bilong sampela olupela studen bilong em.

## Wari bilong Wasu Hai skul stret pinis



• Memba bilong Kabwum, Ginson Saonu i sanap long fran bilong nupela haus kaikai bilong ol studen.

### PETER KASIA i raitim

WASU Hai Skul long Kabwum distrik insait long Morobe provins nau em i ken amamas liklik. Bilong wanem sampela bilong ol hevi dispela skul i bin bungim insait long las tenpela yia krismas em nau ol i stretim.

Long ol toktok we memba bilong Kabwum, Ginson Saonu, i bin mekim, Wasu skul pastaim i bin bungim planti hevi. Na em i bin lukim na sori tru long dispela skul. Dispela em long yia 1993.

Ol dispela hevi we Mista Saonu emi bin toktok long en em ol ples bilong slip (dormitories), ples bilong kaikai (dining hall) na ples bilong waswas (ablution block) bilong ol sumatin. Ol dispela haus em ol i bin wokim long ol diwai bilong ples stret. Olsem na ol i bin bagarap long kwiktai tru.

Mista Saonu i tok taim em i go pastaim tru long Wasu Hai Skul em i no bin ting olsem em stap long wanpela hai skul, tasol em i bin ting olsem em stap long wanpela ples insait long ilektoret bilong em.

Tasol dispela ino istap olsem moa, bilong wanem long ol gutpela wok em Mr Saonu i mekim long dispela skul. Em i givim helpim i go long skul ia bilong wokim ol dispela niupela tripela haus we ol sumatin long skul em nau ol i wok long usim.

Memba i tok tu olsem i gat plen pinis bilong wokim ol niupela klasrum insait long skul we wok tru bai stap bihain tasol long niupela yia.

Long taim em i bin go opim ol dispela tripela haus long mun Septemba long dispela yia, Mista Saonu em i tokim ol papamama olsem ol i mas lukautim dispela skul bilong wanem em i bin kamap long hat wok bilong ol yet.

"Sapos yumi lukautim dispela skul na gohet wantaim gutpela tingting, plenim, daunim yumi yet na wok bung wantaim, mi tokim yupela bai yumi lukim ol gutpela kaikai bai kamap long skul bilong yumi," Mista Saonu i tok.

Long 1993 Mista Saonu em i bin tok kros liklik wantaim ol wokman bilong Provinsal Edukesen Ofis, long taim em i bin go lukluk raun long ilektoret bilong em, em i bin lukim ol dispela hevi istap long Wasu Hai Skul.

Mista Saonu long dispela taim em i bin tokim ol long saspandim Wasu Hai Skul na givim ol faiv pela dei bilong stretim ol dispela hevi.

Tasol ol bikbos bilong skul insait long Morobe provins na Mista Saonu ol i bin gat gutpela tingting na ol i mekim wanpela kibung bilong holim ol toktok bilong stretim ol dispela hevi, na maski long paitim na tok kros nabaut.

"Nau dispela i kamap tru stret," memba i tok long ol samting we ol i bin pasim long dispela kibung wantaim ol Edukesen Atoritis.

Dispela wok bilong wokim ol dispela tripela haus em i kostim moa long K50,000, wantaim halvim ikam long Morobe Provinsal Gavman na Mista Saonu.

## Denglagu Katolik paris amamasim 60 yia

DENGLAGU Katolik Sios Paris i stap arere long Kundiawa Taun long Simbu provins long las wik Fraide i amamasim 60 yia silva Jubili bilong em.

Ol Katolik manmeri insait long olgeta hap bilong Simbu, na ol narapela provins olsem Isten na Westen Hailans i bin go long dispela bikipela bung bilong makim nambawan taim tru ol i kamapim dispela Denglagu Paris long

1934.

Denglagu Katolik Paris i bin stat wantaim ol liklik lain Katolik man na meri long dispela taim. Tasol tude dispela paris em i wanpela bikipela paris tru insait long Simbu provins we em i save sevim olgeta manmeri insait long Kundiawa Taun na ol wanwan ples klostu.

Planti ol singsing grup i bin kamap long dispela dei, ol singsing grup olsem ol lain

bilong singsing lotu (Gospel) na ol singsing tumbuna bilong amamasim moa long tu tausen manmeri em ol i bin bung long dispela dei.

Ol amamas bilong dispela dei i bin stat wantaim bikipela lotu (mass) we bikipela Bisop bilong Kundiawa daiosis i bin go pas long en. Bihainim dispela lotu ol narapela samting i bin kamap na igo inap long apinun stret.

Ol Komiti bilong dispela bung long Denglagu em ol i bin invaitim Prai Minista Sir Julius Chan long opim bung bilong ol tasol Sir Julius em i no nap long go stap wantaim ol bilong wanem em i bin gat planti ol narapela bikipela wok.

Sir Julius i bin salim toksori bilong em i go long ol manmeri bilong Denglagu paris na em i tok amamas long ol long dispela bikipela de bilong ol.

Long ol dispela toktok em i bin salim igo long ol pipel, Prai Minista i tok ol pipel bilong Denglagu paris eria insait long dispela siksti yia krismas em oli lukim bikipela senis tru long helt na eduksen sevis bilong wanem ol misin ol i bin wokim bikipela wok tru long brigim ol dispela senis.

Em i tok nau em i taim bilong Krismas na Nu Yia. Na em i laik ol lida bilong olgeta lotu insait long kantri i mas tokim ol kongrigesen bilong ol long wok bilong bung wantaim.

Olgeta kristen mas save olsem yumi save lotu long wanpela God tasol na kisim wanpela skul long Baibel.

## Save bilong rit na rait em bikipela samting long senis

### MICHAEL KOMA i raitim

SAVE long rit na rait, na tu luksave long ol senis i wok long kamap em bikipela samting long developmen bilong kantri. Long tok inglis ol i kolim literesi na awenes.

Wanpela bikman long Simbu provins, Anton Kupe i tok gavman i mas luksave long dispela. Na putim moa mani i go insait long skulim moa pipel long rit na rait. Maski kantri i gat hevi long mani olsem em i bungim nau.

Kupe i wok olsem wanpela kodinata bilong Simbu adal literesi. Dispela em skul bilong lainim ol bikman meri long rit na rait, kaunim namba na ol kain samting olsem.

Mista Kupe i mekim dispela toktok.

bihain long adal literesi skul long Sinasina na Juave distrik bilong Simbu provins i bin pas. Bikos i nogat inap mani bilong ranim ol.

"Long didpela taim, planti pipel i no save kisim ol namba wan sevis bilong gavman bikos ol i no save long rit na rait," Mista Kupe i tok.

"Mi no inap save long wanem as tru na planti yangpela manmeri long ol pipel i les long skul we ol i ken kisim save na stap insait long ol senis o developmen em i wok long kamap insait long kantri na long ovasis," em i tok.

Tasol Mista Kupe i tok em i laik sanapim wanpela gutpela haus insait long ples Koge long Sinasina. Dispela em long kisim na skulim ol pri skul pikinini. Tasol em i lukim olsem Simbu provinsal gavman i no inap long givim mani.

# OL PAS SPESEL

## Luteren Siping bai bruk sapos Wewak-Madang rot op

**Dia Edita,**  
Mi raitim pas long spotim brata bilong mi, William Tangem. Pas bilong em i kamap long *Wantok* Niuspepa bilong Novemba 10. Tingting bilong brata long pas ya em long Luteren Siping kampani ino ken sasim ol pikinini long kalap long sip. Dispela em long ol sip we Luteren Sios long kantri i papa long

ol. Planti papamama i nogat inap mani na sapos ol wokman i strong long sasim ol pikinini, orait, rausim nem Luteren long ol sip ya. Bikos dispela em i nem bilong sios na i no luk gut taim i nogat wok marimari i go long sampela trangu olsem ol liklik pikinini. Dispela em taim papamama inogat mani tru long

baim rot bilong ol. Wapela samting tu mi lukim em ol sasim tasol ol pikinini bilong ol Sepik. Dispela i no gutpela pasin bikos sip i save raun i go olsem long Morobe. Na long hap, ol i no sasim ol pikinini husat i gat krusmas namel long 2-5 yias.

**Edwin Dic Yua Madang**

## Noken seksek long mauswara

**Dia Edita,**  
Mi laik toksave long ol pipel bilong Poroma distrik insait long Sauten hailans provins olsem taim bilong makim lida, yupela i mas tingting na lukluk gut. Yupela i no ken harim ol mauswara toktok long ol planti man bilong taun o ausait husat i save mekim ol gris toktok long kisim tasol namba. Yupela i mas save olsem ol dispela man i no save tumas long kain sindaun na hevi bilong yumi long ples. Olsem na tingting gut tru na makim wapela man bilong ples yet. Husat

bai karim wari na hevi bilong yupela long provinsal palamen. Yupela i no ken aipas long makim man tasol bikos long ol tok gris bilong em. Yupela ol yangpela i mas tingting gut long makim lida bilong yumi long 1995. Olsem na mi ting yumi mas larim olpela memba bilong yumi i stap bikos em i man bilong ples stret na i save pait strong long hevi bilong yumi.

**Jackson Ipsolopo MENDI**

## Wokim musik studio long Wewak

**Dia Edita,**  
Long sampela ol provins, i gat ol gutpela studio we ol musikman i katim kaset bilong ol. Tasol long PS kantri, i no gat. Olsem nau, mi rait i kam long putim askim bilong mi sapos ol ken kirapim wapela studio long Is, Sepik provins. Bikos provins i gat planti musik man i moabeta long ol i gat rekoting studio bilong ol yet long provins. Mi askim minista husat nau i holim opis bilong Komyunikesens long em i ken katim sampela mani long dispela wok long PS kantri.

**Remecus Alois Nowprai Ambunti- ESP.**

## Hagen taun kaunsil paulim pablik

**Dia Edita,**  
Mi laik autim liklik wari bilong mi long wapela samting we mi lukim ol lain long Hagen Taun Atoriti i mekim na mi no wanbel long en. Pablik i save olsem Hagen taun em i wapela bikpela taun long kantri, namba tri long Mosbi na Lae. Planti pipel i save kam raun na baim ol samting long Hagen Taun. Tu, dispela taun em i wapela klinpela taun. Tasol long las wik, wapela samting mi lukim na mi no wanbel olgeta. Taim mi raun long Hagen Taun, mi lukim olsem ol wokman bilong Taun Atoriti i paulim stret ol pablik man-

meri taim ol i pasim ol pablik toilet na maket long taun. Dispela em wantaim no gat toksave i go aut pastaim long pablik olsem dispela samting bai i kamap. Bihain sampela memba long Taun Atoriti i hait nabaut na lukstil sapos ol man i yusim toilet o nogat. Wanem samting mi no amamas long en em ol i sasim K20 olsem spot pain bihain long ol man i kamaut long toilet. Mi laik singaut long ol Taun Atoriti memba na plis long wokim klinpela pasin long ol pablik manmeri.

**Jonathan Apa Kerowagi**

## Stretim Vanimo ples pipia

**Dia Edita,**  
Komplen bilong mi i go long taun kaunsel bilong Vanimo long pasin we ol wokman bilong ol i mekim long tromoi pipia na pekpek long wapela hap tasol. Na dispela ol i wokim klostu tasol long taun eria. Mi komplem bikos mi lukim dispela samting i kamap long ai bilong mi stret. Mi laikim ol


wokman bilong taun kaunsil i tromoi pekpek long wapela hap bilong em yet. I no ken miksim wantaim pipia na tromoi long sem hap.

Simel bilong ol dispela samting tasol i mekim na bagarapim tru ol manmeri na pikinini husat i laik wokabout i go long taun.

Mi save stap long Wara Ston long Vanimo na mi lukim dispela samting long ai bilong mi. Olsem na mi rait long pablik long Vanimo i ken lukim na givim strongpela tingting long Vanimo taun Atoriti i mekim samting hariap long daunim hevi ya.

**Charles Yale Vanimo**

Toksave i go long ol manmeri husat i save salim pas long Wantok. Sapos yupela i no putim nem tru bilong yupela long pas, mipela i no inap prinim leta bilong yupela.



## Lus ting long wari na tingim bikpela

**Dia Edita,**  
Mi laik autim toktok bilong mi long *Wantok* niuspepa olsem olgeta taim mi save ritim na mi save lukim ol manmeri komplem long planti samting bilong laip. Ol samting olsem buai na smok o dring bia na planti arapela moa. Tasol mi laik tok olsem nau planti samting i wok long kamap long dispela ples graun we yumi no inap long skelim gut long tingting bilong yumi yet. Mi laik tok stret olsem taim bilong heven na graun bai pinis na bikpela Jisas bai kam bek long kisim yumi ol kristen manmeri bilong em. Olsem na ol kristen brata na susa, mi laik tok olsem yumi mas redi nau na lusim tingting long olgeta kain hevi na wari bilong dispela graun. Bikos long wapela song yumi save singim we i tok, This world is not my home. Dispela graun i no ples bilong yumi. Ples bilong yumi em long heven olsem na yumi i mas redi nau long kam bek bilong bikpela Jisas. Singing ya i go moa olsem: If heavens not my home than Lord what will I do?. Sapos heven i no ples bilong mi bai mi go we?. Dispela em bikpela askim yumi olgeta kristen manmeri i mas tingim long laip bilong yumi nau. Em tasol toktok mi gat long serim wantaim yumi olgeta kristen manmeri husat i save ritim Wantok Niuspepa.

**Gibson Enoch KIMBE**

## Rausim ausait kontrakta long Sepik

**Dia Edita,**  
Mi laik sapatim pas bilong brata John Mark i bin kamap Wantok Niuspepa long 3 Novemba. Brata Johnny i raitim pas na komplem long ol kain kain kontrak kampani long narapela provins husat i wok long mekim wok kontrak wantaim Backlay Bros kampani na wokim rot insait long Sepik haiwe.

Mi tu i no amamas long lukim nem bilong ausait kampani i wokim kontrak wok insait long Sepik haiwe bikos mi ting wok kontrak em samting bilong mipela ol asples long mekim.

Mi lukim wapela kontrak kampani bilong Kimbe ol i kolim LST Kontrakta na mi no amamas.

**Joab Naka KIMBE**



**PORT MORESBY BRANCHES:**

- \* Taurama shopping centre - 25 6641
- \* Ori Lavi Haus, Boroko
- \* Defence Haus, Town.

**LAE BRANCHES:**

- \* 6th Street, Ph: 42 5349

- FRESH BREAD, BUNS & ROLLS
- PIES AND PASTRIES
- ASSORTED CAKES MADE TO ORDER
- WEDDING AND BIRTHDAY CAKES

*Naturally good for you!*

**HEAD OFFICE AND BAKERY**  
Tamara Rd., 6-Mile

**Tel 25 1266 Fax 25 1512**

**P.O. Box 297 Boroko**



# Air Niugini go antap tumas long skai Maprik/Pagwi rot no gutpela

**Dia Edita**  
Mi wanpela grasrut man long ples. Mi laik autim wari o belhevi bilong mi long dispela toksave bilong Air Niugini hapim prais bilong balus tiket i go antap long 12.5 pesen.

Mi autim dispela komplem bilong mi bikos mipela i stap long taim bilong Krismas nau. Na Nu Yia tu i no stap longwe. Planti manmeri insait long kantri bai yusim dispela tupela festival long go long ples, go long arapela provins long lukim ol famili, wantok na wanpisin.

Dispela tingting o disisen bilong Air Niugini nau bai stopim planti manmeri long i go i kam long wanem hap ol i gat laik long go. Bikos prais bilong baim balus tiket nau i moa bikpela long prais bilong bipo. Tingim hevi we gavman i sot long mani. Na planti kampani long praivet sekta i rausim ol wokmanmeri bilong ol. Planti wokmanmeri bilong gavman tu i no kisim gut potnait pe bilong ol.

Long rurel eria, mipela ol pipel i no kisim gutpela mani

long ol kes krop bilong mipela. Bikos prais bilong ol kes krop tu i daunbilo tumas. Mipela i wok long wokhat tru long kisim mani.

Tingim, mi stap long Maprik distrik long Wewak, Is Sepik provins. Long pastaim, taim mi laik go long Mosbi, mi save baim balus tiket long K180 long go. Na taim mi laik kam bek, mi save spenim arapela K180 gen. Putim tupela wantaim em K360. Tasol nau, aninit long nupela prais, mi mas spenim K405 olgeta-K202.50

long go na arapela K202.50 long kam bek. Sapos wanpela man long Sandaun provins i stap long Mosbi laik go holide long ples long dispela Krismas wantaim famili bilong em, yupela, i luk olsem em bai spenim samting olsem K2,000.

Gavman i tokaut olsem em i bungim bikpela hevi long nogat mani. Tasol mipela ol pipel i wok long kisim bikpela hevi moa. Hevi mipela i kisim i winim hevi gavman i bungim. Bikos mipela i as bilong gavman. Na

wanem kain disisen gavman i wokim, mipela ol pipel i kisim bikpela taim stret.

Mipela ol pipel i ting olsem gavman i stap long helpim mipela. Tasol nogat. Gavman i wok long kamapim kankain lo, polisi na disisen we i wok long bagarapim laip bilong mipela. Ol gavman minista na sinia pablik sevan i wok long amamas na mipela ol grasrut manmeri wok long kilim skin long painim mani.

**Too Much WEWAK**

**Dia Edita**

Mi save stap long ples na ron i go i kam long taun long Wewak. Na mi save lukim olsem nesenel memba bilong Wasara/Gawi Paul Wanjik i no mekim wanpela samting long rot bilong mipela we i bagarap olgeta.

Planti taim mi ron long Pagwi go inap long Maprik, mi lukim olsem dispela rot em i no rot bilong ka. Dispela rot i olsem hap bus rot we ol wail pik i save i go i kam na painim kaikai. Gavman i mas traim na putim spet long dispela rot na mekim gut.

Long ol narapela rot tu olsem long Angoram na Timbunke, rot i wankain tasol.

Mi laik askim nesenel memba long dispela eria long putim sampela mani long dispela tupela rot long 1995.

**Petrus Managen WEWAK**

## Baing mas opim olupela ples balus

**Dia Edita,**  
Mi laik autim liklik wari bilong mi go long dispela ples balus long Lae we mi harim olsem bai op gen.

Mi bin amamas taim mi harim olsem nesenel memba, Andrew Baing i toktok long opim gen dispela ples balus.

Mi lukim ol yangpela insait long Lae i stat long klinim ples na redi long opim ples balus gen.

Tasol nau mi no amamas long lukim olsem bus i kamap gen na dispela ples balus i no op yet. Ating memba

Andrew Baing i mauswara tasol o olsem wanem.

Nau yu kisim pinis ministri bilong transpot. Em sans tru bilong yu nau long kamapim dispela plen bilong yu long opim gen Lae ples balus. Yu save bipo yu bin toktok tasol narapela man i stap long dispela ministri na daunim yu. Olsem na nau em sans bilong yu nau.

Lae ples balus em gutpela. Bikos em i klostu long taun na mipela ol manmeri long ples i ken pundaun klostu long taun na go baim ol samting na

karim i go antap klostu long balus na go bek long ples.

Ol sikman long ples tu i ken kam pundaun klostu long Lae ples balus na go hariap long Angau haus sik.

Plis Mista Andrew Baing, no ken larim promis bilong yu i go wara nating. Olsem na yu mas kamapim stret dispela toktok. Bikos olgeta manmeri long Morobe provins tu bai amamas na sapotim yu long dispela.

**Korong Zoki LAE**



## Morobe so graun liklik tumas

**Dia Edita,**

Mi laik autim wanpela belhevi blong mi long Morobe So Komiti. Mi no save wanem taim stret ol i bin statim Morobe So. Tasol mi bin kam lukim Morobe So long yia 1990. Na mi lukim olsem so komiti i nogat gutpela sindaun bilong yupela bilong stretim Morobe So.

Em 5-pela taim nau mi go long lukim Morobe So. Na mi lukim olsem i nogat wanpela nupela samting i save kamap. Wankain samting tasol i save kamap. Yupela i no inap toktok gut long painim wanpela bikpela spes bilong inapim ol manmeri long raun na lukluk gut long ol tumbuna singsing na string ben or kankain pilai. Mi bin raun long Morobe So na mi lukim olsem i nogat

spes long wokabaut na lukluk long ol samting. Na nau mi gat wanpela askim. Dispela hap mipela is save em so graun. Tasol mipela i save olsem yupela i save lukautim ol enimol long en. Na long taim bilong so, ol manmeri i kam long narapela hap bai wokabaut antap long pekpek bilong ol enimol. Olgeta taim mi save paul, em So graun o hap bilong lukautim ol enimol. Plis, mi laikim bai arapela yia, Morobe So i mas stap long wanpela gutpela klinpela hap. Na i mas i gat inap spes bilong ol man long raun. Yupela i mas save olsem ol manmeri long planti provins i save kam lusim moni long lukim so.

**Janet Logotar LAE.**

## Maski long westim mani

**Dia Edita,**  
Mi laik autim komplem bilong mi go long Praitim Minista Sir Julius Chan na gavman bilong em.

Mi harim olsem gavman i bin lusim bikpela mani long baim ol soldia bilong Pasifik Ailan kantri husat i bin stap insait long dispela Pis Kiping Fos long Bogenvil.

Ol i no mekim wanpela wok. Ol i stap nating sampela de tasol na go bek gen long kantri bilong ol.

Sapos ol i stap sampela wik na mun na mekim sampela wok, ating PNG bai lusim bikpela mani. Long nau PNG yet i gat hevi long mani.

Olsem na mi askim gavman long no ken toktok moa long Pis Kiping Fos long bihain taim. Nogut ol i bug bung na kilim nabaut ol pipel bilong PNG nating.

**Wait L. WABEG**

## Noken yusim tok pisin krangi

**Dia Edita,**  
Mi laik komplem long ol lain bilong PNG Baibel Sosaiti husat i wok long raitim buk Baibel i go long tok pisin.

Mi no amamas long lukim sampela hap toktok ol i raitim long tok pisin we i tok turangu na laka. Mining bilong dispela tupela hap toktok long buk Baibel i no klia tumas long planti manmeri long hap bilong Momase na Hailans rijon.

Mi lukim i gat hevi long ples we ol tapun long ples i save ritim Baibel long taim bilong lotu na taim ol i tanim toktok. Ol i save tok turangu em tarangau (bikpela pisin) na laka em ol i no save long mining bilong em.

**Timothy Mokos WAPENAMANDA**

Tok Save i go long ol man i save salim pas long Wantok. Sapos yu no putim nem tru bilong yu long pas mipela i no inap prinim leta bilong yu

## Sambre na kalank no lukluk long ilektorel rot

**Dia Edita**

Wari bilong mi go stret long ol lain bilong Au Is konstituensi insait long Yangkok distrik bilong Sandaun provins.

Mipela i no amamas long dispela tupela nesenel memba bilong mipela. Wanpela em Sir Christopher Sambre na narepal em Cornelius Kalank.

Tupela man ya i no lukluk long ol rot insait

long ilektoret bilong tupela olsem Ningil-Winbi rot. Na skelim sampela mani long ilektrol developmen fan bilong tupela i go long stretim. Stori tru i go olsem ol i skelim sampela mani go pinis long dispela rot tasol nogat wanpela wok i kamap na rot ya i stap wantaim bikpela bus yet.

Tupela memba ya i no save tingting long dispela na lukluk. Mipela

ol pipel bilong Is Au i save karim ol samting na wokabaut i go olsem long Yangkok na Ningil long salim.

Ol yet long ples bilong ol, man ol i wok long amamas na ron long ka tasol i go i kam na i no tingim mipela liklik. Long wanem wantok sistem i bikpela tru long PNG.

**Anton Faru VANIMO**

## Morobe So em bilong Morobe

**Dia Edita**

Komplem bilong mi go stret long Morobe So komiti. Ating ol i save mekim wantok sistem.

As bilong dispela em long Morobe provins mipela i laik mekim sampela pilai long So tasol ol i save tok yupela leit long putim nem. Olsem wanem, mipela i leit na husat bai putim nem. Ating dispela so em bilong ol Hailens na sampela narapela provins. Ating moabeta yupela ol bikman i no ken kolim Morobe So moa. Yupela ol bikman bilong so i mas sem long dispela.

Sapos mipela Morobe go long narapela provins na mipela mekim olsem bai olsem wanem? Yupela yet save em bai gutpela o nogat. Save stap long yupela yet.

**Kowi Taiyong LAE**

# Nogat pasin bilong wokbung long PNG

**Dia Edita,**  
Mi laik autim liklik wari bilong mi go long mipela olgeta manmeri bilong Papua Niugini ken lukim na skelim. Taim Papua Niugini kisim independens, mipela kamap fri kantri we i min olsem mipela yet i mas wokbung wantaim na sanap strong long mekim kantri bilong yumi groa. Tasol nau mipela i wok long sanap wanwan long mak bilong provins o rijen na kamapim kainkain bikhet pasin na trabel long kantri bilong mipela.

Mi save harim ol Hailans i tok mipela bilong Hailans na ol Sepik i tok mi manki Sepik o Kerema i tok mi manki Kerema. Na dispela pasin i mekim yumi brukim tru bikpela tingting bilong wokbung wantaim. Na

mipeia kamapim birua namel long mipela yet. Plis, gavman i mas lukluk long dispela pasin na kamapim sampela kain lo we i ken bungim olgeta manmeri bilong Papua Niugini wantaim na ol i ken amamas long wokbung wantaim. Mipela mas gat rispek long ol wok bisnis we i stap long provins na bik-taun. Bikos ol dispela kampani save baim bikpela takis i go long gavman we gavman i kisim mani na skelim long bringim sevis na developmen i go long ol manmeri.

Olsem na rispektim bisnis bilong husat man Hailans o nambis we i stap long wanem hap provins bilong Papua Niugini. **James Payako GOROKA**

# Gavman na ol kampani mas wokim haus long olgeta wokman na meri

**Dia Edita**  
Long kantri bilong yumi PNG, nau i gat planti trabel tru long ples, taun na siti. Mi laikim ol lida bilong mipela i sindaun na skelim dispela pastaim na traim mekim sampela senis long kantri bilong yumi. Mi laikim olsem gavman i mas rausim ol skwata setelmen na wokim haus bilong ol

wokman bilong em. Ol setelmen i stap na i save bringim planti hevi. Ol Kampani tu i mas wokim ol haus bilong wokman bilong ol long ol dispela ples na kisim ol sekyuriti o plisman long sekim olgeta haus long wanwan mun na rausim ol pasindia man. Dispela ba i ken helpim long daunim ol trabel pasin.

Pasin bilong stil, rep na kilim man i bikpela tru long kantri bilong mipela na ol waitman i save ting olsem mipela stap yet long pasin bilong kaikai man. Namba tu samting em taim gavman i laik muvim ol setelmen, em i mas lukluk pastaim long wanem samting bai ol dispela manmeri go bek long ples na mekim. Mi laik bai gavman i mas givim sampela kain liklik projek long helpim ol dispela

lain wantaim ol lain long ples we ol i ken sindaun na wok. Mi laikim gavman i mas sapotim dispela tingting bilong mi. Dispela kain tingting bai inap long stopim ol trabel long ol siti na taun bilong yumi. Sapos yu husat papa o lida i sapotim o egen-sim mi, rait tasol i kam long *Wantok Niuspepa*.

**Saipa Moses LAE**

**Husat i laik salim pas i kam long edita i mas raitim stret nem na salim i kam long dispela adres: Pas i go long Edita, Wantok Niuspepa, P.O. Box 1982 Boroko, NCD.**

# Ol Hailans bagarapim Lae

**Dia Edita,**  
Mi laik sapotim pas bilong Yanding Arong bilong Parakris viles long Mumeng i bin tok-tok strong long pasin ol Hailans i mekim long Lae siti. Mi tu i no amamas tru long lukim ol Hailans manmeri kam daun long Lae na mekim ol kainkain wok na pasin olsem ples bilong ol. Ol i kam wantaim bikpela bek kabis, potato, kaukau na arapela kaikai bilong gaden na pasim spes bilong ol asples Morobe manmeri yet long salim ol kaikai bilong ol. I gat maket long hap bilong ol yet. Watpo ol i karim ol samting i kam daun long Lae.

Narapela rabis pasin mi lukim ol Hailans manmeri i mekim long Lae em ol i save go baim ol sipsip mit long stua. Na bihain karim i go katim liklik liklik na kukim long rot na salim long 20 toea na 30 toea long ol manmeri baim.

Mi lukim dispela samting i save stap long hap olsem Wes Tara-ka, Hanta, 4 Mail na 5 Mail. Sapos yu laik mekim bisnis olsem, karim i go bek long ples bilong yu yet na mekim. Yu wok long bagarapim ol manmeri long kaikai dispela mit. Bikos das bilong rot na kainkain smel bilong ol rabis long rot i bagarapim mit ya na ol manmeri baim na kaikai. Mi lukim ol i save salim buai na smok arere long stua na long nait ol i pundaun i go daun tasol long hap ol i sindaun long en na slip olsem nogat haus bilong ol. Dispela em i olsem pasin bilong pik na dok i mekim. Bikos olgeta manmeri i save

slip gut long haus na ol i slip arere long ol stua na rot.

Mi no ting ol Morobe manmeri husat i stap long hap bilong hailans i save mekim olsem. Olgeta i save wok na sindaun na kaikai gut long haus bilong ol stret.

Mi askim Plis Komanda bilong Lae long strongim wok bilong sekim ol pasindia long haiwe long 9 Mail bum geit. Ating dispela inap stapim ol manmeri husat i laik raun nating na kamapim trabel long Lae siti.

Primia Titi Christian tu i mas wok strong long rausim ol manmeri husat i nogat wok na sindaun stap nating long siti.

**Buma Nonje LAE**

# Bewani stesen abrusim mak bilong ples kanaka

**Dia Edita**  
Mi wanpela manki Bewani insait long Sandaun provins. Tasol nau mi stap long Wewak, Is Sepik provins.

Mi laik autim belhevi bilong mi long *Wantok Niuspepa* long Bewani stesen i stap yet olsem wanpela ples kanaka.

Bihainim dispela hap tok bilong mi, mi autim belhevi bilong mi go long ol provinsal na nesenel memba mipela i votim ol long makim o kamap olsem mausman bilong mipela long provinsal asembli na nesenel Palamen.

Long luksave bilong mi, planti arapela wanples na wantok bai sapotim, i nogat wanpela bikpela haus maket, stua, supamakot o gutpela haus i stap long Bewani stesen. Nogat tru ya. Stesen ya i luk olsem wanpela ples kanaka yet.

Mipela ol pipel i traim long developmen stesen bilong mipela. Tasol mipela i sot long olgeta samting. Mipela i no kisim gutpela sapot na helpim i kam long ol memba bilong mipela.

Ol memba ya i mas luksave olsem mipela i votim ol long helpim mipela.

Mipela i votim ol long bringim developmen i go insait long eria bilong mipela. Mipela i votim ol long kamapim sampela gutpela senis long eria, ilektoret, stesen na komyuniti.

O memba, bai mipela i stap yet olsem ol tumbuna papa bilong mipela long taim bipo? Wanem taim bai mipela i lukim sampela senis i kamap long stesen? Sampela arapela stesen insait long provins na tu long kantri senis. Tasol hia long Bewani, stesen i wok long go bek na klostu bai abrusim mak bilong ples kanaka.

Memba, mipela i lukluk long yu nau long luksave long dispela samting. Mipela bai no inap toktok. Bikos yu gat ai long lukluk na skelim ol samting. Disisen bilong kamapim senis long Bewani stesen i stap long yu. Bikos yu lida na mausman bilong mipela. Mipela i lusim ogeta samting long han bilong yu.

**Mosa Pieger Mnangi WEWAK**



**NEM: Lelix Pangial (man) KRISMAS: 17**  
**ADRES: Mendi Kristen Akedemi, PO Box 363, Mendi, SHP**  
**LAIKIM: Raitim pas, lukim ragbi, harim ol pop musik, lukim TV, pilal gita na raun lukim ol poroman.**

**NEM: Domicore Ricco (man) KRISMAS: 20**  
**ADRES: c/ Didimus Reuben, CIS, Vanimo, PO Box 124, Sandaun provins.**  
**LAIKIM: Pilal kibod musik, mekim pren, raun lukim ol poroman, raitim pas na harim reggae musik.**

**NEM: Joseph Namato (man) KRISMAS: 17**  
**ADRES: Associated Mills Pty Ltd, PO Box 1906, Lae, Morobe provins.**  
**LAIKIM: Pilal basketbal, soka, ritim niuspepa, harim musik, wokim gaden, bungim ol pren, stori wantaim arapela na raitim pas.**

# No ken tok olgeta Hailans

**Dia Edita,**  
Mi laik engensim pas bilong Yanding Arong bilong Parakris viles long Mumeng we em i bin kamapim tupela bikpela poin bilong tok-tok.

Yanding, yu bin bagarapim tru ol Hailans long dispela hap toktok bilong yu long rausim ol Hailans man husat i mekim bikhet pasin long Lae siti. Tasol mi no amamas long pas bilong yu bikos nem Hailans em bikpela tumas. I gat planti manmeri bilong Hailans. Na taim yu sutim tromoi tok olsem, sampela gutpela Hailans i pilim nogut bikos yu putim ol tu insait long komplek bilong yu.

Mi ting yu no mekim gutpela pasin tumas. Bikos yu opim maus tasol na tromoi toktok long niuspepa we yu yet i no save long wanem man Hailans na em bilong wanpela provins o taun. I luk olsem yu hait olsem poisin man na komplek i stap.

Narapela komplek bilong yu em long ol kaikai bilong ol Hailans we ol i karim i kam na salim long Lae maket.

Mi ken tok olsem ol Hailans i gat planti gutpela kaikai tru we Morobe provins yet i nogat. Olsem na yu mas amamas na baim.

**Fixie Karosa LAE**



**NEM: Evy Lovina Mensah (meri) KRISMAS: 25**  
**ADRES: PO Box 1196, North Oguua, Ghana, West Africa**

**LAIKIM: Kukim kaikai, raun lukim pren, laikim arapela, love na marit.**  
**Bikpela tingting bihain long painim wanpela tru pren bilong maritim.**

**NEM: Priscilla Toekerry (meri), KRISMAS: 22.**  
**NEM: Miriam Tony (meri), KRISMAS: 16.**  
**NEM: Fridam Tony (meri) KRISMAS: 14.**

Mipela ol dispela yangpela meri i laikim pren-pren long olgeta hap bilong Papua Niugini na tu long ovasis kantri wantaim.

Mipela i save laikim long go lutu, singsing lotu, lukim sing with joy program long TV, pilal volibal na go swim long wara.

**NEM: Paul Pala Warea (man) KRISMAS: 18**  
**ADRES: Kagua Katolik Misin, PO Box 69, Mendi, SHP**

**LAIKIM: Pilal gita na singsing lotu, pilal basketbal, ragbi tas na ritim pas.**

**NEM: Diana Rockson (meri) KRISMAS: 24**  
**ADRES: PO Box 1196, North Oguua, Ghana, West Africa**

**LAIKIM: Raun, harim musik, kukim kaikai, love na marit.**  
Tingting long painim wanpela pren bilong maritim bihain.

**NEM: Poning Tai (man) KRISMAS: 16**  
**ADRES: Mount Hagen MGH School, PO Box 380, Mt Hagen, WHP**  
**LAIKIM: Pilal ragbi, lukim TV, pilal soka, singsing lotu na raitim pas.**

**NEM: Princess Adjei Tandoh (meri) KRISMAS: 20**  
**ADRES: PO Box 344 Sekondi, Ghana, West Africa.**

**LAIKIM: Serim ol samting i go i kam, raun long narapela kantri long holide na painim wanpela man bilong maritim long bihain.**

**NEM: Apewa Fueve (man) KRISMAS: 24**  
**ADRES: Morata Troops, PO Box 3243, Boroko, NCD**  
**LAIKIM: Singim ol lotu song, serim tok bilong God long arapela, pilal ragbi na raitim pas long pen pren.**

**NEM: Brown Mondo (man) KRISMAS: 18**  
**ADRES: PO BOX 42, Kerowagi, Simbu provins.**  
**LAIKIM: Pilal ragbi, raitim pas, ritim buk, na singsing.**



# WORD

## PUBLISHING COMPANY



*Merry  
Christmas and a Happy  
New Year to our valued  
clients and customers  
throughout the  
country!!*

*Hepi Krismas  
na Hepi Nu Yia i go  
long ol kastama na ol  
ridas bilong mipela  
long olgeta hap long  
kantri! Yumi bung  
na amamas  
wantaim!*

Publishers of

PNG

**BUSINESS**


**SPORTS**  
*Weekend*

**THE TIMES**

(OF Papua New Guinea)

**WANTOK**

NIUSPE PA BILONG OL PAPUA NIUGINI STREET



**IT IS CHRISTMAS  
ARE YOU CARING FOR  
BOUGAINVILLE?**


*" It was saddening to see these people with so little on their bodies... There were others on the other side of the mountains who had nothing on their bodies which made it difficult for them to come out for medical service ". (Media Report on Wednesday, 21 December 1994).*



*"I was hungry and you fed me, thirsty and you gave me a drink. I was a stranger, and you received me in your homes, naked and you clothed me. I was sick and you took care of me. (Matthew 24: 35 - 36).*

**SEND ANY DONATIONS TO:**

Catholic Bishops Conference of Papua New Guinea and Solomon Islands  
P.O. Box 398  
WAIGANI, NCD



# RAGBI LIG

## NIUS



# Nupela kain nesenel lig sempionsip long 1995 sisen



• Wewak Tigers A gred tim husat i gat planti gupela pilala bilong soim stall long ol nesenel resis. Tasol lig i no memba long mama bodi, PNGRFL long 1995 sisen, bikos long hevi bilong mani. Na dispela bai bagarapim sans bilong ol pilala long mekim nem long ol nesenel tim.

BIKPELA kibung bilong PNGRFL em i save kamap long olgeta yia i bin kamap long Lae long mun Novemba.

1994. Insait long dispela kibung, ol bikman i kisim 11-pela lik senta i go insait long memba wantaim mama

bodi, Papua Niugini Ragbi Futbal Lig long 1995 sisen.

PNGRFL i givim ol arapela lig husat i aplai

long kamap memba long bihainim olgeta stretpela rot bipo long las de bilong dispela mun (Desemba 31,

1994). Long streypela rot i min olsem oli mas bihainim olgeta kondisen bilong kamap memba o afiliet long PNGRFL.

Dispela i karamapim tu ol lig husat i memba bilong mama bodi long 1994 sisen. Sampela bilong ol dispela lig, wantaim ol nupela lig husat i bin aplai i no bin kamap long kibung long Lae.

PNGRFL i brukim ol memba lig i go long tripela grup olsem, em ful memba, provisinal na ol arapela i no kamap long kibung na mama bodi i no save long tingting bilong ol.

Ol ful memba lig i gat 11-pela olgeta. Nem bilong ol em Buka, Goroka, Lae, Mendi, Minj, Mosbi, Tabubil, Tari, Wabag, Popondeta na Kiunga.

Ol provisinal lig em Balimo, Banz, Kavieng, Kundiawa, Madang,

Hagen, Wapenamanda, Daru, lalibu na Wau Bulolo.

Ol memba lig bilong 1994 sisen husat i no bin kamap long kibung na PNGRFL i n save long tingting bilong ol em Alotau, Biala, Kainantu, Kimbe, Koroba, Ramu, Vanimo na Wewak.

### Senis long ol nesenel resis

Bikpela toktok long kibung em kibung i oraitim ripot bilong Piening Komiti. Dispela em long senisim ol bikpela ragbi lig resis insait long kantri.

Taim PNGRFL i painimaut gut long hamas lig i memba wantaim em, em bai tilim ol memba lig i go long 8-pela grup olgeta. Na wanwan grup bai holim sempionsip bilong ol yet.

Na lig long wanwan grup husat i winim sempionsip long wan-

wan rijonal resis bai go pilai long nesenel sempionsip. Nesenel sempionsip bai kamap long mun Julai, 1995.

### Inta Siti Kap

SP Inta Siti Kap resis em PNGRFL i makim long kamap long mun Mei i go i nap long mun Septemba. Resis bai malolo long wanpela wik namel long mun Mei na Septemba. Dispela malolo i bilong holim nesenel sempionsip.

Ripot i kam long PNGRFL i tok wanpela dro bai redi klostu. Na PNGRFL na SP Holdings bai autim wanpela toksave long dispela.

### Intanesenel gem

Neks yia, Papua Niugini bai lukautim tu wanpela intanesenel gem.

Ripot i tok Kombain Katolik Koles open krismas bai kam pilaim 4-pela gem egensim PNG long mun Julai.

**For Sale**  
**WINDSCREENS**  
 to suit most models  
 from: K250.00 only  
 Available at Boroko Motors

**BETELNUTS & SAGO**  
 PH: 86 2743 FAX: 86 2743

WEWAK/HAGEN K238 - for ONE 50 kg bag  
 WEWAK/HAGEN K654 - for THREE 50 kg bag  
 WEWAK/MORESBY K306 - for ONE 50 kg bag  
 WEWAK/MORESBY K750 - for THREE 50 kg bag  
 WEWAK/TARI K303 - for ONE 50 kg bag  
 WEWAK/MENDI - K283 - for ONE 50 kg bag  
 WEWAK/TABUBIL K317 - for ONE 50 kg bag  
 WEWAK/PORGERA K299 - for ONE 50 kg bag  
 WEWAK/GOROKA K249 - for ONE 50 kg bag  
 WEWAK/WAPENAMANDA K277 - for ONE 50 kg bag  
 WEWAK/KUNDIAWA-K238 for ONE 50kg bag  
 WEWAK/KUNDIAWA-K654 for THREE 50 kg bag  
 (\* KUNDIAWA Pick up at Hagen).

**DAKA OR MUSTARDS:**  
 WEWAK/HAGEN - K100 for ONE 25 kg  
 WEWAK/OTHERS - K120 for ONE 25 kg

**SAKSAK OR SAGO**  
 WEWAK/HAGEN - K40 for ONE 25 kg

Greetings all the way from Honiara .....

Baby Gillian Amani

**Happy Christmas Darling**

Lots of love from -  
 Auntie, Uncle & Georgina  
 Luciano, Chava, Denon, Casper  
 Ceika, Lyn, Luciano, Johnson  
 Amani, Beolyn Akae.

Also season's greeting to uncle  
 Joel - (Horse Race Master).

**GEREHU BOTTLERS**  
 PO BOX 2268  
 BOROKO, NCD  
 PH: 21 7334

**WE ARE NOW BUYING  
 EMPTY BOTTLES**

At our new depot at Gerehu Stage Five (5) on Section 338, Lot 24, 25, 26 opposite the Elcom Office Gerehu.

Our prices are:

1. Empty Coke bottles: K1.50
2. Pepsi bottles: K1.70
3. SP bottles: K1.20

We guarantee you an efficient and fast service.  
 Do watch for Christmas specials coming shortly.

**TIMBER ON SALE!**



**TRANSWORLD TRADING  
 (PNG) PTY LTD**

(The Blue Truck Timber Company)

P.O. Box 92 - Badili - NCD - Port Moresby -  
 Phone/Fax: 25 5314 - Timber Yard - Erlma

Dear Customers,  
 We have a special christmas offer:  
 1) 10% down on all construction timber picked up.  
 2) Special for contractors: further 2% down.  
 We are open for business 7 days a week.  
 We close for 3 days at Christmas: Dec, 24, 25 and 26.

**MERRY CHRISTMAS  
 TO YOU ALL!**



• (antap) - China Town Dragons tim bilong Moun Lunamen ragbi tas resis long Lae.

• (daunbilo) - Dispela em oi meri nogut stret bilong Garamut Kantri sofbal tim bilong Mosbi C gret sofbal resis. Em oi nangu sistes bilong Sepik na Kerema tasol save pilai long tim ya. *Poto: Jack Ami.*



• (antap long lephan) - Ketsa bilong NGI, Cornelius BunBun tromoi fran bilong hat i go long beksait halitim gut pes bilong em long nogut bal i paitim. Dispela em stail bilong Mosbi sofbal resis ya.

• (lephan) - Kas meri ya, Sandra Sawaraba bilong Malangan tim long Mosbi i laik swimim tupela han long sait sait na danis o? Sandra i save stailim long senta outfil posisen.



• (antap) - Mosbi Guria soka tim husat I autim 1994 Nesenei Klap sempionsip taitel resis em i bin kamap long Lae. Guria i hollimpas dispela taitel long longpela taim nau.

• (lephan) - Jayapura volibal tim bilong oi meri husat I winim Vanimo long tupela set. Vanimo winim wangepela tasol. Tupela tim ya i bung long Desemba 3 na 4 long amamasim 16 Independens bilong Sandaun provinsal gavman.

**FRENCHBAKEHAUS**  
  
 • CAKES  
 Weddings & Birthdays  
 Our speciality  
 25 1266 Pom  
 42 5349 Lae

**FRENCHBAKEHAUS**  
  
 • CAKES  
 Weddings & Birthdays  
 Our speciality  
 25 1266 Pom  
 42 5349 Lae

# PROVINSAL SOKA NIUS

## PMSA bai rausim primia 2 divisen long neks yia

### YAKAM KELO i raitim

MOSBI Soka Asosiesen (PMSA) bai rausim primia 2 divisen long neks yia na kamapim wanpela primia divisen tasol. Presiden bilong PMSA, Posman Kisakui i tokaut olsem long neks yia bai wanpela primia divisen tasol bai i stap na primia 2 divisen bai kamap divisen 1 gen. Dispela i min olsem primia 2 divisen long dispela yia bai kamap divisen 1 na divisen 1 bai i olsem divisen 2 na divisen 2 bai i olsem

divisen 3. Dispela bai kamapim sampela senis long ol tim insait long wanwan divisen long dispela yia. Sampela tim bai bruk i go antap long apa divisen na sampela tim long apa divisen bai go daun long ol lowa divisen. Posman i tok dispela senis bai kamap long neks yia bikos long lukluk bilong primia 2 long dispela yia, stail bilong pilai i no klostu tumas long stail bilong primia 1. Primia 2 i pilai wankain stail na stend-

ed olsem divisen 1 resis. Dispela i no wanpela nupela senis. Sistem ya i bin stap bipo long en tasol dispela yia, PMSA i laik traime aut primia 2 divisen na lukim wanpela kain developmen bai i kamap long dispela. Olsem na dispela sistem bai pinis na olgeta divisen bai go bek gen long olpela sistem. Posman i tok insait long dispela senis tu, bai olgeta divisen i gat 8-pela tim i stap insait. Na olgeta divisen bai statim pilai long wanpela taim na pinisim long wanpela taim

stret. Dispela i min tu olsem olgeta divisen bilong ol meri, Anda 19 na sinia man bai i gat 8 tim stret. Taim moa long 8-pela tim i stap long wanpela divisen, stended bilong soka i no strong tumas bikos ol wan wan tim i no save resis o salens strong tumas wantaim narapela. Long dispela as, i gutpela long holim namba bilong tim i stap long 8 we salens i ken strong na gutpela pilai i ken kamap, Posman i tok. Narapela samting em presiden bilong PMSA, husat tu em het kosa bilong Papua Niugini

Futbol Asosiesen (PNGFA) i tok em bai PMSA i holim yet gren fainel sistem we tupela top tim i ken pait long fainel. Posman i tok long lukluk bilong soka, olgeta pilaia na sapota i save lukluk i go strong long gren fainel. Bikos ol i laik lukim wanem tim bai kamap wina bilong olgeta arapela tim. Na dispela em we interes na laik bilong soka i stap long en. Olsem na gren fainel sistem bai i stap yet long neks yia, Posman i tok. Posman i mekim dispela toktok long bekim ol askim we toktok i


kamap pinis long stapim gren fainel sistem na givim nem sempion i go tasol long husat tim i kamap antap long olgeta divisen wantaim moa pions. Tasol Posman i tok lig sempion em narapela samting we yumi ken painimaut husat tim i nambawan tim tru long winim olgeta gem bilong em long soka sisen. Dispela i soim olsem dispela tim i wok long trening strong, i wok long kamapim gutpela stail bilong pilai na em i holim gut strong na stended bilong em long pilai na win olgeta

taim na kamap top long divisen bilong em. Gren fainel em narapela kain we maski tim i no gutpela tumas long stail o strong bilong pilai, tasol em i ken gat sans long winim gren fainel. Bikos sampela taim bai ol gutpela pilaia bilong dispela lig sempion tim i gat hevi na narapela tim husat i stap bihain i ken pilai na autim em. Long dispela as, Posman i tok interes na laik bilong ol pilaia na sapota bai pas yet long gren fainel i mas kamap olsem na dispela sistem bai i stap yet long neks yia, 1995.

## Ol klap i ken rejista nau long PMSA

### YAKAM KELO i raitim

MOSBI Soka Asosiesen (PMSA) i tokaut nau long olgeta klap i ken stat long baim afiliesen na pilaia rejistresen fi bilong ol long nau inap nu yia. Seketeri bilong PMSA, Mojeck Selsel i tokim Wantok olsem buk bilong em i op nau long olgeta tim i ken stat long baim ol fi bilong ol. Fi bilong klap rejistresen em K350 na K20 long pilaia rejistresen. Mojeck husat i winim vot gen long stat olsem seketeri bilong PMSA i tok pastaim em i no save gut long wok bilong em wantaim PMSA. Bikos pastaim em i stap olsem wanpela eksekutyutiv mamba bilong asosiesen tasol. Mojeck i tok planti man wantaim ol niusman tu i save ting em seketeri bilong PMSA. Bikos mi save mekim wok bilong seketeri long lukautim olgeta pepa na wok bilong asosiesen, wokim dro bilong pilai, harim ol toktok kros bilong ol klap, was long pilai i mas ron gut bihainim dro na planti arapela wok bilong asosiesen, Mojeck i tok. Tasol nau, PMSA eksekutyutiv i makim em olsem seketeri bilong PMSA long neks yia na nau em i gat dispela nem we em i pilim em i ken mekim wok bilong em stret. Mojeck i tok taim em i stap long opis bilong PMSA, em i bin bungim planti hevi we i bin kamap long ol eksekutyutiv bipo. Sampela pepa na fail bilong ol PMSA ripot i no save stap stret. Ol pepa i stap nabaut long kain kain folda na i save mekim hat long painim hariap. I no gat gutpela failing sistem. Tasol Mojeck i tok em i wok long stretim ol hevi ya isi isi inap soka sisen bilong PMSA i pinis. Olsem na em i ken kamapim ol samting isi long neks yia bikos em bai ol wok na samting bilong em yet.



• Susa ya i apim bal long tromol go long ring insait long Pablik Sevans netbal resis long Mosbi. Netbal resis ya i pulim tru sapot na laik bilong planti mama na susa long wiken.

## Aviat go pas long Lae sofbal resis

### PETER BIMARI i raitim

AVIAT sofbal tim bilong Lae husat i sempion bilong las yia i wok long go pas yet long poin lata bilong Lae sofbal resis. Aviat i autim tiket bilong YMCA wantaim 3-2 skoa long las wiken na dispela i helpim em long go pas long poin lata wantaim 14 pions. Avait klap bai i gat bikpela amamas long dispela krismas sapos em i kamap klia tru olsem lida bilong sofbal resis long Lae. Bikos i gat pret tu olsem Ailan Hawks tu i wok long ran klostu long beksait bilong Aviat. Gazelle i stap namba 3 long poin lata wantaim 12 poin na YWCA i stap namba 4 wantaim 10 pions, BHP Eagles i stap namba 5 wantaim 8 pions, Bismark namba 6 wantaim 6 pions, PNGBC namba 7 wantaim 4 pions na ACI namba 8 wantaim 2 pions.

Sanap bilong olgeta tim ya long poin lata i kamap bihainim skoa ol i save kamapim long wiken gem. Aviat i bin gat 250 pesen na Hawks i gat 242 pesen long lukluk bilong skoa ol tupela i save skorim long wiken gem. Tupela tim wantaim i gat 14 pions long poin lata tasol skoa bilong Aviat i bikpela moa long Hawks olsem na Aviat i stap namba wan long poin lata. Olgeta arapela tim tu i olsem we Bismark i gat 70.79 pesen, na Karanas long 70.18 pesen. Skoa i klostu tru tasol poin i soim olsem Bismark i go pas long Karanas wantaim moa skoa. PNGBC tu i gat 77 pesen na Malagan i gat 57 pesen we tupela tim wantaim i gat 4 pions long poin lata. Poin lata bilong ol junia man na wimens divisen i no redi yet.

## Taemi ples autim Deka seket soka tonamen

### DAVID NAWI i raitim

PLES tim bilong Taemi i autim tiket bilong Busong long gren fainel resis bilong Deka seket soka tonamen wantaim 1-0 skoa na kamap sempion bilong Deka seket. Deka seket soka asosiesen insait long Morobe provins i holim dispela soka tonamen long

ples Busong long las wiken bilong mun Novemba. Dispela tonamen i pulim 8-pela tim olgeta long ples Busoni, Busong, Taemi na Kaparkona. Foapela ples ya i kamap wantaim tupela na tripela tim olgeta we i kamapim tonamen.

Bikpela hatwok tru ol dispela tim i bin kamapim long dispela taim bilong tonamen tasol 4-pela tim tasol i winim sans na go insait long semi fainel. Foapela tim ya i mekim save long kik i go inap Taemi na Busong tim i winim spes long gren fainel. Olsem na long gren fainel resis namel long tupela ples tim ya,

Taemi i soim moa strong long autim tiket bilong Busong wantaim 1-0 skoa long fultaim. Dispela em nambawan taim long kain soka tonamen olsem i kamap long Deka seket bilong Nawae ilektoret long Morobe provins. Man husat i bin sponsorim dispela tonamen em Mule Yapi bilong

ples Yambo long Bukawa eria. Mista Yapi i tokaut long taim em i givim dispela kap i go long sempion tim olsem dispela sponsa i no gat wanpela pasin o tingting politikis i stap bihain. Em i givim dispela sponsa long sapotim spot insait long Deka seket bikos spot i dai

olgeta long dispela hap eria. Long lukluk bilong em long spot insait long ol ples, i no gat developmen. Olsem na em i kamapim dispela tingting bilong holim tonamen ya. Spot opisa bilong Morobe Provinsel Spot opis long Lae, Ludwig Peka i bin kamap long dispela tonamen na helpim long lukim

olsem tonamen ya i ron gut na kamap gut. Ludwig i bin amamas tru long lukim ol gutpela stail bilong pilai i kamap insait long ol dispela ples tim. Em i givim bikpela tok amamas bilong em i go long taimi tim long winim dispela nambawan soka tonamen bilong Deka seket long dispela yia.



• Busi Brothers tim bilong Hunger strit long Lae, husait i save kilim skin long Moun Lunamen ragbi tas resis. *Poto Zeph Aigal.*



• Edukesen volibal tim bilong Bewani, Sandaun provins husat i bin pilal long amamasim namba 16 krismas bilong Sandaun provinsal gavman. Dispela em long wiken bilong Desemba 3 na 4, 1994 long Bewani stesin.



• Seme soka tim husat i bin pilal long amamasim Sandaun provinsal de long Bewani. Dispela em long wiken bilong Desemba 3 na 4, 1994.



• Oi stall meri bilong Karanas C gret tim bilong Mosbi sofbal resis.



• Mosbi pablik sevan soka tim bilong oi meri husat i save wok long Beng ov Papua Niugini.



• Kenz basketbal tim bilong ples Sombol husat i bin pilal long Bewani long wiken bilong Desemba 3 na 4. Oi i pilal long amasim namba 16 krismas bilong Sandaun provinsal gavman.

# Madang Blues sempion bilong Madang

YAKAM KELO I raitim

MADANG Blues i autim pinis primiasip taitel bilong Madang soka resis long las wiken taim em i nekim Mimlon 2-1 skoa long fultaim.

Madang Blues husat i gat ol gutpela na eksperiens pilaia i kamapim strongpela gem tru egens ol boi bilong Mimlon. Madang Blues i no givim wanpela liklik rum long Mimlon long brukim banis bilong em i go insait long golmak eria long skoa.

Long nambawan hap bilong pilai, tupela tim

wantaim i soim gutpela stail bilong pilai tru we ol fulbek long tupela sait wantaim i wok hat tru long stapim narapela long skoa.

Mimlon i bin kamapim nambawan skoa long stat bilong pilai taim biknem pilaia bilong Madang, Amos Romo i kisim wanpela gutpela bal i kam long midfil na kisim i go insait brukim banis bilong Blues na skoa.

Dispela gol i opim ai bilong ol boi Madang Blues long taitim banis na ol i holim Mimlon wantaim wanpela gol

tasol i go inap long haptaim.

Long namba tu hap bilong pilai, Madang Blues i stat long yusim gut fowet lain bilong em bikos i gat tripela olpela intanesenel pilaia i stap long fran lain bilong Madang Blues.

Ol tripela ya em; Dixon Laviong, Trimio Topio na Ondo Bart. Olsem na ol i wok bung wantaim na kamapim nambawan skoa we i mekim skoa i ron 1-1.

Klostu long fultaim, Dixon Laviong i kamapim namba 2 gol bilong Blues we em i

kisim gut spot long Trimo na Ondo. Dispela gol i stap inap fultaim we Madang Blues i winim gren fainel wnataim na kamap sempion bilong Madang long dispela yia.

Long gren fainel resis bilong ol meri; Madang Blues meri tu i bihainim lek bilong man bilong ol na autim tiket bilong Watabag 1-0 long fultaim. Risev gret bilong PX i rautim tiket bilong Mimlon 1-0 skoa long fultaim, Royals i winim gren fainel bilong divisen 1 egens KBS long 1-0 skoa.

# Gren fainel bilong Kimbe stap yet

SOKA gren fainel long Kimbe, Wes Nu Briten provins i no bin kamap tasol asosiesen bai holim yet gren fainel gen long mun Februari, 1995.

Presiden bilong Kimbe Soka Asosiesen (KSA), Augustine Moa i tok taim bilong gren fainel long kamap i no bin kamap bihainim taim bikos long ol nesene tonamen we i wok long pulim skwat na tim bilong Kimbe i go aut.

Taim ol i go bek long Kimbe, i no gat taim i stap moa long ol pilaia i pilaia gren fainel bilong ol bikos planti go bek redi long go holide long ples, Augustine i tok.

Augustine i tok krismas i mekim na planti pilaia i no gat tingting moa long stap longpela taim long Kimbe. Ol i tingting long go long ples olsem na i mekim hevi long pilaia gren fainel bilong ol long dispela yia.

Tasol presiden i tok i no gat bikpela hevi tumas long dispela bikos ol bai pilaia yet gren fainel taim ol i kam bek. Ol bai pilaia gren fainel pastaim tasol long ol i statim pri sisen bilong

Kimbe soka resis long 1995. Long dispela yia, Kimbe Saut Kos klap i bin go pilai long Lae insait long nesene klap sempionsip. Long dispela as, em i holim taim bilong pilaim semi fainel wantaim Tulako. Wina bilong tupela bai go wetim gren fainel na lusa bai pilaim wina bilong Leki na ariavatu husat bai pilai long namba 3 na 4 ples.

Saut Kos tim i bin go bek leit tu long Kimbe taim sempionsip i bin pinis long Lae. Olsem na dispela i holim planti taim liklik long pilai.

Long gren fainel resis bilong primia 2 divisen, ol marasin boi bilong Medics bai bungim Saut Kos.

Long Anda 17 gren fainel; ol yangpela dokta boi bilong Medics bai traime strong bilong ol long autim tiket bilong Tulako. Tasol tupela tim wantaim i gat wankain strong na husat tim i yusim gut het bilong em bai winim gem i.

Long wina s gren fainel resis, ol susa bilong Saut Kos bai mekm save wantaim Leki long painim sempion bilong ol meri.



• Lukaut long bol no gut bilong Trensport husat i was gut tru long bal na redi long abrusim straka bilong BPNG long las wiken Pablik Sevans soka resis long Bisini soka graun. Tupela tim wantaim i pilai strong tru tasol ol bol bilong Trensport i soim moa pawa na strong long dispela taim na nekim BPNG wantaim 2-0 skoa long fultaim. Pablik Sevans soka resis bilong pri sisen i pinis nau na olgeta manmeri bal malolo long krismas wiken na tu long Nu Yia wiken. Bihain, ol manmeri i ken brukim bun gen long PSSA Kap nokaut.

# Woks soim pawa long pretim PSSA kap

WOKS i soim bikpela strong tru long winim Intenel Reveniu Komisn (IRC) wantaim 2-1 skoa long kamap pri sisen sempion bilong Mosbi Pablik Sevans soka resis long las wiken.

Woks i bin pilaim strong gem tru egens IRC long kamap sempion na strongim poin bilong em antap long poin lata bilong Pablik Sevans soka resis long Mosbi.

Long las wiken, em i pilai strong tru long winim dispela gem bikos ol boi Teachers tu i ron klostu long em wantaim 19 poin.

Insait long dispela bikpela salens, Woks i bin skoa pastaim long mak bilong IRC long nambawan hap bilong pilai. Tasol IRC i no givim isi gem long Woks bikos em i gat ol gutpela stail bilong pilai na banis bilong em tu i strongpela.

Ol boi bilong IRC olsem Harry, Jacob na Rupa i bin kamapim gutpela pilai tru long

pretim golmak bilong Woks. Planti gutpela sans ol i kamapim long brukim banis bilong Woks na i go insait.

Fulbek bilong Woks, Duri Yarawi, Kevin Wak na Jonathan Mathew i mekim bikpela wok tru long stapim dispela birua bilong IRC.

Long namba tu hap tupela tim wantaim i kam bek na mekim save long pretim banis bilong narapela.

Straika bilong Woks, Mala Gauba i kisim wanpela gutpela bal tru long Peter Punau na i go insait abrusim tupela fulbek bilong IRC na putim i go insait long golmak stret. Woks i go pas wantaim 2-0 skoa.

Tasol ol takis boi i no sruk long pilai bilong Woks na ol i kilim skin yet long soim Woks olsem ol i no wanpela isi tim long winim.

Olsem na strongpela ron bilong ol fowet i mekim ol fulbek bilong Woks i paul liklik na IRC i salim wanpela

bal i go arere stret bilong golpos we golkipa i kalap nating na bal i go pas long umben.

Dispela gol bilong ol takis boi bilong IRC i kirap bel bilong ol na ol i stat long pilai strong. Woks i luksave long dispela na i stat long go bek long banisim mak bilong em. Long dispela as, Woks i yusim gut het bilong em na banisim golmak bilong em i go inap fultaim we em i winim IRC 2-1 long skoa.

Ol telefon meri bilong PTC i winim biknem pinis long kamap sempion bilong ol meri long divisen 1. PTC i bin go pas long dispela divisen wantaim 27 poin na Yunivesiti i ron bihain wantaim 23 poin. Tasol rekot i soim olsem PTC i bin autim tiket bilong Yunivesiti pinis na em i lusim wanpela gem tasol bilong em na winim olgeta 9-pela gem.

# Hatwok i save kamapim gutpela pilaia

GUTPELA pilai i save kamap long wanwan manmeri we em yet i ken soim laik na interes tru bilong em long pilai na i laik lainim moa long kamap gutpela pilaia long bihain.

Olgeta taim yumi save harim ol biknem spotman na meri i save tokaut long niuspepa o televisen olsem ol i kamap gutpela spotman o meri bikos long trening na laik o interes we ol i save gat olgeta taim long pilai.


Ol i save olsem trening, harim tok bilong kosa, lukautim gut bodi bilong yu i stap gut long pilai, tingting bilong yu i mas stap gut na pasin bilong yu long arapela i mas gutpela long mekim yu kamap gutpela spotman na meri. Dispela em planti toktok yu ken harim long planti ol top spotman na tu long ol kosa bilong wanwan spot.

## Junia program

Nau mipela i save harim o lukim ol kain kain liklik spot program em Spot Komisn i save kari-maut long olgeta skul holide taim olsem 'Pikinini Spot' o pisikel edukesen program insait long ol komyuniti skul. Dispela em wanpela rot bilong holim tingting bilong ol manki long laikim spot.

Sapos ol liklik pikinini i stat pilai spot long taim ol i liklik yet, tingting na interes bilong ol long spot bai wok long groa na taim ol i bikpela, ol i ken pilai long wanem spot we tingting na laik bilong ol i pas long en. Na dispela rot i ken helpim long kamapim ol gutpela pilaia insait long wanwan spot nau yumi gat long kantri.

Provinsel spot Sampela provins i gat sampela



spot we ol waitman o misineri i bin go lainim ol tumbuna bipo long en. Long dispela as, ol tumbuna i wok long pilai i go na taim ol papa bilong yumi i kamap, ol tu i go insait long spot ya na nau i yumi kamap na yumi wok long pilai spot ya bikos ol papa bilong yumi save pilaim spot ya.

Long lukluk raun bilong mi, mi save lukim olsem long hap bilong Sentrel provins, ol i man bilong pilai kriket stret. Bikos dispela em wanpela nambawan

spot ol waitman i bin kam na lainim ol tumbuna bilong ol na nau ol pikinini i holim yet. Spot ya i stap long blut olsem na taim bilong makim skwat, bai yu lukim ol Sentrel tasol i planti. Yu bai hat long lukim wanpela man hailans o Sepik insait long PNG kriket tim.

Arapela spot tu i olsem we i save kamap strong na bikpela insait long wanwan provins bikos ol i save olsem em spot tru bilong ol long bipo yet i kam.

Long Momase rijen, soka i bin nambawan gem long kamap long hap. Olsem na nau yu ken lukim soka em bikpela pilai tru long Momase rijen we ol lapun tumbuna na papa i wok long sapot yet i stap.


Long Wes Nu Briten provins, spot tru bilong ol em Ausi Rul na long Is Nu Briten em Sofbal.

## Piksa bilong developim spot.

Dispela em i piksa tru bilong we interes o strong bilong spot i stap long en. Olsem na i mas gat gutpela developmen program we spot opisel o kodineta bilong wanwan spot i mas go insait long ol rijen olsem na wok klostu wantaim ol manmeri ya na kamapim mak o as bilong spot ya i ken groa antap long en na kamap bikpela insait long kantri.

Nau mi lukim olsem wanem spot i kamap i kamap long laik tasol long wanem hap i gat manmeri i stap na soim interes long pilai. Tasol i no pulim olgeta manmeri tumas na spot ya i no save ron strong o gutpela bikos i mas gat pait o kros i kamap long bagarapim pilai. Dispela em bikos ol man husat i mekim olsem i no gat dispela laik o interes tru tru long spot ya.

# WANTOK SPOTS



## PNGFA makim pinis 40 pilaia long nesenel tim

UNAGI OFF-SEASON LEAGUE POINTS TABLE 'A' GRADE

Pool B	Wk1	wk2	wk3	wk4	wk5	wk6	wk7	wk8	wk9	wk10	
E/Boroko	0	0	0	0	2	0	0	2	1	5	2
Sharks	0	0	1	2	2	0	0	2	1	11	6
Sary Hawks	2	0	1	2	2	0	0	2	1	10	7
Saraga	2	0	0	0	0	0	0	2	0	4	2
5 mile	2	2	2	2	2	2	2	2	2	18	10
3,4 mile	0	2	0	2	0	2	2	0	1	9	4
Siane	2	0	2	0	0	0	0	0	0	4	4
7 Mile Jets	0	0	2	0	2	2	0	0	2	8	4

Pool A

Dogura	2	2	0	2	2	2	0	0	1	11	8
G Ridge	2	2	2	0	0	1	2	2	2	13	6
6 Mile	0	2	1	2	2	2	2	2	0	13	7
4 Mile Yth	0	2	1	2	0	0	2	0+1	0	8	5
Warasua	2	2	2	2	2	0	0	2+1	2	14	10
Moreatobo	0	1	0	0	2	2	0	0	4	4	1
Makana	2	0	0	2	2	2	2	2	2	12	4
8 Mile	0	0	0	0	0	0	0	0	0	0	0

'B' Grade - Pool B

E/Boroko	2	0	0	0	1	0	1	1	5	
Sharks	0	0	2	2	2	0	0	1	1	8
Sary Hawks	2	2	1	0	1	0	0	1	1	8
Saraga	2	0	0	1	1	1	2	0	0	7
5 Mile	2	0	1	2	2	2	2	1	2	13
3,4 Mile	0	0	1	0	1	2	1	1	1	6
Siane	2	2	2	0	0	2	0	1	2	11
7 Mile Jets	0	1	2	2	2	1	2	1	1	11

Pool A

Dogura	2	2	0	0	2	2	0	0	2	10
G Ridge	0	1	2	2	0	0	0	1	2	8
6 Mile	0	2	1	2	1	0	0	2	0	8
4 Mile Yth	0	2	1	0	1	0	0	0	0	2
Warasua	2	2	2	2	2	2	2	2	1	17
Moreatobo	1	0	0	0	1	0	1	0	3	1
Makana	2	0	1	0	0	2	2	0	11	3
8 Mile	0	0	0	2	2	1	2	2	1	10

'C' Grade - Pool B

E/Boroko	2	0	1	0	0	0	2	2	7
Sharks	0	2	0	2	0	2	0	2	8
Sary Hawks	2	2	1	2	1	0	0	1	7
Saraga	2	2	2	2	0	2	2	0	14
5 Mile	2	2	1	2	2	2	2	1	14
3,4 Mile	0	0	0	0	2	0	1	2	0
Siane	0	0	2	2	1	2	0	0	7
7 Mile Jets	0	2	1	0	0	0	1	0	4

Pool A

Dogura	2	0	2	1	0	0	1	1	7
G Ridge	2	0	1	1	1	2	1	1	8
6 Mile	0	0	2	2	0	2	0	1	7
4 Mile Yth	0	1	0	0	2	2	0	2	1
Warasua	1	2	2	2	2	2	2	1	12
Moreatobo	1	0	0	0	0	2	1	1	5
Makana	0	0	0	0	1	0	1	0	2
8 Mile	0	2	0	2	2	0	2	1	10

### YAKAM KELO i raitim

MOA long 40 man i stap pinis long trening skwat bilong makim Papua Niugini long ol soka resis insait long ovasis tonanem long neks yia.

Papua Niugini Futbal Asosiesen (PNGFA) bihain long em i tokaut long ol kosa na opisel husat bai go pas long redim skwat long neks yia i glasim ol pilaia long nesenel sempionsip na klap sempionsip long Lae. Na i makim trening skwat bilong em pinis long statim trening long stat bilong neks yia.

Nesenel kosa bilong PNG tim, Posman Kisakui i tok ol i makim pinis ol pilaia bilong bungim long trening kem long Madang na Goroka long neks yia. Trening skwat em; Hagen 2,

Goroka 1, Popondeta 1, LFA 4, Lahi 3, Madang 10 na Mosbi 22.

Olgeta nem bilong ol pilaia i stap wantaim tim menesa na het kosa bilong Madang, John Gringo. Wantok i save olsem John Gringo i wok long salim toksave long olgeta asosiesen long toksave long ol wanwan pilaia olsem ol i stap long PNGFA trening skwat.

Posman i tok ol i makim 8-pela pilaia long Madang tasol bihain ol i kisim gen narapela tupela moa pilaia. Dispela em wanpela samting ol i mekim bihainim kos bilong baim ka i go long Madang long trening kem long Ista wiken neks yia.

Bai olgeta pilaia bilong Hagen, Goroka, Kimbe, Popondeta na Lae i bung long Madang long namba

wan trening kem. Mosbi pilaia bai i no inap go long Madang bikos long kos bilong balus. Tasol ol bai statim trening bilong ol long Mosbi long mun Februari, 1995. Bikos het kosa, Posman Kisakui i stap long Mosbi wantaim asisten bilong em, Robert Popat.

Posman i tok bai ol i bungim sampela junia pilaia wantaim olpela skwat bilong Melanesian skwat long dispela trening bilong ol long mun Februari.

Tasol long namba tu trening skwat long Goroka we bai kamap long Kwins Betde long neks yia, bai ol i katim daun namba bilong ol pilaia long Mosbi na Madang.

Wantok i no kisim nem bilong dispela trening skwat bikos John Gringo i no isi long bungim na toktok wan-

taim. John Gringo husat em het kosa bilong Madang sait i winim dispela posisen olsem tim menesa bilong PNG skwat bihain long bikpela wok em i mekim long kamapim gutpela stori bilong Madang insait long nesenel sempionsip.

John Gringo tu i bin stap insait bipo long planti nesenel sempionsip na i gat planti eksperiens long nesenel sempionsip. Long dispela taim nau, PNGFA i luksave long hat wok bilong em na makim em long traime kisim save long intanesenel tonamen.

Long dispela as, John Gringo bai tim menesa bilong PNG tim long 1995 Saut Pasifik Gems long Tahiti, na tu long ol arapela intanesenel tonamen.

## Gringo bosim Tahiti SP Gems soka tim

PRESIDEN bilong Madang Soka Asosiesen (MSA), Peter Angasa i laikim bai het kosa bilong Madang i mas kisim gut skul wantaim nesenel kosa bilong

PNG, na go bek lainim ol arapela kosa long Madang.

Angasa i gat bikpela amamas long het kosa bilong Madang, John Gringo long kamap tim

menesa bilong PNG soka tim long 1995 Saut Pasifik Gems, em bai kamap long Tahiti. Na em i laikim bai John i mas wok klostu wantaim nesenel kosa, Posman Kisakui na

kisim gut skul long wok bilong kosa insait long intanesenel stended.

Angasa i tok em i laik kamapim kosa klinik bilong Madang long neks yia. Na dispela eksperiens bilong John Gringo bai helpim tru long developim ol kosa bilong Madang long strongim soka insait long provins.

Presiden i tok em i save gut long John Gringo long 4-pela kris-mas olgeta taim em i kamap presiden bilong Madang Soka Asosiesen.

Em i save long wok kosa bilong John we em i bin kisim Madang sait i go long nesenel sempionsip long Mosbi long 1990 na win. Long 1992 em i kisim Madang skwat i go tu long Manus long nesenel sempionsip we ol i bin mekim gut tru long semi fainel na lus long Lae. Na long dispela yia em i soim tru olsem em i wanpela gutpela kosa insait

long kantri. Bikos em i lukautim Madang tim husat i winim gen 1994 PNGFA Kap long Lae.

Angasa i tok amamas long PNGFA long luksave long John Gringo. Na em i gat bilip olsem dispela em gutpela sain bilong soka insait long Madang provins long groa strong long bihain.

Em i laik askim tu olgeta klap opisel long Madang long kamap gut long miting we asosiesen bai holim bikos MSA i laik statim soka sisen bilong Madang insait long mun Januari.

Bikos soka program bilong MSA i tait tru long 1995. Bikos long ol PNGFA nesenel tonamen bilong Anda 17, wimens, nesenel sempionsip na trening kem bilong PNG nesenel tim we bai kamap long Madang.

Olsem na presiden i ting bai nogat inap taim long pinisim ol pilai bilong asosiesen yet long 1995. Bikos long ol samting ya we bai i kamap.

Printed and published by Anna Bernadette Solomon, of Bittern Place, Gordons; at Allotment 2, Section 209, Hohola.

**PMSA SOKA BAI RAUSIM DIVISEN 2 LONG 1995 . . . pes 29**



• Ol meri bilong Trans Harbour husat i wanpela strongpela tim insait long Mosbi Pablik Sevans soka resis. Ol i pilaim wanpela strongpela gem egens BPNG meri na nekim ol wantaim 2-0 skoa long fultaim.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.